

EL SANTO EVANGELIO SEGUN SAN LUCAS

¹⁻² Ancha zuma Teófilo, tii cartal amquin cji-jrźcuča, Jesucristuž puntuquiztan. Jesucristuž nasta tjuñquiztanpacha jaknužt watčhaja, jalla ni-iqui ana tjatziča cherchi žoñinacaqui. Nii cherchi žoñinacaqui wejtnacaquiz tjaajinchičha. Nižaza yekja žoñinacžquiz tjaajinchizakazza Jesucristuž puntuquiztan. Nekztan tsjii kjaž žoñinacaqui Jesucristuž puntuquiztan cji-jrchičha niž jaru niž jaru.

³ Nižaza wejrqui zumpacha pewcpewczinča jaknužt Jesucristuž nasta tjuñquiztanpacha watčhaja, jalla nii. Jalla nuž pewcpewczcu wejrqui pinsichinča Jesucristuž puntuquiztan cji-jrzjapazakaz niž jaru niž jaru. “Jalla niic waliž cjesača”, cjican pinsichinča wejt kuzquiz. Jaziqui walja zuma Teófilo, amquin tii cartal cji-jrźcuča,

⁴ Jesucristuž puntu tjaajintanaca zumpacha zizajo.

JUAN BAUTISTAZ NASTAQUI

⁵ Ima Juan Bautistaž nasan jalla tuž watchičha. Judea yokquin Herodes cjita pajk jiliriqui mantiñitača. Nižaza Zacarías cjita timplu cwitiñi žoñi želatča. Niiqui Abías cjita t'akquiztantača. Niž tjun cjititača Elisabet. Ninacaqui Aarón cjita tuquita atchi ejpžquiztan tjonñitača.

⁶ Nii pucultan lucutiñ žoñiqui Yooz yujcquiziqui zuma kamañchiztača. Yooz Epiž mantitacama

kamñitača. Jalla nuž kaman ana čjul ujmi ninačž quintra tjeezñi atasacha jecmi.

⁷ Ninacaqui ana zinta majchchiztača. Elisabet cjitiqui ana wira matiñtača. Nii oraqui pucultan lucutiñi chawc chawcwatača.

⁸ Tsjii nooj Zacarías t'akquiztan turnuž tjonatča, Yooz sirwizjapa timpluquiz. Jalla nižtiquiztan Zacariasqui Yooz sirwatča timpluquiz.

⁹ Nii timplu cwitiñinacaqui tsjii žoñi inzinu tjaazñi illzñipantakalča. Nekztan Zacarižquiz illziča. Jalla nuž illztaž cjen Zacariasqui Yooz timpluquiz luzziča, inzinu tjaazñi.

¹⁰ Jalla nii inzinu tjaazñi oraqui tama žoñinacaqui Yoozquin mayizican želatča timplu zancu.

¹¹ Jalla nekztanaqui tsjii Yooz anjilaqui Zacarižquiz parisquichiča timpluquiz. Nii anjilaqui inzinu altarž žew latuquiz tsijtsiča.

¹² Anjila cheržcu Zacariasqui kuz turwaysi cjis- siča, ancha tsucchiča.

¹³ Anjilaqui cjichiča:

—Zacarías, ana am tsuca. Yoozqui amiž mayizitaqui nonziča. Jalla nižtiquiztan Yoozqui am Elisabet cjiti tjunaquiz lucmajch wawaž majtkataquiča. Jalla nuž majttan am wawaqui Juan cjita tjuuchiz cjequiča.

¹⁴⁻¹⁵ Jalla nii am majchqui walja pajk jiliriž cjequiča Yooz Ejpž yujcquiziqui. Jalla nii majttiquiztanaqui, amqui cuntintum cjequiča, walja chipsnaquiča. Nižaza walja žoñinacami chip-snaquiča, am tjunaž majttiquiztanaqui. Am majchqui vinumi awarintimi ana licaquiča. Ima

maa pjuchquiztan ulnan Yooz Espíritu Santuqui am majch kuzquiz luzaquiča.

¹⁶ Am majchqui walja Israel wajtchiz žoñinaca Yooz Ejpžquin wilta sirwizkataquiča.

¹⁷ Nižaza am majchqui ima Jesucristuž ojklayan ojklayaquiča, Yooz taku paljaycan. Cjuñzna. Tuqui timpuqui tsjii Yooz puntu paljayñi profeta želatča, Elías cjita. Yooz Espíritu Santuqui nii Eliasquiz Yooziž tjaata taku paljayskatchiča. Jalla nii tjaata taku paljaychiča Eliasqui, ana ekskuc. Yoozquin tjurt'iñi kuzziztača. Jalla nižtapacha Yooz Espíritu Santuqui am majchquiz Yooziž tjaata taku paljayskataquiča. Niiž paljaytiquiztan ejpžtanami maatinacžtanami wilta zumanskataquiča. Nižaza am majch paljaytiquiztan ana Yooz kuzcama kamñi žoñinacami Yooz kuzcama kamñi cjisnaquiča. Jalla nižtiquiztan Israel wajtchiz žoñinacaqui Yooz Majch tjonz tjuñi tjewznaquiča. Zuma kamcan, ninacaqui tjewznaquiča, Yooz Majch zuma risiwťisjapa. —Jalla nuž Zacarižquiz paljaychiča nii Yooz anjilaqui.

¹⁸ Nekztan Zacariasqui anjilžquiz pewcziča, tuž cjican:

—¿Ultim werara amiž chiitajo? ¿Jaknužt zizasajo? Wejrqui walja chawc žoñtla pero. Wejt maatakami chawc žon zakazza.

¹⁹ Nii anjilaqui kjaaziča, tuž cjican:

—Wejrqui Gabriel cjititča. Yooz manta payiñtča. Yoozqui wejr mantižquiča amquiz tii zuma takunaca maznajo.

²⁰ Amqui weriž chiita ana criitiquiztan, upam cjisnaquiča, am maati majtzcama. Yooziž pinsita

tjuñquiz weriž chiita takuqui cumplisnaquiča. — Jalla nuž chiichiča anjilaqui.

21 Zacarías timplu kjuyltan ažka želatča, ulanžquiz oraqi watatča. Jalla nižtiquiztan tjewzñi žoñinacaqui kuzquiz pinsichiča, kjažtiquiztan ana ulanžquejo, jalla nii. Zoñinacaqui zancu muzpa tjewznatča, Zacarías ulanžquizcama.

22 Nekztanaqui Zacariasqui ažktanalla ulanžquichiča. Pero ana jaknužt chii atchiča. Jalla nižtiquiztan nii zawnc žejlñi žoñinacaqui ispantichiča. “Timplu kjuyltan anjilžtan zalzižlani”, jalla nuž cjeyassiča. Upa cjissiž cjen Zacariasqui žoñinacžquiz kjaržtan paljaychiča.

23 Tsjii kjaž majquiztan Zacariasqui timplu cwitis turnu cumplichiča. Nii tjuñinaca žeržcu, persun kjuya ojkchiča.

24 Wiruñaqi niž Elisabet cjiti tjunqui ica cjissinča. Nekztan Elisabet tsjii pjijska jiiz kjuyaran želatča. Ana kjuyquiztan kjuya ojklaychinča. Naaqui persun kuzquiz pinsichinča tuž cjican:

25 “Yooz Jiliriqui wejr cjuñžcu, wejtquiz ickatchiča. Jaziqui žoñinacaqui anaž iya wejr iñarasača”.

JESUCRISTUZ NASTAQUI MAZINTACHA

26 Nekztanaqui sojta jiizquiztan Elisabet ickattanaqui, Yoozqui Gabriel cjita anjila cuchanžquichiča Galilea cjita yokquin, Nazaret cjita wajtquiz.

27 Nii wajtquiz tsjaa tunsill tur želatča María cjiti. David cjita atchi ejpžquiztan tjoniñtača.

Mariiqui José cjita zoñžtan kazzintača zalzjapa. Yoozqui naa Mariaquiz anjila cuchanžquichiča.

²⁸ Naaquiz tjonžcu, anjilaqui paljaychiča, tuž cjican:

—Cullacalla, Yooz k'ayamča amqui. Yooz kjarquizza. Nižaza Yoozqui amtan chicapachača. Yoozqui tjapa maatakžquiztanam amquiz juc'ant wali favoraž paaquiča. —Jalla nuž tsaanchiča anjilaqui.

²⁹ Anjilž taku nonžcu Mariiqui ispantichinča. Kuzquiz pinst'ichinča, nii tsaantaqui anal intintasača, cjican.

³⁰ Nekztanaqui anjilaqui naaquiz cjichiča:

—María, ana tsucaquiž amqui. Yoozqui amquiz wali pajk favora paaquiča.

³¹ Jalla nižtiquiztan amqui icaquiča. Lucmajch wawchizim cjequiča. Nii wawaqui Jesús cjita tjuuchiz cjequiča.

³² Tsjii noojiqui nii am majchqui wali pajk jiliriž cjequiča. Arajpach Yooz Ejpž Majchpanča ni-iqui. Werar Yooz Ejpqui niž Majchquiz pajk mantiñi cjiskataquiča, Israel wajtchiz zoñinacžjapa. Am David cjita atchi ejptača tuquita pajk mantiñiqui. Jalla nižta pajk mantiñi cjequiča am majchqui.

³³ Israel wajtchiz zoñinaca wiñayaž mantaquiča. Niiž mantitaqui wiñayaž želaquiča. Anaž tucuzinznasača. —Nuž paljaychiča anjilaqui.

³⁴ Nekztanaqui Mariiqui anjilžquiz pewczinča, tuž cjican:

—¿Jaknužt tii cjesaya? Wejrqui ana luctaka pa-juča.

³⁵ Nii anjilaqui kjaaziča, tuž cjican:

—Yooz Espíritu Santuqui amquiz tjonznaquiča. Jalla nuž tjonan arajpach Yoozqui niž aztan tsj-irižtakaz weezcaquiča am juntuč. Nii oraqui Yooz Espíritu Santuqui am t'icznaquiča. Jalla nižtiquiztan nii am maatiqui juc'ant zuma lijitum kamañchiz cjequiča. Yooz Majchpanča niiqui.

³⁶ Nižaza amquiz maznuča tuž, am jamillquiztan Elisabet cjitiqui ickatchitača, chawc žon cjenami. Tuquiqui žoñinacaqui Elisabet puntuquiztan cjiñitača: “Naa žonča ana matiñqui” cji-canaqui. Jaziqui sojta jiizkaz icchinča.

³⁷ Yoozqui čhjulumipankaz paasača. —Jalla nuž chiichiča anjilaqui.

³⁸ Nekztanaqui Mariiqui cjichinča:

—Wejrqui Yooz Jiliriž mantitacama kamiñ žontča. Yoozqui wejtquizimi amiž chiitacama paaj cjila.

Jalla nuž Mariaž chiitan, anjilaqui ojkchiča.

MARIAZ ELISABETAQUIN OJKTA

³⁹ Nekztanaqui tsjii kjaž majquiztan Mariiqui zati pariju ojkchinča Judea cjita kolta curunacchiz yokquin.

⁴⁰ Jalla nicju Zacarías kjuya luzzinča. Kjuya luzcu Elisabetaquiz tsaanchinča.

⁴¹ Nuž Mariaž tsaanan Elisabeta wawaqui pjuch kjuyl cjenpacha kissiča. Nekztanaqui nii oraqui Espíritu Santuqui naa Elisabetaquiz luzziča nižaza chiikatchiča.

⁴² Jalla nekztan naaqui alto tawkžtan Mariaquiz paljaychinča, tuž cjican:

—Yoozqui amquiz tjapa maatakžquiztanami wali pajk favora paachiča. Nižaza nii am majchqui walja honorchiz cjesaž cjila.

⁴³ ¿Kjažtiquiztan taa arajpach Jilirž maaqui wejtquin tjonžquejo? Wejrqui inakaztča. Anal waquisuča.

⁴⁴ Amiž tsaanta taku nonžcu, wejt wawaqui pjuchquiz ancha cuntintu kis kissiča.

⁴⁵ Yooziž apayžquita taku criichamča, nii Yooziž chiita takucama cumplisnaquiča, jalla nii criichamča. Jalla nižtiquiztan zuma cuntintum cjequiča. Nuž cjichinča Elisabetqui.

⁴⁶ Nekztanaqui Mariiqui chiichinča, tuž cjican: “Wejt Yooz Jiliriž honoral waytača.

⁴⁷ Wejt Liwriiñi Yooziž cjen, wejt kuzmi ančaž chipča.

⁴⁸⁻⁴⁹ Wejrqui inakaztča. Yooz mantitacama kamiñ žontča. Yoozqui wejtquiz cjuñžquichiča. Jaziqui walja azziz Yooz Ejpqui wejtquiz t'icziča. Jalla nuž wejtquiz pajk obra paachiča. Tekztan nawjcchuc tjapa žoñinacaqui wejt puntuquiztan parlaquiča: ‘Yoozqui naaquiz zuma favora paachiča’, cjican. Werar Yoozqui jeczquiztanami juc'anti zumapankazza.

⁵⁰ Yoozqui tjapa nižquin rispitiñi žoñinaczquiz okzñipanča, watay wata okzñipanča.

⁵¹ Yoozza walja pajk obranaca paañiqui. Mit kuzziz žoñinacaž pinsitanaca inakaz cjissa.

⁵² Walja azziz jilirinaca jwessa ninacz puestuquiztan. Antiz humilde kuzziz žoñinaca honorchiz cjiskatča.

⁵³ Nižaza jakziltat ana cusasanacchiz t'akjiri žejlčhaja, jalla nii t'akjirinacžquiz walja cusasanaca tjaaquiča Yoozqui. Antiz ricachunzcazti laachi kjarquiz ana čhjulchiz quejpkataquiča.

⁵⁴⁻⁵⁵ Nižaza Yoozqui učhum tuquita atchi ejpnacžquizimi, Abrahamžquizimi, Abrahamž majchmaatinacžquizimi, jalla ninacžquizimi taku tjaachiča, ninaca tirapan okznajo. Jalla nuž okžcu Yoozqui walja yanapčha Israel wajtchiz Yooz sirwiñi žoñinacžquin, ninaca ana tjatsñičha". Jalla nuž chiichinča Mariiqui.

⁵⁶ Tsjii čhjep jiiz Mariiqui Elisabetatan kamčinča. Nekztan quejpchinča naaža persun kjuya.

JUAN BAUTISTAZ NASTA

⁵⁷ Naa Elisabeta majtz tjuñiqui irantižquichiča. Nekztan lucmajch wawa majtchinča.

⁵⁸ Jalla nuž cjen, Yoozqui Elisabetaquiz ancha zuma favora paachiča. Jalla nii quintu zizcuqui, Elisabeta wisinunacami jamillanacami naaquin tjonžni ojkchiča. Nekztan ninacaž tjonžtan, Elisabetaqui ancha cuntintutakalča. Ninacami cuntintuzakaztača.

⁵⁹ Jalla nekztan quinsakal tjuñquiztan Zacariastan Elisabetatan timplu ojkchiča wawa chimpus cuztrumpi paakatjapa. Nii cuztrumpi paatan ejpž tjuužtan tjuuzkatz pecatčha, Zacarías cjican.

⁶⁰ Wawž maaqui cjichinča:

—Anaž. Tii wejt maatiqui Juan cjita tjuuchizpanž cjequiča.

⁶¹ Partinacazti pewcziča:

—¿Kjažtiquiztan nižta tjuuskatz pecjo? Am jamillanacquiztan anaž nižta tjuuqui žejlča.

⁶² Jalla nekztanaqui wawž ejpžquiz kjaržtan pewczyča, čhjul tjuuchizim pecas, jalla nii.

⁶³ Ejpqui tsjii maychiča, tjuu cjijrzjapa. Nekztanaqui cjijrchiča, tuž cjican: “Wejt maatiqui Juan cjitaž cjequiča”. Nekztanaqui tjappacha ispantichiča nii puntuquiztan.

⁶⁴ Nii orapacha Zacariasqui wilta chiiñi cjis-siča. Jalla nuž wilta chii atcan, Yooz honora paljaychiča.

⁶⁵ Jalla nuž cjen wisinunacami ispantichi quirchiča. Tjapa kjutñi nii Judea yokaran nii quintu ojkchiča.

⁶⁶ Tjappacha nii quintu zizñi žoñinacaqui kuzquiz pinsichiča: “¿Tii uzaqui čhjulut cjisnaquejo?” cjican. Yooz kjarquizpantača nii wawaqui.

⁶⁷ Nekztanaqui Yooz Espíritu Santuqui Zacarižquiz čhiikatchiča. Jalla nižtiquiztan Zacariasqui Yooziž tjaata takucama paljaychiča, tuž cjican:

⁶⁸ “Yooz Jiliri honorchiz cjilalla. Niiča Israel žoñinacž Yoozqui. Učhum Yoozqui niž mantitacama kamñi žoñinacžquin cjuñziča. Jaziqi liwriita cjequiča učhumqui.

⁶⁹ Yoozqui walja azziz Liwriiñi cuchanžquichiča, učhumnacaquiz. Davidž majch maati-nacžquiztanpacha majttača nii Liwriiñiqui. David cjitaqui Yooz mantitacama kamñitača.

70 Tuqui timpuquiztanpacha jalla nužupan Yoozqui taku tjaachiča. Yooz taku paljayñi žoñinacaqui niiž jaru niiž jaru nii Yooziž tjaata taku mazmazziča.

71 Nii maztaqui tužutača: ‘Liwriitačhumž cjequiča, učum quintra žoñinacžquiztanami, učum chjaawjkatñi žoñinacžquiztanami’.

72 Yooz Ejpqui učum tuqita atchi ejpnacžquiz taku tjaachiča, tuž cjican: ‘Wejrqui ančucaquiz tira okzniñča. Weriz zuma tjaata taku anal tjat-snača’.

73 Nižaza Yooz Ejpqui učum tuqita Abraham ejpžquiz taku juramintužtan tjaachiča, nijapami učumjapami.

74 Učum quintra žoñinacžquiztanami liwriitanaqui, učumqui ana ekskcu Yoozquin sirwasača.

75 Nižaza učumqui Yooz kuzcamakaz zuma liji-tuma kamaquiča. Jalla nuž kamcan učumqui Yooz sirwaquiča ticzcama”.

76-77 Nižaza Zacariasqui tira paljaychiča, tuž cjican: “Juan, wejt maati, amqui Jesús Jilirž tjonz tuqui ojklayaquiča, Israel žoñinaca nii zuma tjewznajo. Amqui jaknužt žoñinacž ujnacami pertunta cječaja, jalla nii intintiskataquiča. Žoñinacž ujnaca pertunta cjen, liwriitaž cjequiča. Jalla nuž intintiskattiquiztanaqui profeta cjitam cjequiča amqui, arajpach Yooziž tjaata taku paljayni profeta.

78 Yoozqui učum ancha okzñiž cjen učum liwriyaquiča. Tsewctanpacha tsjii Liwriiñi cuchanžquichiča, učum kuzquiz tjuñižtakaz kjanajo. Jalla nižtiquiztan ew timpužtakaz

cjequiĉha.

⁷⁹ Jalla nii Liwriiñiqui zuma kjanacamapanž Yooz zuma kamañ jicz tjeeznaquiĉha, zumchiquiz-takaz kamañi žoñinacžquizimi, ticzquiztan eksñi žoñinacžquizimi. Nižaza nii Liwriiñiqui uĉhum zuma irpaquiĉha, Yooz Ejpžtanami uĉhumtanami zumanznajo”.

Jalla nuž cjichiĉha Zacariasqui.

⁸⁰ Nekztanaqui nii Juan cjita uzaqui pajkchiĉha. Zapuru juc'anti Yoozquin tjurt'iñi kuzziztaĉha. Jalla nekztanaqui tsjii ch'ekti yokquin ojklayatĉha, Israel wajtchiz žoñinacžquiz niž obra tjeez-cama.

2

JESUCRISTUZ NASTA

¹ Jalla nii timpuquiz tsjii walja chawc jiliri želatĉha, Augusto cjita. Nii chawc jiliriĉqui mantichiĉha, tuž cjican:

—Tjappacha žoñinacaqui tjuu apuntiskataquiĉha.

² Nii timpuquiz Cirenio cjita jiliri želatĉha, Siria yokchiz žoñinaca mantiñi. Jalla nii timpuquiz primir censuĉqui watchiĉha.

³ Nekztanaqui tjapa žoñinacaqui persun watja ojkspantaĉha, persun tjuu apuntiskati.

⁴ Jalla nuž cjen José cjita žoñiqui Galilea cjita provinsiquiztan, Nazaret cjita wajtquiztan ulanžquichiĉha. Judea cjita provinsiquin, Belén cjita wajtquin ojkiĉha. Jalla nicju David cjita tuquita atchi ejpqui nassitaĉha. Davidž majchmaatquiztan tjonñitaĉha Josequi.

⁵ Jalla nuž cjen nicju ojkchiča, tjuu apuntiskati. María cjiti turatan zalzjapa kazzitača Josequi. Nii oraqui naa Mariiqui Espíritu Santuž t'icztatača. Juztan Mariatan pucultan ojkchiča, tjuu apuntiskati.

⁶ Belén wajtquin irantižcu, María majts oraqui tjonchiča.

⁷ Jalla nicju Mariiqui primir wawa majtchinča, Belén wajtquiz, animalž tjajz kjuyquiz. Wawaqui pañ awallžtan capžtatača. Jalla nuž capžcu animalž tjajz kjuyquiz t'apžtatača. Anaž iya alujamintu wajtchucatača.

AWATIRINACAQUI JESUSIZQUIZ RISPITI TJONCHICHA

⁸ Belén wajt žcatiran uuzi itzñi awatirinaca želatča. Awatirinacaqui pakara uuzi itzñitača pamparanpacha.

⁹ Jalla nuž želan tiripintit Yooz anjilaqui jeczquichiča. Tsewctan ninacž kjutñi walja kjanžquichiča. Nuž cheržcu ninacaqui ancha tsucchiča.

¹⁰ Jalla nekztanaqui nii anjilaqui cjichiča:

—Ana tsuca ančhucqui. Zuma quintul zji-jcžcuča. Tsjii Liwriiñiqui tjapa žoñinacžtajapa cuchanžquitača. Jalla niiž cjen žoñinacaqui zuma cuntintuž cjequiča.

¹¹ Tii zeziqiu Davidž wajtquiziqui tsjii wawa majttača. Jalla niiqui Jesucristo Yoozza, ančhuc Liwriiñi.

¹² Ančhucqui nii wawa wachaquiča pañ awallžtan capžta; nižaza animalž tjajz kjuyquiz t'apžta wachaquiča. Jalla nuž wažtaž cjen siñala cuntažtakaz cjequiča. Jalla nuž cjenaqui

ančhucqui zizaquičha, chekapan wereraž chiitkalala, niiqui. –Nuž cjichiča anjilaqui.

¹³ Jalla nekztan anjilžtan chica tama Yooz anjilanacaqui tsewctan jeczquichizakazza. Yooz anjilanacaqui Yooz honora waytichiča, tuž cjican:

¹⁴ –Tsewcta arajpach Yooz honorchiz cjilalla. Nižaza tii yokquiziqui Yooz okžta žoñinaca zuma cuntintu kuzziz cjilalla.

¹⁵ Jalla nuž chiižcu, Yooz anjilanacaqui tsewc arajpacha quejpchiča. Nekztan nii awatirinacaqui porapat parlassičha, tuž cjican:

–Anjilaž maztaqui arajpach Yoozquiztan tjonchikalala. Tsji Liwriiñi majttakalala. Jalla nii cheriž Belén watjaž ojklalla.

¹⁶ Jalla nekztanaqui awatirinacaqui zati pariju ojkičiča. Belén wajtquin animalž tjajz kjuyquiz luzičha. Nekzpacha awatirinacaqui zalčiča Mariatan Juztan wawa t'apzi.

¹⁷ Ninacžtan zalžcu tjappacha Yooz anjilaž chitanaca nii wawž puntuquiztan quint'ichiča.

¹⁸ Awatirinacaž nuž maztiquiztan, tjappacha nonžñi žoñinacaqui ispantichiča.

¹⁹ Mariizti persun kuzquiz nii mazta chjojchinča. Nii mazta puntuquiz pinsican walja pinsamintu aptazzinča.

²⁰ Awatirinacaqui uuzi ichi quejpchiča. Nižaza Yooz honora paljaychiča, tuž cjican:

–Yoozza chekanaqui. Ancha waliča učumž nonžtanaca, učumž chertanacami. Yooz anjilaž chiitacama nižtapacha cherchinčhumla. –Jalla nuž cjican Yooz honora waytissiča awatirinacaqui.

JESUSAQUI TIMPLUQUIN CHJICHTACHA

21 Majttiquiztan quinsakal tjuñquiziqui jalla nekztan nii wawžquiz chimpuz cuztrumpi paachiča. Ima Mariaž ican, Yooz anjilaqui Mariaquiz chiichiča, “Jesús cjita cjequicha amiž primir majtta wawaqui”. Jalla nižtiquiztan nii anjilaž chiita tjuužtan tjuuzkatchiča.

22 Tuquitanpacha tsjii taku mantichiča Moisesqui, tuž cjican: “Majtžcu ima pusi tunc tjuñiž cjen, maatakanacaqui Yooz sirwiz cuzturumpinaca ana payi atasacha. Pusi tunc tjuñiž tjonan, timpluquiz tsjii cuztrumpi paazpanča. Jalla nekztanaqui wilta Yooz sirwiz cuztrumpiž paasacha”. Jalla nižtiquiztan majtta tjuñquiztan pusi tunc tjuñi pjojkan Juztan Mariatan ninacž wawa chjitchiča Jerusalén cjita watja. Jalla nicju timpluquin ojkchiča wawa Yoozquin cumpjii.

23 Tsjii Yooz liiqui tuž cjichiča, “Primir lucmajch wawa majtžcu, Yoozquin cumpjitaž cjequicha Yooz sirwajo”. Nuž Yooz lii ut'aysiž cjen lii jaru cumplichča.

24 Yooz mantita lii jaru nii lucutiñiqui ojkchiča. Yooz liiqui zakaz cjiča: “Tsji pariza paluma uz tsjii pariza wežla palomažtakaz Yoozquin tjaaspanča”. Jaziqui nužupan Yoozquin tjaachiča.

25 Nii timpuqui Jerusalenquiz tsjii Simeón cjita žoñi želatča. Nii žoñiqui Yooz kuzcama kamñitača; Yooz lii jaru kamñitača. Nižaza Israel wajtchiz žoñinacž Liwriiñi tjewziča. Simeonqui Espíritu Santuž irpita žoñipantača.

26 Espíritu Santuqui Simeonžquiz taku tjaachiča, tuž cjican: “Ima ticzcan, amqui Yooz

cuchanžquita Liwriiñi Jiliri cheraquiča”.

²⁷ Jalla nuž taku tjaatiquiztanaqui Espíritu Santuqui Simeón irpichiča timplu kjutñi. Nii oraqui Jesusiž maa ejpqui nii timpluquin chjitchiča. Nekziqui Jesusižquiz mantita lii jaru cumplichiča.

²⁸ Jesusa cjita wawa cheržcu, Simeonqui kjaržtan kaaziča. Jalla nuž kaažcu, Yooz honorchiz cjeyajo, tuž cjichiča:

²⁹ –Yooz Tata, wejrqui amiž mantitacama kamiñ zoñtča. Tuquiqui wejtquiz taku tjaachamča. Anziqui amiž chiita taku cumplichamča. Jaziqui tižtiquiztanaqui cuntintul ticznasača.

³⁰ Jaziqui wejt persun čhjujčžtan tii amiž cuchanžquita Liwriiñi cherchinča.

³¹ Tjappacha tii muntuquiz žejlñi žoñinacžtajapa tii Liwriiñi cuchanžquichamča.

³² Tii Liwriiñiž cjen, Israel žoñinacžquizimi parti žoñinacžquizimi Yooz kamañ jicz tjeežtaž cje-tjiča, liwriita cjeyajo. Nižaza tii Liwriiñiž cjen, Israel wajtchiz žoñinacaqui zuma honorchiz cjis-naquiča. –Jalla nuž chiichiča Simeonaqui.

³³ Simeonž chiitiquiztan Jesusiž maa ejpqui ninacž kuzquiz ispantichiča.

³⁴ Nekztanaqui Simeonaqui ninacžta Yoozquin mayizichiča walikaz cjeyajo. Nižaza Jesusiž maaquiz paljaychiča, tuž cjan:

–Werarapančhay, tii wawaž cjen walja Israel wajtchiz žoñinaca liwriitapanž cjequiča. Nižaza tii wawaž cjen yekjapa Israel wajtchiz žoñinacžti ujquin tjojtznaquiča. Tiiqui walja chawc jiliri-

panž cjequiča. Pero walja žoñinacaqui nii anaž rispitaquiča, Yooziž cuchanžquita cjenami.

35 Tii wawaž cjen žoñinacaž kuzquiz pinsitanacaqui pajtaž cjequiča. Nižaza María, amqui tii wawaž cjen ancha llaquitam cjequiča. —Jalla nuž mazziča Simeonaqui.

36-37 Nii oraqui tsjaa Ana cjiti žon želatča, timpluquiz zakaz. Naatača Yooz taku paljajiñ profetqui. Jalla naaqui Fanuelž majttača, Aser cjita t'akquiztan. Pakallawk wata zalztiquiztan, naaža lucuqui ticziča. Anziqui walja chwec žontača. Quinsakalc tunca pusin watchiztača naa žewqui; timpluquiztan anapan ulniñtača. Ayunascan Yoozquin mayizican, Yooz Ejpžquin sirwiñtača majiñami weenami.

38 Jesús cjita wawa timpluquiz želan, nii orapacha Ana cjiti žonqui nii wawžtan zalchinča. Nuž zalžcu Yoozquin sparaquiž cjichinča. Nekztan nii wawž puntu paljaji kalltichinča Jerusalén watja liwriiz tjuñi tjewzñinaczquiz.

JESUSAQUI PAJKCHICHA

39 Tjapa Yooz mantita lii cumplizcuqui Jesusiž maa ejpqui Galilea yokquin quejpcičha. Niiž persun watja Nazaret cjita quejpcičha.

40 Jalla nii wajtquinaqui nii uzaqui pajkchiča. Tsjan tjupi y nižaza tsjan čhjultaki zizñi cjisičha. Yooz Ejpqui nii walja cwitichiča, nižaza yanapchiča.

41 Zapa wata niž maa ejpqui Jerusalenquin ojkchiča, pascua pijjsta payi.

⁴² Jesusaqui tuncapan wajtchiz cjen, niiz jamillžtan Jerusalenquin ojkchiča pascua pijjsta cuztrumpi payi.

⁴³ Jalla nekztan pijjsta žeržcuqui, quejpchiča ninacaqui. Jesús uzazti Jerusalén wajtquiz eclichiča. Niiž maa ejp ana ecliči naychiča.

⁴⁴ Niiž maa ejpqui pinsatča, “Niiž mazinacžtanž caa”, cjičan. Jalla nuž cjen niiz maa ejpqui ojkchiča tsjii nooj intiru. Pero tjuñi kattan, Jesusa kjurchiča jamillanacžquin nižaza ocjalž maziran.

⁴⁵ Maa ejpqui Jesusa ana wači atchiča. Jalla nekztanaqui Jerusalén watja quejpchiča, jalla nicju kjurzjapa.

⁴⁶ Tsjii čhjep majquiztan, maa ejpqui Jesús watchiča timplu kjuyla. Timpluquiz Israel lii tjajiči maestrnacžtan želatča. Maestrnacž takunaca nonznatča. Y nižaza maestrnacžquiz pewcznatča Jesusaqui.

⁴⁷ Nii uzaž paljayta taku nonžcu tjapa žoñinacaqui ispantichiča, nii uzaž nuž čhjulumi zizničhiyan.

⁴⁸ Jalla nekztanaqui nuž žejlčhi cheržcu, ispantichi cjičiča maa ejpmi. Nekztanaqui niiz maaqui chiižinčinča:

—Aay, tii wejt uza jay. ¿Kjažtiquiztan am nižta eclichamta? Am ancha llaquita kjurchinča wejrnacqui. —Jalla nuž maaqui niizquiz chiižinčinča.

⁴⁹ Jalla nekztanaqui Jesusaqui maaquiz kjaaziča, tuž cjičan:

—¿Wejr tjapa kjutčhi kjurchamkaya? Wejt persun Ejpž kjuyquiz žejlstanpantača wejtlaqui. ¿Jalla

nii ana zizzat amya?

⁵⁰ Jalla nuž chiyen niiž maa ejpqui ana intintazziča.

⁵¹ Nekztanaqui Jesusaqui maa ejpžtan Nazaret cjita watja ojkchiča. Nicju irantižcu maa epiž mantitanaca cazñipanikaztača. Maaqui jalla niiž nuž wattanacquiztan kuzquiz chjojchinča.

⁵² Jalla nekztan Jesusaqui tsjan pajkchiča. Nižaza tsjan zizni pinsamintuchiztača. Yooz Ejpmi žoñinacami niiž cjen cuntintutača.

3

JUAN BAUTISTAQUI YOOZ TAKU PALJAYCHICHA

¹ Zacarías Juan cjita majchqui Yooz taku paljayi kallantichiča. Jalla nii timpuquiz tii jilirinaca želatča. Tsjiiqui Tiberio cjitatača, juc'ant chawc jiliritacha niiqui. Tunca pjijskan wata jiliri cji-can mantichiča. Nižaza tira mantiñipantača. Tsjiizuñqui Poncio Pilato cjitatača. Niiqui mantichiča Judea cjita yokquin. Tsjiizuñqui Herodes cjitatača. Niiqui Galilea yokquin chawc jiliritacha. Niiž lajkqui Felipe cjitatača. Nii Felipiqui Iturea cjita yoka, Traconite cjita yoka, jalla nii pizc yokquin mantiñitača. Tsjiizuñqui Lisanas cjitatača. Niiqui Abilinia cjita yokquin mantiñitača. Nii timpuqui ninacatača pajk jilirinacaqui.

² Nižaza nii timpuqui Anastan Caifastan timplu chawc jilirinacatača. Nii timpuqui Juanqui želatča tsjii ch'ekti yokquin. Jalla nuž želan Yoozqui Juanžquiz takunaca paljayichiča.

³ Nekztan Juanqui tjapa kjutñi Jordán puj yokaran ojklaychiča. Nicju žoñinaczquiz paljaychiča, tuž cjican:

—Ančhucqui kuznacaž campiya; Yoozquin kuzziz cjisna. Nekztan ančuca ujnaca pertunta cjequiča. Jalla nekztanaqui bautistaž cjesača. —Jalla nuž paljaychiča Juanqui.

⁴ Tuquita tsjii Isaías cjita Yooz taku paljayñi profeta želatča. Niiž cjiřta takucama watchiča. Jalla tuž cjican, cjiřchiča:

“Ch'ekti yokquin tsjii žoñiqui altu tawkžtan paljayzcaquiča, tuž cjican: ‘Tsjii chawc jiliriž tjonaquiča. Jaziqui zuma kamañ jicz tjaczna. Tsjii zuma jicztakaz ančuca kuznaca zumpacha tjaczna, y nižaza zuma liji-tumapanž cjee.

⁵ K'awanaca liwj tjattjatzna. Curunacami lumanacami zumpachaž wjajržna, nii jicz zuma zok'o okajo. Nižaza nii t'ojonacaqui zumpacha kujjzcatzna. Jalla nuž zuma kamañ jicz tjacznaquiča.

⁶ Nii chawc jiliriž tjontan, tjapa tii muntuquiz žejlñi žoñinacami Yooz Epiž cuchanzquita Liwriiñiž cheraquiča’ ”.

Jalla nuž cjican cjiřchiča nii Isaías cjita žoñiqui.

JUAN BAUTISTAQUI ŽOÑINACŽQUIZ CHIZINCHICHA

⁷ Nekztanaqui žoñinacaqui tjapa watjanacquiztan ulanžquichiča, Juanž bautista cjisjapa. Juanqui nii žoñinaczquiz cjichiča:

—Zkora irata incallñi žoñinaca. Yooz Ejpqui ujchiz žoñinaca wajillaž casticaquiča. ¿Ject

ančhucaquiz nii mazzejo? ¿Nii casticu atipzjapa wejtquinž tjonja?

⁸ Kuz campiichinčuczłaj niiqui, zumapankaz kamaquiča, ančhuca campiita kuz kjana tjeezjapa. Ančhucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjonińča. Yoozqui anaž wejrnaca casticasača”. Jalla nižta ana chiichiiz waquisiča ančhucqui. Yoozqui tii maznacquiztan Abrahamž majchmaatinaca paasača.

⁹ Ančhucqui tsjii frut muntiztakazza. Ana zuma fruta pookńi muntiqui k'aačhtaž cjequiča jir achtan. Jalla nuž k'aačhtiquiztanaqui, ujtaz cjequiča. Jalla nižta irataž ančhucaquiz wataquiča. Ana zuma kamańchiz žońinaca castictaz cjequiča. —Nuž cjican paljaychiča Juanqui.

¹⁰ Jalla nekztanaqui žońinacaqui Juanžquiz pewcziča:

—¿Jaziqui čhjulut paaqui wejrnacjo?

¹¹ Nekztanaqui Juanqui kjaaziča, tuž cjican:

—Jequit pizc almillchiz cjechaj niiqui, tsjii almillaqui ana almillchiz žońžquin tjaasača. Tsjii wacchi čhjerchiz žońiqui tsjii ana čhjerchiz žońžquin niiž čhjeri tojnaquiča. —Nuž cjichiča Juanqui.

¹² Jalla nekztanaqui tsjii impuesto cobrińi žońinacaqui Juanžquin tjonchiča, bautista cjisjapa. Nekztanaqui Juanžquiz pewcziča, tuž cjican:

—Tjaajińi, ¿wejrnacqui čhjulut paaquiya?

¹³ Juanqui kjaaziča, tuž cjican:

—Lii jaruž cobraquiča. Anaž juc'anti cobraquiča ančhucqui.

¹⁴ Nižaza tsjii zultatunacaqui Juanžquiz pewcziča, tuž cjican:

—¿Wejrnaczti čhjulut paaquiya?

Juanqui kjaaziča, tuž cjican:

—Ančhucqui zoñžquiztan anaž čhjulumi kjañasača. Nižaza anaž fuerziyasača. Nižaza zoñžquizimi ana inapankaz tjojtñasača, tsjii cusasa packatzjapami. Nižaza ančhuc persun suelduchiz cuntintupanž cjee. —Jalla nuž cjican kaaziča Juanqui.

¹⁵ Tjapa zoñinacaqui Yooziž cuchanžquita Cristuž tjonz ancha tjewznatča. Jalla nižtiquiztan zoñinacaqui kuznacquiz pinsichiča: “Juanqui Cristužlani” cjican.

¹⁶ Pero Juanqui tjappacha nii zoñinaczquiz cjichiča:

—Nonžna. Wejrqui kjaztangkal bautisuča. Tsjizun wejt wirquin tjonča. Jalla niiqui Espiritu Santužtanami arajpach ujžtanami bautisaquiča. Jalla niiča wejtquiztan tsjan juc'ant poderchizqui. Anal niž čhjata chjojkinimi atasacha, nižquiz atintisjapa. Inakaztča wejrqui.

¹⁷ Juanqui tira paljaychiča, tuž cjican:

—Ančhucqui trigo zkalažtakazza. Nii tjoñi jiliriqui trigonaca kjojaquiča. Nekztan itsanacami zuma trigumi pjalznaquiča. Nii zuma triguqui ricujtaž cjequiča. Niiž persun kjuyquin majcztaž cjequiča. Nii itsanacazti liwj ujžtaž cjequiča, ana tjesni ujquiz. Jalla nižta irataž ančucaquiz wataquiča.

18 Jalla nuž zoñinaczquiz chiižinchiča Juanqui. Nižaza yekja chiižintanacami paljaychiča, zuma Yooz taku paljaycan.

19 Nižaza wiruñaqi Juanqui Herodes cjita jiliržquiz iwjt'ichizakazza. Herodes cjita jiliriqi niž jilž tjunatan zalsiča. Felipe cjitatača niž jilaqi. Nižaza Herodesqui iya anawalinaca paachitakalča. Nekztan Juanqui Herodesquiz iwjt'ichiča tjapa niž anawali paatiquiztan.

20 Herodeszti ana nonziča. Juc'anti anawalinaca paachiča, Juan carsilquiz chawjczcama.

JESUCRISTUZ BAUTISTA

21 Juanqui ima carsilquiz chawcta želan, walja zoñinaca bautissiča. Nižaza Jesusa bautissizakazza. Jesusaqui bautista cjiscu Yooz Ejpžquin mayizatča. Nii orapacha arajpacha cjetziča.

22 Yooz Espíritu Santuqui tsjii palumažtakaz chjijwžquichiča Jesusiž juntuñ. Nižaza arajpachquiztan tsjii altu jora paljayžquiñi nonziča. Nii joraqui tuž cjican chiižquichiča:

—Amča wejt ultim k'ayi Maatimqui. Amiž cjen anchal cuntintutča wejrtqi.

JESUCRISTUZ TUQUITA ATCHI EJPNACACHA TINACAQUI

23 Jesusaqui nii oraqui quinsatunc watchiztača. Jalla nekztanaqui niž Yooz Epiž tjaata trabajo kallantichiča. Jesusiž tuquita atchi ejpnacaqui tinacača. Primero Josež maati cji-tažtakaztača. Josequi Eliž majchtača.

24 Eliqui Matatž majchtača. Matatqui Leviž majchtača. Leviqui Melquiž majchtača.

Melquiqui Janaž majhtača. Janaqui Josež majhtača.

²⁵ Josequi Matatías majhtača. Matatiasqui Amós majhtača. Amosqui Nahumž majhtača. Nahumqui Esliž majhtača. Esliqui Nagaiž majhtača.

²⁶ Nagaiqui Maatž majhtača. Maatqui Matatías majhtača. Matatiasqui Semeiž majhtača. Semeiqui Josež majhtača. Josequi Judaž majhtača.

²⁷ Judaqui Joanaž majhtača. Joanaqui Resaž majhtača. Resaqui Zorobabelž majhtača. Zorobabelqui Salatielž majhtača. Salatielqui Neriž majhtača.

²⁸ Neriqui Melquiž majhtača. Melquiqui Adiž majhtača. Adiqui Cosamž majhtača. Cosamqui Elmodamž majhtača. Elmodamqui Erž majhtača.

²⁹ Erqui Josuež majhtača. Josuequi Eliezerž majhtača. Eliezerqui Jorimž majhtača. Jorimqui Matatž majhtača.

³⁰ Matatqui Leviž majhtača. Leviqui Simeonž majhtača. Simeonqui Judaž majhtača. Judaqui Josež majhtača. Josequi Jonanž majhtača. Jonanqui Eliaquimž majhtača.

³¹ Eliaquimqui Meleaž majhtača. Meleaqui Mainanž majhtača. Mainanqui Matataž majhtača. Matataqui Natanž majhtača.

³² Natanqui Davidž majhtača. Davidqui Isaiž majhtača. Isaiqui Obedž majhtača. Obedqui Booz majhtača. Boozqui Salmonž majhtača. Salmonqui Naasonž majhtača.

³³ Naasonqui Aminadabž majhtača. Aminadabqui Aramž majhtača. Aramqui Esromž majhtača. Esromqui Fares majhtača. Faresqui Judaž majhtača.

³⁴ Judaqui Jacobž majhtača. Jacobqui Isaacž majhtača. Isaacqui Abrahamž majhtača. Abrahamqui Tarež majhtača. Tarequi Nacorž majhtača.

³⁵ Nacorqui Serugž majhtača. Serugqui Ragauž majhtača. Ragauqui Pelegž majhtača. Pelegqui Heberž majhtača. Heberqui Salaž majhtača.

³⁶ Salaqui Cainanž majhtača. Cainanqui Arfaxadž majhtača. Arfaxadqui Semž majhtača. Semqui Noež majhtača. Noequi Lamecž majhtača.

³⁷ Lamecqui Matusalenž majhtača. Matusalenqui Enocž majhtača. Enocqui Jaredž majhtača. Jaredqui Mahalaleelž majhtača. Mahalaleelqui Cainanž majhtača.

³⁸ Cainanqui Enós majhtača. Enosqui Staž majhtača. Setqui Adanž majhtača. Adanqui Yooziž paatiquiztan Yooz maatitača.

4

SATANAS CJITA DIABLUQUI JESUSA UJQUIZ TJOJTSKATZJAPA PECATCHA

¹ Jesusiž kuztan Yooz Espíritu Santuž kuztan tsjii kuzziztača. Jalla nuž cjen Jesusaž Jordán cjita pujquiztan okan, Espíritu Santuqui Jesusa chjitchiča ch'ekti yokquin.

² Jalla nii ch'ekti yokquin žejlchiča pusi tunc tjuñi. Jalla nuž želanaqui nii Satanás cjita diabluqui Jesusa ujquiz tjojtskatzjapa pecatča. Jalla nii pusi tunc tjuñi Jesusaqui ana čhjeri lujlchiča. Jalla nižtiquiztan pusi tunc tjuñquiztan ana lujlchiž cjen čhjeri eecskatchiča.

³ Jalla nekztanaqui nii diabluqui cjichiča:

—Ultim Yooz Maatimžlaj niiqui, amqui tii mazquiztan t'anta tuckatalla. —Nuž diabluqui chiichiča.

⁴ Jesusaqui kjaaziča, tuž cjican:

—Cjijrta Yooz takuqui tuž cjiča: “Zoñinacaqui anaž čhjeržtan alaja žetasacha. Yooz takuča chekanaqui, jalla niča ultim čhjerižtakazqui, Yooztan wiñaya žetzjapaqui”.

⁵ Jalla nekztanaqui nii diabluqui Jesusa chjitchiča tsjii pajk cur puntiquin. Jalla nicju tjapa tii muntuquiz žejlñi yokanaca tjeeziča tsjii ratukaz.

⁶⁻⁷ Nekztanaqui diabluqui Jesusižquiz cjichiča:

—Wejt yujcquiz quillsnaquiž niiqui, nižaza wejr rispitaquiž niiqui, tjapa tii yokquiz žejlñinaca amquiz tjaataž cjequiča. Wejrqui tjapa tii yokanaca tjaacha, am mantisjapa. Tii yokquiz žejlñinaca amtaž cjequiča tjappacha. Tii tjappacha wejtquiz tjaatatača. Jaziqui wejrqui jakziltižquiz tjaaz pecučaja, jalla nižquin tjaasača. —Jalla nuž cjichiča diabluqui.

⁸ Nekztanaqui Jesusaqui kjaaziča, tuž cjican:

—Satanás, wejtquiztan zaraka. Cjijrta Yooz takuqui tuž cjiča: “Ultim arajpach Yoozquinkaz rispita. Nižaza nii alaja sirwa. Niikazza Yooz Jiliriča”, nuž cjican cjijrtača.

9-11 Nekztanaqui nii diabluqui Jesusa chjitchiĉha Jerusalén cjita watja. Nicju timplu pjurniquin chjitchiĉha. Nekztan cjichiĉha:

–Cjijrta Yooz takuqui tuž cjiĉha: “Yooz Ejpqui niiz anjilanaca mantaquiĉha, am cwitisjapa. Niacž kjaržtan am cwitaquiĉha, ana am kjojcha ĉhjojritžta cjeyajo ĉhjul mazquiztanami”. Nuž cjijrtaĉha. Jaziqui ultim Yooz Maatimžlaj niiqui, tsewctan kossuc tii yokquiz layžcalla.

¹² Nekztanaqui Jesusaqui kjaaziĉha, tuž cjican:

–Cjijrta Yooz takuqui tuž cjiĉha: “Zoñiqui ultim arajpach Yooz ana inakaz nuž yanznaquiĉha”.

¹³ Jalla nekztanaqui diabluqui ana ĉhjulu iyas pinsiñi cjissiĉha, Jesusa ujquiz tjojtskatzjapaqui. Nekztanaqui tsjii kjažtapacha niizquiztan zarakĉiĉha. Wiruñ wilta ujquiz tjojtskatz yanznaquiĉha.

JESUCRISTUQUI YOOZ PUNTU PALJAYCAN OJKLAYCHICHA

¹⁴ Nekztanaqui Jesusaqui quejpžquichiĉha Galilea cjita yokquin. Walja Espiritu Santuž azziztaĉha. Tjapa yok kjutñi niiz quintuqui ancha ojkĉiĉha.

¹⁵ Galilea yokquin želan judío ajcz kjuyanac-quizimi tjaañiĉha. Niiž tjaañintiquiztan tjapa žoñinacaqui niiz honora waytichiĉha.

NAZARET CJITA WAJTQUIN OJKCHICHA

¹⁶ Nekztanaqui niiz persun watja ojkĉiĉha, Nazaret cjita. Jalla niitaĉha niiz pajkta watjaqui. Jeejz tjuñ nojiqui ajcz kjuyquin luzziĉha, niiz cuztrumpi jaru. Jalla nii ajcz kjuyquin žejlcan, tsijtsiĉha Yooz taku liizjapa.

¹⁷ Nekztanaqui Isaías cjita profetaž cjiirta Yooz taku, jalla nii libruqui chjalžtatača Jesusa liyajo. Nii libro cjetžcu wajtchiča tii cjiirta taku. Nekztan liichiča, tuž cijan:

¹⁸ “Yooz Espíritu Santuqui wejt kuzquiz žejlča. Wejrqui illztača, pori žoñinacžquiz zuma taku maznajo. Nižaza wejrqui cuchanžquitača llaquizñi žoñinaca ana llaquiz llaquizajo. Nižaza wejrqui cuchanžquitača tanta žoñinacžquiz maznajo, ‘Liwriitaž cjequiča ančhucqui’ cijan. Nižaza wejrqui cuchanžquitača zur žoñinacž čhujqui čhjetnajo. Nižaza wejrqui cuchanžquitača ana zuma langzkatta žoñinaca liwriyajo.

¹⁹ Yooz Ejpqui žoñinacžquiz zuma favora paaquiča. Jalla nuž nii zumanaca paazjapa Yooz Espíritu Santuqui wejttan chicapachača”.

Jalla nuž Yooz taku cjiirtača.

²⁰ Jalla nekztanaqui Jesusaqui nii libro pjuczcu ajcz kjuya atintiñi žoñžquiz intirjichiča. Nekztan nužquiz julziča. Tjappacha nekz žejlñi žoñinacaqui tira nižquin chekznatča.

²¹ Nekztanaqui paljayi kallantichiča, tuž cijan:

—Tonjpacha tii cjiirta Yooz taku cumplissiča ančucaž nonžnan.

²² Nekztanaqui žoñinacaqui chiichiča, tuž cijan:

—Walikazza tii Jesusaqui.

Niž zuma chiita takunacquiztan ispantichiča. Ninacpora parlassiča, tuž cijan:

—¿Anaj tiic Juz maatiya?

23 Nekztan Jesusaqui tuž chiichiča:

—Ančucaquiztan zoñi wejtquiz chiyachani, “Am kullñi zoñimžlaj niiqui, ima wejr kullcan, am persunpacha kullalla”. Wejrqui Capernaum wajtquin milajrunaca paachinča, jalla nii quintu nonzinčhucča. Jaziqumi ančhucqui wejtquiz tuž chiyachani: “Nižtapacha tii am persun wajtquin paažinalla”. Nuž wejtquiz chiyachani.

24 Jesusaqui tirapan paljaychiča, tuž cjian:

—Weraral chiyučha. Yekja wajtchiz zoñinacaqui tsjii Yooz taku paljayñi profeta zuma risiwasača. Persun wajtchiz zoñinacazti nii Yooz taku paljayñi profetžquiz anaž juyzu paača.

25 Tuquiqui tsjii Elías cjita Yooz taku paljayñi profeta želatča. Nii timpuqui walja žewžew maatakanaca želatča Israel wajtquinaqui. Chjep wata sojta jüzziz ana wira chijinchiča. Jalla nižtiquiztan walja mach'atača. Ana čheri želatča nii wajtquinaqui.

26 Israel wajtquin walja žewžew maatakanaca želanami, Eliasqui ninacžquin ana cuchantatača. Pero Sarepta cjita wajtquin tsjaa žew želatča, Sidón cjita wajtž žcati. Jalla naa yekja wajtchiz žewaquin cuchantatača Eliasqui. Jalla nužupan cjetča.

27 Nižaza tuqui timpuzakaz tsjii Eliseo cjita Yooz taku paljayñi profeta želatča. Nii timpuqui walja mojkchi janchichiz laa zoñinaca želatča; lepra cjita conača niiqui. Pero Eliseuqui persun wajtchiz laa zoñinacžquiz ana čhjulumi čhjetinchiča. Antiz tsjii Naamán cjita Siria wajtchiz zoñžquiz čhjetinchiča. —Jalla nuž chiichiča Jesusaqui.

28 Jalla nuž chiita nonžcu, tjappacha nii ajczñi zoñinacaqui muzpa žawjchiča Jesusiž quintru.

29 Ninacaqui walja tsijtsiča. Nekztanaqui wajtquiztan Jesusa ulanskatchiča. Nii watjaqui pajk waranc k'aw žcati želatča. Jalla nuž k'aw kjutñi Jesusa chjitchiča, nii k'awquiztan kossuc tjojtsjapa.

30 Ultimquiziqui Jesusazti ninacž taypi watchiča. Ana čjulumi kjaž cjita ojkchiča.

TSJII ZAJRAZ TANTA ZOÑI CHJETINTA

31 Nekztanaqui Jesusaqui ojkchiča Capernaum cjita watja Galilea cjita yokquin. Jalla nicjuqui jeejz tjuñ nooj Jesusaqui tjaajinchiča ajcz kjuyquin.

32 Niiž tjaajintiquiztan zoñinacaqui walja ispan-tičiča. Jesusaqui pajk jilirž tawkžtan tjaajinchiča.

33 Jalla nii ajcz kjuyquiz tsjii zajraž tanta žoñi želatča. Nii žoñiqui kjawchiča, tuž cjican:

34 —¡Ay! Jesusa, Nazaret wajtchiz žoñimča. ¿Kjažtiquiztan am wejnacaquiz mitizi? ¿Kjažtiquiztan wejrnac aki tjon amjo? Wejrqui am pajuča. Yooziž zuma cuchanžquita Žoñimča amqui. —Jalla nuž cjichiča nii zajraqui.

35 Nekztanaqui Jesusaqui nii zajrižquiz ujziča, tuž cjican:

—¡Ch'uj žela! ¡Tii žoñžquiztan zaraka!

Jalla nekztanaqui žoñi tjojtcu zajraqui ulanchiča žoñinacaž cheranpacha. Ana nii žoñi čhjojritžcu, ecchiča.

36 Nekztan tjapa žoñinacaqui ispantičiča. Jalla nekztan parlassiča, tuž cjican:

—¿Ĉhjul mantiĥi takumekaz chiila tiiqui? Walja azziz tawkchizza. Tii zoĥi qui zajramiĥ mantila. Tiiĥ mantitiquiztan zajramiĥ ulanla. —Nuĥ ispan-tichi parlassiĥa.

³⁷ Tjapa kjutĥi nii yokaran Jesusiĥ ispan-tichuca paatanacquiztan walja parlasĥitaĥa.

SIMON PEDRUZ AJMUZ MAA CHJETINTA

³⁸ Nekztanaqui Jesusaqui nii ajcz kjuyquiztan ulanĥcu ojkĥiĥa. Nekztan Simonĥ kjuyquin luziĥa. Jalla nekz Simonĥ ajmuĥ maa ch'ujlĥi cona laacjichi ťelatĥa. Tjapa curpu walja kjakĥi ťelatĥa. Nii ťejlĥi zoĥinacqui Jesusiĥquiz roct'ichiĥa:

—Ĉjetinĥinalla, —cjican.

³⁹ Nekztanaqui Jesusaqui naa laa ťona kjutĥi chutjatiĥa. Nekztan laa ťon ĥjetinĥiĥa. Ch'ujlĥi conaqui apaltichiĥa nuĥquiz. Nii ora-pacha naa ťonqui ťaazinĥa, nekztanaqui ninaca atinti kallantichinĥa.

TJAPAMAN LAA ZOĥINACA CHJETINTA

⁴⁰ Nekztanaqui tjuĥiz kattan, ťoĥinacqui tjapaman laa ťoĥinaca zjiĥĥiĥa, Jesusa ĥejtnajo. Nekztan Jesusaqui zapa mayniĥquiz persun kjarĥtan lanziĥa. Jalla nuĥ lanĥcu ĥjetinĥiĥa.

⁴¹ Niĥaza tsjii kjaĥ laa ťoĥinacĥquiztan zajranaca ulanskatiĥa. Jalla nuĥ ulanskatan zajranacqui kjawĥiĥa:

—Yooz Maatimĥa amqui, —cjican.

Nii zajranacqui zizatĥa, Yooziĥ cuchanĥquita Cristupankazza Jesusaqui, jalla nii. Jalla

nižtiquiztan Jesusazti zajranacžquiz ujziča, tuž cjan:

—Jalla wejt puntuquiztan anapanča chiichisqui.

JESUSAQUI YOOZ ZUMA KAMAÑ PUNTU PALJAYCHICHA

⁴² Niiž jakakattaž wentan Jesusaqui wajtquiztan ulanchičha, ana žoñž žejlz yokquin. Pero nii wajtchiz žoñinacazti walja nii kjurchičha. Nižtami kjurñi žoñinacaqui irantichičha jakziquin Jesusa želatčhaj, jalla nicju. Nii žoñinacaqui Jesusaž atajs pecatča, ana jakziquinami okajo.

⁴³ Pero Jesusaqui ninacžquiz cjichičha:

—Yekjap watjanacquin jaknužt žoñinacaqui Yooz zuma kamañchiz kamz waquizičhaja, jalla nii paljayzquiztanča wejrqui. Jalla nijapa wejrqui tii muntuquiz cuchanžquitača.

⁴⁴ Jalla nuž paljaycan Jesusaqui ojklaychičha Galilea yokaran. Jalla nuž ojklaycan ajcz kjuyquizimi paljayñitača.

5

JESUCRISTUQUI MILAJRU PAACHICHA

¹ Tsjii nooj Jesusaqui tsjii pajk kot atquin želatča. Genesaret cjitača nii pajk kotaqui. Jalla nekz želan walja žoñinacaqui niižquin tjonchičha. Yooz taku nonzjapa niiž muytata ancha ts'acjasatča.

² Jesusaqui pizc laachi warcu cherchičha kot atquiz. Tsjii ch'iz tanñi žoñinacaqui warcunaca ecchitača. Ninacaqui ch'iz tanz rednaca awjnatča.

³ Jalla nektanaqui Jesusaqui Simón cjita zoñž warcuquiz luzziča. Simonžquiz nii warcu koluc atskatchiča kot mor kjutñi cheechi. Jesusaqui warcuquiz julžcu, žejlñi žoñinaczquin tjajñi kallantichiča.

⁴ Jalla nuž žoñinaczquiz tjajñi žeržcu, Simonžquiz cjichiča:

—Tii warcu am chjicha tsjan kos kjutñi. Jalla nektan am ch'iz tanz rednaca tjojtžna.

⁵ Simonaqui kjaaziča tuž cjican:

—Wejt Tjajjñi Maestro, zeziqui wejrnacqui pakara langzinča, pero ana zinta ch'iz tanchinča. Nižtaqui amiž mantanaqui wejt ch'iz tanznaca tjojtžnača.

⁶ Nektanaqui ch'iz tanz tjojtžcu, walja muzpa ch'iz tanchi jooziča, redmi wjajrzñi kallantichiča.

⁷⁻⁸ Nii oraqui ninacz mazinaca yekja warcuquintača koluc ažkquinalla. Ch'iz tanz wjajrzñi kallantiquiztan mazinaca kjaržtan wilzcu, kjawziča yanapi tjonajo. Nii mazinacaqui irantižcu, nii pizc warcuquiz ch'iztan chjijpsiča. Ch'iztan jos nii kotquiz kos julžñi tjurchiča nuž wacchi ch'iz tanziž cjen. Nii cheržcu, Simón Pedruqui Jesusiž yujcquiz quillziča. Nektan cjichiča:

—Wejt Yooz Jiliri, ancha ujchiz žoñtča wejrqui. Amtan chica ojklazqui anal waquizuča.

⁹ Jalla nii wacchi ch'iz tanchiž cjen, Simonaqui walja ispantichiča, nižaza niž mazinacami.

¹⁰ Tsjii pucultan mazinacaqui Jacobžtan Juanžtan cjitatača. Ninacaqui Zebedeož majchnacatača. Jacobžtan Juanžtan nižaza

ispantichi cjissiĉha. Jesusaqui Simonžquiz cjichiĉha:

—Ana am tsuca. Jalla tekztan nawjckhuc jaknuž ch'iz juntichamžlaja, jalla nižta irata amqui zoñinacam juntaquiĉha Yooztajapaqui.

¹¹ Jalla nekztanaqui warcunaca yokquin iran-tiskatžcu, ninacaqui tjappacha ecchiĉha. Nižaza nii ch'iz tanz langz jaytichiĉha Jesusižtan chica ojklayzjapa.

MOJKCHI JANCHICHIZ LAA ZOÑI ČHJETINTA

¹² Tsjii noojiqui Jesusaž tsjii wajtquiz želan, tsjii mojkchi janchichiz laa zoñi tjonchiĉha. Jesusa cheržcuqui, niž yujcquiz puct'ichiĉha yokquiz-pacha. Jalla nekztanaqui rocchiĉha, tuž cjican:

—Wejt Jiliri, wejr čhjetnalla. Am wejr čhjetinzim pecĉhaj niiqui, wejr čhjetinzim atĉha amqui.

¹³ Nekztanaqui Jesusaqui kjaržtan lanziĉha, tuž cjican:

—Wejr am čhjetnasachiya. Jaziqui čhjetintam cjissa.

Jalla nuž čiitiquiztanaqui nii orapacha nii zoñiqui žejtchi cjissiĉha mojkchi janchi laaquiz-tan.

¹⁴ Nekztanaqui Jesusaqui nii zoñi mantichiĉha ana jeczquizimi nuž nii čhjetinta puntu chichiyojo. Nižaza cjichiĉha:

—Timpluquin oka amqui. Timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantiĉhaja, jalla nuž ofrenda uchaquiĉha. Jalla

nižtiquiztan žoñinaca am žejtchi zizaquiča. Jazic oka amqui. —Nuž mantichiča Jesusaqui.

¹⁵ Jalla nuž ana chiyajo mantichiž cjenami, Jesusiž paata puntu juc'anti juc'anti parlita cjissiča tjapa kjutñi žoñinacžquin. Jalla nii quintu nonžcuqui, ju'anti žoñinacaqui ajcsquichiča Jesusiž taku nonzjapa. Nižaza laanacami ajczquichiča Jesusaž čjetinta cjisjapa.

¹⁶ Jalla nižtiquiztanaqui Jesusaqui nii žoñinacžquiztan zarakžcu ana žoñinacž žejlz yokquin ojkchiča. Jalla nii yokquin Yooz Ejpžquin mayizichiča.

ZUCH ZOÑI CHJETINTA

¹⁷ Tsjii nooj niž wiruñ Jesusaqui tjajnatča. Jalla niiran fariseo cjita žoñinacaqui julzi želatča, nižaza judiuž kamañ lii tjajjiñi žoñinaca želatča. Jalla ninacaqui tjapa Galilea watjanacquiztan tjonchiča, nižaza Judeaquiztan, nižaza Jerusalenquiztan. Nižaza Jesusaqui laa žoñinaca čjetincan, Yooz azi tjeeziča.

¹⁸ Jalla nekztanaqui tsjii kjaž žoñinacaqui tsjii zuch žoñi zjijechiča tjajz zquitquiz callžcu. Iran-tižcu kjuyquiz majcz pecatča. Jesusiž yujcquiz nonzinz pecatča.

¹⁹ Pero muzpa žoñinacacaž ajcsiž cjen, ana Jesusižquin macjati atchiča. Nekztanaqui kjuya yawžcu, tsewctan kjuya pjetchiča, tejanaca apakžcu. Pjetquiztan nii zuch žoñi tsewctan kjuylichuc majcchiča tjajz zquitquiz callžcu. Kjuyltan žejlñi žoñinacž taypi nuž Jesusiž yujcquin apjatchiča.

20 Ninaca tjapa kuztan tjonchi nayžcu Jesusaqui laa žoňžquiz cjichiča:

—Jilala, jaziqui am ujnacaqui pertuntača.

21 Jalla nekztanaqui judiuž kamañ lii tjaa-jiñinacžtan fariseonacžtan kuzquiz pinsi kallantichiča, tuž cjican: “¿Ject tii žoňejo? ¿Kjažtiquiztan nižta chiijo? Yooz quintra anawalipanla tii žoňž takuqui. ¿Ject ujnaca pertunasajo? Yoozpanikazla ujnacaqui pertunñiqui”. Jalla nuž pinsichiča nii žoňinacaqui.

22 Jesusaqui persun kuzquiz ninacaž pinsita naychiča. Nekztan ninacžquiz paljaychiča, tuž cjican:

—¿Kjažtiquiztan anchuca kuz nižta pinsejo?

23 ¿Jaksilta takut pjasila chiiz cjesajo? Tii zuch žoňžquiz chiižinsjo, “Am ujnacami pertunta”, ¿cjis pjasila cjesaj? už “Tsijsna. Am tjajz zquiti aptižcu oka”, ¿nuž chiiz pjasila cjesaj?

24 Tsewctan cuchanžquita Yooz Zoňtča wejrqui. Tii muntuquiz jiliritča, ujnaca pertunjzapa. Razunal chiyuča. Jalla nii zizjapa ančhucqui tiiž chera.

Nekztanaqui zuch žoňžquiz cjichiča:

—Amquiz cjiwča, tsijsna. Am tjajz zquitinaca aptaza. Oka am kjuya. —Nuž cjican chiichiča Jesusaqui.

25 Nii orapacha nii zuch žoňiqui tsijsiča, žoňinacaž cheranpacha. Tjajz zquiti aptižcu, persun kjuya ojkchiča. Yooz honora waytican ojkchiča.

26 Jalla nižta cheržcu tjapa žoňinacaqui walja ispantichi quirchiča. Ekeksan ninacaqui Yooz

honora waytichizakazza. Nižaza ninacpora parlassizakazza:

—Tonj tjuñiqui walja ispantichucanaca cherchinčhumča.

*LEVI CJITA ZOÑIQUI JESUSIZQUIN KUZZIZ CJIS-
SICHA*

²⁷ Jalla nekztanaqui Jesusaqui ulanchičha. Jalla nuž ulanžcu tsjii Leví cjita zoñi cherchiča. Impuesto cobriñi zoñitača niiqui. Impuesto cobriñi puestuquiz julzi želatča zoñinacžquiz cobrican. Jesusaqui nii zoñžquiz cjichiča:

—Wejttanž ojkla.

²⁸ Nekztanaqui Leví cjita zoñiqui tsijtsičha. Impuesto cobriz langz apatatžcu, Jesusižtan chica ojkchiča.

²⁹ Nekztanaqui Jesusižtan pijjsta paazjapa, Leviqui persun kjuyquiz zuma čhjeri tjacziča. Čhjeri lujlcan Jesusaqui impuesto cobriñinacžtan nižaza yekja ujchiz zoñinacžtan chica julzi želatča.

³⁰ Jalla nii cheržcu, fariseo zoñinaca nižaza judiuž lii tjajjiñi maestrunaca jalla ninacaqui Jesusiž tjajjinta zoñinacžquiz chuchi kallantichiča, tuž cjican:

—¿Kjažtiquiztan impuesto cobriñinacžtanami ujchiz zoñinacžtanami čhjeri lujl ančhucjo?

³¹ Nekztanaqui Jesusaqui nuž nonžcu kjaaziča ninacžquiz, tuž cjican:

—Wiw zoñinacaqui kullñi zoñi anaž pecasača. Antiz laa zoñinacaž pecchiya.

³² Wejrqui “zumal kamuča” cjiñi zoñinacžquiziqui anal kjawzñi tjonchinča. Antiz “ujchizpanča” cjiñi zoñinacžquiz kjawzñi tjonchinča, ninaca Yoozquin kuzziz cjisjapa.

AYUNAS PUNTU

³³ Jalla nekztanaqui žoñinacaqui Jesusižquiz chi-ichiča, tuž cjican:

—Juanž tjaajintanacami fariseož tjaajintanacami walja ayunasñiča. Y nižaza ninacž cuzturumpi jaru walja Yoozquin mayiziñiča. Pero amiž tjaajinta žoñinacazti ana ayunasñipanla. ¿Kjažtiquiztan nižtajo? Chjeriž lujlžla, nižaza mazk'a kjaz licžla, nižtakazla. —Nuž cjican uj tjojtunz pecchiča nii žoñinacaqui.

³⁴ Nekztanaqui Jesusaqui ninacžquiz kjaaziča, tuž cjican:

—Zals pjižstiquiz žoñinacaž impittaž cjenaqui, ¿kjažt zalsñi žoñžtajapa ayunasasajo? Nii zalsñi žoñi želanpacha anaž ayunasasača.

³⁵ Tii jarquin nii zalsñi žoñiž kjañtaž cjen, jalla nekztanž ayunasasača.

³⁶ Tsjiu taku chiichizakazza, tuž cjican:

—Anaž jecmi tsjiu ew zquitquiztan riminta apakasača, tsjelanzi zquti rimintisjapa. Jalla nuž paaquiž niiqui, nii ew zquti pertisnaquiča. Nižaza nii ew riminta apjattaqui tsjel zquitquiztan tsjemata cjequiča.

³⁷ Nižaza anaž jecmi tsjiu zizzi zkiz luusquiz ew vino alznasača. Nižta alznasaž niiqui, zkiz luus wjajrskatasacha ew vinuqui. Nekztanaqui zkiz luusmi vinumi pizcpacha pertisnasača.

³⁸ Ew vinuqui ew zkiz luusquizpanž alznasača. Nekziqui zkiz luusmi vinumi zumapanž cjesača.

³⁹ Y nižaza t'amchi vinu licžcu, anaž ew vinu pecasača. “Wejtta t'amchi vinuqui walikazza”, cjican cjequiča. Nižtazakaz žoñinacaqui Yooziž tjaata ew kamaña ana pecasača.

6

TSJII JEEJZ TJUÑQUIZ WATTA

¹ Tsjii jeejz tjuñ noojiqui Jesusaqui zkal taypiranž okatča niiž tjaajinta zoñinacžtan. Jalla nuž ojkan niiž tjaajinta zoñinacaqui tric oza kja-jpchiča. Nuž kja-jpžcu kjaržtan kjojchiča. Nekztan lujlchiča.

² Nii cheržcu tsjii kjažultan fariseo zoñinacžti ninacžquiz pewcziča, tuž cjan:

—¿Kjažtiquiztan ančhucqui nižta paajo? Jeejz tjuñquiziqui nižta anapanča paazqui. Učhum lii quintrala, ¿ana jaa?

³ Nekztanaqui Jesusaqui ninacžquiz kjaaziča, tuž cjan:

—Ančhucqui Yooz taku liichinčhucpanča, ¿ana jaa? Cjijrta Yooz takuqui tuž cjiča: učhum David cjita tuqita atchi ejpqui niiž mazinacžtan čhjeri eecskatchiča.

⁴ Chjeri eeczanaqui arajpach Yooz timpluquin luzziča. Nicju Yooz yujcquiz nonžta t'antanaca želatča. Jalla nii t'anta aptižcu, lujlchiča. Nižaza niiž mazinacžquiz tojunchiča. Anapančača permitta nii t'anta lujlsqui ina zoñžlaqui. Nižta lujlžcuqui, lii quintrala niiqui. Timplu jilirinacžtapankaz nii t'anta lulaj cjitaqui.

⁵ Nižaza Jesusaqui ninacžquiz cjichiča:

—Wejrqui tsewctan cuchanžquita Yooz Zoñtča. Jeejz tjuñquizimi čhjulu paaz cjenami mantasača. —Nuž cjichiča Jesusaqui.

KJARA KJOÑCHI ZOÑI CHJETINTA

⁶ Niiž wiruñ jeejz tjuñquiziqui Jesusaqui luzziča judionacž ajcz kjuyquiz. Jalla nii ajcz kjuyquin

tjaajñi kallantichiča. Nicju tsjii zoñi želatča žew kjara kjoñchi.

⁷ Nižaza judiuž lii tjaañinacžtan, fariseonacžtan želatča. Nii zoñinacaqui Jesusaž awayt'atča, jeejz tjuñquiziqui čhjetnaqui anaž čhjetna, jaa, jalla nii. Jalla nuž awayt'atča, Jesusiž quintra nii jaru aptisjapa.

⁸ Pero Jesusaqui nižta ana wali pinsitanaca kuzquiz naychipanča. Jalla nekztanaqui kjara kjoñchi zoñžquiz paljaychiča, tuž cjican:

—Tsijsna. Tii taypiquin cjisna.

Nuž chiitiquiztanaqui nii zoñiqui nii taypiquin tsijsiča.

⁹ Nekztanaqui Jesusaqui parti zoñinacžquiz paljaychizakazza, tuž cjican:

—Wejrqui ančhucaquiz tsjii pewcsnasača. ¿Jeejz tjuñquiziqui učum liiqui kjažt cjeejo? zoñžquiz zuma paasaya uz zoñžquiz ana zuma paasaja. Zoñž wira liwriyasaya uz zoñž wira ticskatasaja. Ančhucqui zumpacha zizza, zuma paazqui učum lii jaručha jeejz tjuñquizimi. —Jalla nuž cjican, chiižinchiča Jesusaqui.

¹⁰ Jalla nekztanaqui Jesusaqui niiž muytata žejlñi zoñinacž kjutñi chercherziča. Nekztan kjara kjoñchi zoñžquiz cjichiča:

—Am kjara chjinzna.

Nii zoñiqui nuž kjara chjinžcu niiž kjara žejtchi quirchiča.

¹¹ Quintra zoñinacazti nii cheržcu walja zawjchiča Jesusiž quintra. Jalla nekztanaqui ninacpora pewcsarassiča, jaknužt Jesusiž quintra paa-as, jalla nii.

TUNCAPAN APOSTOLONACA ILLZTA

12 Niiž wiruñaquí Jesusaquí tsjii curullquin ojkchiča Yooz Ejpžquin mayizi. Ween pakara Yooz Ejpžquin mayizichiča.

13 Tjuñiž tjewctanalla, niiz tjaajinta zoñinaca kjawziča. Kjawžcu, Jesusaquí tuncapani illziča niiz mantita apostolonaca cjisjapa.

14 Nii illzta apostolunacaquí tuž cjita tjuunacchiztača: Simonatača; nižaza niiz tsjii tjuuquí Pedro cjitazakaztača. Andrestača, Simonž lajk Jacobotača. Juantača. Felipetača. Bartolometača.

15 Mateotača. Tomasatača. Jacobotača; ni-iqui Alfeo cjita zoñž majchtača. Simonatača, nižaza niiqui Canaan t'akquiztantača.

16 Judastača, Jacobž lajk; nižaza Judas Iscariotitača; jalla niiqui Jesusiž quintra tarazunchiča.

17 Jalla nekztanaquí Jesusaquí niiz illztanacžtan chjijwžquichiča curullquiztan. Pampiquin irantižcu, niiz tjaajinta zoñinacžtan tsijtsiča. Nicju wacchi zoñinaca želatča, tjapa kjuttan Judea yokquiztan, nižaza Jerusalén wajtquiztan, nižaza Tiro yokquiztan, nižaza Sidón yokquiztan, jalla nii yokanacquiztan tjonchiča. Nii zoñinacaquí Jesusiž takunaca nonzñi irantižquichiča. Yekjapanacaquí tjonchiča laanacquiztan čhjetinta cjisjapa.

18 Nižaza yekjapanacaquí tjonchiča zajranacaž tantiquiztan liwriita cjisjapa. Jalla nekztanaquí Jesusaquí ninaca čhjetinchiča.

19 Jesucristuquí čhjetinz azziztača. Nižaza Jesusaquí tjapa nii žejlñi laanaca čhjetinchiča

niiž aztan. Tjappacha laa žoñinacaqui Jesusa lanz pecatča, čhjetinta cjisjapa.

JESUSIZ TJAAJINTANACA

²⁰ Nekztanaqui Jesusaqui niiž tjaajinta žoñinacž kjutñi cherziča. Nekztan paljaychiča, tuž cji-can:

—Ančhucqui porinaca, Yooz mantita zuma kamañauqui ančhucaltajapača. Jalla nižtiquiztan cuntintuž cjee.

²¹ ‘Chjeri eecsñinaca, wiruñ Yoozqui ančhucaquiz wali cjiskataquiča, tsjii čhjeržtan chjekchižtakaz. Jalla nižtiquiztan cuntintuž cjee.

‘Llaquitanaca, anžic ančhuc kaačan. Wiruñauqui ananiiž chipchipaquiča. Jalla nižtiquiztan cuntintuž cjee.

²²⁻²³ ‘Ančhucqui, Yooz Majchquin sirwiñi žoñinacčhucča. Quintra žoñinacaqui ančhucaquiz chjaawjkatča. Nižaza jakurpayaquiča. Nižazaž ch'aanaquiča. Nižaza iñaraquiča. Ančhucaquiz ana zumapanž nayaquiča. Jalla nuž cjenami ancha cuntintuž cjee. Ančhuczti arajpachquin ojžcu, wali kamañ wira tanznaquiča, tsjii chawc premiužtakaz. Nižtapan tuquitanpacha tii žoñinacž tuquita atchi ejpnacaqui Yooz sirwiñi profetanacžquiz chjaawjkatñipantača. Jalla nižtiquiztan anžiqui cuntintuž cjee.

²⁴ ‘Ančhucqui ricachunaca, cuntintukaz tii wirquiz kamchinčhucča. ¡Wiruñ anawalipanž ančhucaquiz wataquiča!

²⁵ ‘Ančhucqui zuma cusasanacchiz kamchinaca, porižtakaz cjisnaquiča. Yoozquin ana cjuñziž cjen t'akjiriž cjisnaquiča. Ana

walinacquiztan chipchinaca tsjii noojiqui ananiiz kaaquiĉha niĉaza llaquitaĉ cjequiĉha.

²⁶ 'Anĉucqui, Yooz taku chiitaĉoka cjiĉi zoninacĉucĉha. Tjapa ŉoĉinacaqui anĉuca honora waytaquiĉ niiqui anĉucaquiz juc'ant anawaliĉ cjequiĉha. Tuquitanpacha tii ŉoĉinacĉ tuquita atĉi ejpnacaqui niĉtapan honora waytichiĉha toscara chiĉiĉiĉinacĉquiz.

QUINTRA ZOĉINACĉTANAMI ZUMA KUZZIZ-PANĉ CJEE

²⁷ 'Anĉucqui, wejt taku nonzĉinaca, anĉucaquiz tuĉ cjiwĉha: Anĉuca quintra ŉoĉinacĉtanami zuma kuzzizpanĉ cjee. Y niĉaza zumapanĉ ninacĉtan paa, niĉaza anĉuca ĉjwajkatĉinacĉtanami zumapanĉ cjee.

²⁸ Niĉaza anĉuca quintra laykiĉi ŉoĉinacĉquiz zuma tawkĉtan paljaya anĉucqui. Niĉaza anĉuc iĉariĉi ŉoĉinacĉtajapa zuma tawkĉtan Yoozquin mayt'izina.

²⁹ Jakziltamiĉ am yujcquiz kichasaĉ niiqui, ana niĉtapacha amqui kicha. Anaĉha cutjatzi. Niĉaza jakziltamiĉ am ira kjaĉasaĉ niiqui, nii kjaĉaj cjee.

³⁰ Niĉaza jakziltamiĉ amquiztan mayi tjonasaĉha, nuĉ tjaa. Jakziltamiĉ amquiztan kjaĉasaĉha, nuĉ kjaĉaj cjee. Anam amqui quijasaĉha.

³¹ Jaknuĉt anĉucqui parti ŉoĉinaca anĉucatan zuma kamz pecĉhaj niiqui, jalla niĉtapacha anĉucqui ŉoĉinacĉtan zuma kama.

³² 'Yekjapanacaqui anĉucatan zumaĉ munaziĉha. Anĉucqui ninacĉtan alajapankaz

zuma munazaquiž niiqui, ¿kjažtiquiztan ančhucqui “Zumal paa-uča” cjian chiyasajo? Nižta iratazakaz paača anawal kuzziz Zoñinacami.

³³ Yekjapanacaqui ančhucacqui yanapča. Ančhucqui ninacžtan alajapankaz yanapaquiž niiqui, ¿kjažtiquiztan ančhucqui “Zumal paa-uča” cjian chiyasajo? Nižta iratazakaz paača anawal kuzziz zoñinacami.

³⁴ Yekjapanacaqui ančhucacqui onza. Ančhucqui ninacžtan alajapankaz onznaquiž niiqui, ¿kjažtiquiztan ančhucqui “Zumal onznuča” cjian chiyasajo? Nižta irata zakaz paača anawal kuzziz zoñinacami. Nekžtan tsjii onžñizakaz tjewza.

³⁵ Pero ančhucqui quintra zoñinacžtanami zuma munazizpanž waquiziča. Nižaza ančhucqui quintra zoñinacžquizimi yanapž panž waquiziča. Nižaza ančhucqui onžcumi anaž tjewz waquiziča “Niimiž onž, jaa” cjanaqui. Jalla nuž kamtiquiztanaqui Yoozqui ančhucacqui tsjii pajk honora tjaaquiča. Nižaza nuž kamtiquiztan ančhucqui tjeeža werar arajpach Yooz maatinacaž, nii. Nižaza nuž kamcanaqui Yooz irataž kamča. Yoozqui okžñizakazza quintra zoñinacžquiziqui.

³⁶ Yooz Ejpqui walja okžñipanča. Nižta irata ančhucqui okžñi kuzziz cjee.

ZUMA KAMAQUICHA

³⁷ Ančhucacqui anača zoñinacž uj paatanaca chii chiizqui. Jalla nuž žoninacž uj paatanaca chii chiyaquiž niiqui ančhucqui juc'ant ujchiz cjequiča Yooz yujcquiziqui. Nižaza

žoñinacžquizimi “Amqui Yooziž castictaj cjila”, cjican chiyaquiž niiqui anchucqui Yooziž casticta zakaz cjequiča. Nižaza jakzilta žoñit ančuca quintra uj paačhaja, jalla nižquiz pertunz waquiziča. Nekztan Yoozqui ančucaquiz ujnaca zakaz pertunaquiča.

³⁸ Ančhucqui okzñi kuzziz žoñinacžquizimi tjaa. Jalla nuž tjaaan Yoozqui ančucaquiz juc'anti tjaaquiča. Jalla tuž Yoozqui tjaaquiča. Ančuca quelzquiz chjijpi tjaaquiča. Tsajtscu tsajtscu nižaza walja kala ts'aczcju tjaaquiča. Jakziltat tuptalla tjaačhaja, jalla nižquiz nuž tuptalla zakaz Yoozqui tjaaquiča. Nižaza jakziltat čhuñi kuzziz tjaačhaja, jalla nižquiz nuž čhuñi zakaz Yoozqui tjaaquiča.

³⁹ Jesusaqui tsjii takunacžtan chiichiča, tuž cjican:

—¿Jaknužt zur žoñiqui yekja zur žoñi irpiñižtakaz zuma chjichasajo? Pucultanpachaž ojtquiz tjojtsnasača. Jalla nižtaž ana zuma cjcjini žoñinacaqui.

⁴⁰ Tsjiilla cjesača. Tsjii tjaaajinta žoñiqui niž tjaaajiñižquiztan anaž juc'anti cjesača, aunquimi istutiižcu tjaaajiñi maestrupanikaz cjequiča. — Jalla nuž tjaaajinchiča Jesusaqui.

UJ PUNTUQUIZTAN

Nižaza Jesusaqui tjaaajinchiča, tuž cjican:

⁴¹ —Amqui am jilž čhujcquiz tsjii cjujchilla cherasaž niiqui, ¿kjažtiquiztan am persun čhujcquiz pajk cjujchi ana cherjo?

⁴² Am persun čhujcquiz nii pajk cjujchi ana cherasaž niiqui, ¿kjažtiquiztan am jilžquiz

chiijo, “Jila, am ĉhjujczquiztan nii cjujchilla apakžinaĉha”, cjicanajo? Ana zum žoňiĉha amqui. Primeruqui am persun ĉhjujczquiztan pajk cjujchi apakalla. Nekztan zuma cherasaĉha. Y nižaza am jilž ĉhjujczquiztan cjujchilla apakasaĉha. —Jalla nuž tjaajinĉiĉha Jesusaqui uj puntuquiztan.

ZOŇINACAQUI PAJTAZ CJESACHA NINACZ KAMTIQUIZTAN

⁴³ Nižaza žoňinacž kamaň puntuquiztan Jesusaqui tjaajinĉiĉha tuž cjican:

—Tsjii zum muntiquiztan ana zum frutanaca anawira pookasaĉha. Nižaza tsjii ana zum muntiquiztan zum frutanaca anazakaz pookasaĉha.

⁴⁴ Nižaza zapa muntinaca niž frutanacquiztan pajza. Jalla nižtiquiztan tsjii ch'ap muntiquiztan higo fruta anaž pooki atasāĉha. Nižaza tsjii ch'ap muntiquiztan uwas fruta anaž pooki atasāĉha.

⁴⁵ Tsjii zuma kuzziz žoňiqui zuma takunaca paljayňipanĉha. Tsjii ana zuma kuzziz žoňizti ana zuma takunaca paljayňipanĉha. Jaknužt kuzquiz pinsiĉhaja, jalla nuž ĉiiĉha žoňinacami.

⁴⁶ Jesusaqui cjichizakazza:

—Anĉhucqui anaž weriž ĉiitacama kamĉha. Jaziqui, ĉkjažtiquiztan anĉhucqui wejt tjuu aynakjo, wilta wiltajo, “Wejt Jiliri, wejt Jiliri”, cjicanajo?

⁴⁷ Yekjap žoňinacazti wejtquin tjonžcu wejt takunaca tjapa kuz nonža Nižaza weriž ĉiitacamaž kamĉha. Jalla tižtaž nii žoňiqui.

⁴⁸ Jalla nii žoňiqui kjuya kjuyĉiĉha. Primeruqui yoka jwetchiĉha, maz zalzjapa. Nii mazquin

zalžcu, jalla nii maz juntuč chjucziča nii kjuy simintu. Nekztan kjuya pirkichiča. Wiruñaquí tsjii puju kjaz chjippi ojkchiča, walja pjatsi. Nekztanaquí nii kjazquí ojkchiča, kjuya t'eznata. Pero anapan t'ezñi atchiča. Nii kjuyaquí maz juntuč kjuytatača.

⁴⁹ Yekjap žoñinacazti wejt taku ana tjapa kuz nonža. Nižaza weriž chiitacama anaž kamča. Jalla tižtaž nii žoñiqui. Jalla nii žoñiqui kjuyazakaz kjuychiča, ana maz simintuchiz. Wiruñaquí nižazakaz tsjii puju pjatzi, kjazquí kjuya t'ezinsjapa ojkchiča. Nekztanaquí nii kjuyaquí ezziča. K'ala kuztača. Jalla nižtaž nii ana weriž chiitacama kamñi žoñiqui.

7

TSJII CHJETINTAQUI

¹ Jesusaquí nuž paljayz žeržcuquí, Capernaum cjita watja ojkchiča.

² Nicju tsjii romano zultat jiliri želatča. Niiž ancha zuma piyunaquí ancha laatača, ticzmayatača.

³ Nii zultat jiliriqui Jesusiž quintu zizcu, tsjii kjažultan judionadž jilirinaca cuchanzquichiča, Jesusižquiz rocžcajo niž piyuna čjetnajo.

⁴ Jalla nekztanaquí mantita žoñinacaquí Jesusižquiz macjatchiča. Nekztanac ancha roct'ichiča, tuž cjican:

—Tii zultat jiliriqui ancha zumača. Jalla nižtiquiztan yanapchucapanča.

⁵ Učhum watja walja rispitičiča. Nižaza tsjii učhumž ajcz kjuya kjuykatchiča niiquí.

6-7 Nekztanaqui Jesusaqui nii rocñinacžtan ojkchiča. Kjuya žcati cjisnan, nii zultat jiliriqiu tsjii niž mazinaca cuchanžquichiča, Jesusižquiz chii, tuž cjican:

—Wejt jiliri, am yujcquizic anal waquizuča, am wejt kjuyquiz luzajo. Wejrqui persunpacha eksinča am kjuri ojkzjapa. Am ojkzqui ch'amaž cjesača. Tekztanpacha tsjii taku chiyalla. Nuž amiž chiitiquiztanac žetaquiča wejt piyunaqui.

8 Wejrmi wejt jiliriž mantitacama ojklayiñča. Nižaza wejt zultatunacaqui weriž mantitacama ojklayniča. Jaziqiu tsjiimil mantuča, “Oka” cjican. Nekztan ojkča. Nižaza tsjiimil kjawznuča. Nekztanac tjonča. Nižaza tsjiimil mantuča, “Tižta paa” cjican. Niimi zakaz paača. Nižtazakaz amqui mantasača, wejt piyuna žetajo.

9 Jalla nižta taku nonžcu, Jesusaqui, chiichiča:

—Cusapahaž chiiča nii žoñiqui, —cjican.

Nekztanaqui apsni žoñinacž kjutni chersiča. Cheržcu tuž cjichiča:

—Chekapan tii žoñiqui juc'ant
Yoozquin kuzzizza tjapa Israel wajtchiz
žoñinacžquiztanami.

10 Nii jiliriž cuchanta žoñinacaqui jilirž kjuya irantižcu chekapan laa piyuna žejtchi zalchiča.

TSJII ZOÑI JACATATCHI

11 Wiruñaquei Jesusaqui tsjii Naín cjita watja ojkchiča, niž tjaajinta žoñinacžtan nižaza tama žoñinacžtan.

12 Wajt žcati irantižcu, tsjii alma callni cherchiča. Jalla nii ticziqiu zinta maatitača. Niž

maaqui žewtača. Walja nii wajtchiz žoñinacaqui cumpañtatča.

¹³ Cheržcu, Jesucristu Jiliriqui naa maatak žonaquiz okziča, tuž cjican:

—Ana kaa amqui.

¹⁴ Nekztanaqui Jesusaqui žcatžinchiča. Almiž cajuna lanziča. Alma callñinacaqui nužquiz tsi-jtsiča. Nekztanaqui Jesusaqui ticzi žoñžquiz cjichiča:

—Jilala, amquiz cjiwča, “Zaažna”.

¹⁵ Jalla nii chiitiquiztanaqui nii ticzi žoñiqui žaaziča. Nekztanac chii kallantichiča. Nekztanaqui Jesusaqui niž maaquiz intirjichiča.

¹⁶ Jalla nuž cheržcu, tjappacha tsucchiča. Nižaza tjappacha Yoozquin honora waytichiča, tuž cjican:

—Učhum wajtquizpacha tsjii chawc Yooziž cuchanžquita žoñiqui jecsila, oré. Yoozqui niž wajtchiz žoñinaca yanapi tjonchiča.

¹⁷ Jalla nekztanaqui tjapa Judea yokaran nižaza nii yok tjiyaran Jesusiž zuma paata quintu ojkchiča.

JUAN BAUTISTAQUI JESUCRISTUZ PUNTU ZIZ PECCHICHA

¹⁸ Juan Bautistaž tjaažinta žoñinacaqui nii žoñi jacatatchi quintu quint'ichiča Juanžquiz. Jalla nižtiquiztan Juanqui Jesusiž quintu zizzizakazza. Nekztanaqui pucultan niž tjaažintanaca kjawziča.

¹⁹ Nekztan Jesusižquin cuchanžquichiča, nižquin pewcznajo, tuž cjican:

—Cristuqui tjonitaž cjila. ¿Amqui Yoozquiz-tan cuchanžquita Cristumpankaya; uz yekjaž tjonasaj?

²⁰ Juanž cuchanta žoñinacaqui Jesusižquin žcatžinchiča. Jalla nekztanaqui irantižcu, cjichiča:

—Juan Bautistaqui wejrnacž cuchanžquiča amquiz pewcznajo: “Cristuqui tjonitaž cjila. ¿Amqui nii Cristumkaya, uj yekjaž tjonasaj?”

²¹ Nii orapacha nuž irantitiquiztan Jesusaqui walja žejlñi laanaca čhjetinchiča. Nižaza zajraž tanta žoñinaca čhjetinchiča. Nižaza zur žoñinacž čhjujqui čhjetinchiča.

²² Jalla nekztanaqui Jesusaqui ninacžquiz kjaaziča, tuž cjican:

—Juanžquin quepa. Amiž chertanaca nonžtanaca quint'ižca. Weriž paatanaca mazca. Zur žoñinaca chertzñi cjissila. Nižaza coj žoñinaca zuma kjojchchiz ojklayñi cjissila. Nižaza mojkchi janchichiz žoñinacami zuma janchichiz žejtči cjissila. Nižaza oñ žoñinacami nonžñi cjissila. Nižaza ticzi žoñinaca jacatatchi cjissila. Nižaza pori žoñinacžquiz Yooz liwriiñi taku paljaytapanča.

²³ Jakziltat weriž paatanaca, chiitanaca nonžcu ana kuz turwayzižlaj niiqui, walipanikaz cjequiča.

JUAN BAUTISTAZ PUNTU

²⁴ Juanž cuchanžquita žoñinacaž ojktan, Jesusaqui Juanž puntuquiztan chiichiča. Tjapa žoñinacžquiz tuž cjichiča:

—¿Chjulu ch'ekti yokquin chertzni ojkchinčhuctaya? ¿Tsjii tjamiž tjizinta kalu chertzni ojkchinčhuctaya? Anapanž jaz.

²⁵ ¿Tsjii finu zquitichiz žoñi chertzni ojkchinčhuctaya? Anapanž, jaz. Finu zquitichiz žoñinaca chawc jilirž kjuyquiz žejlča. Nižaza wali jiru kamni cusasanacchiz žoñinaca chawc jilirž kjuyquiz žejlča.

²⁶ Nekztanac, ¿chjulu chertzni ojkchinčhuctajo? Yooz taku paljayni profeta chertzni ojkchinčhucča. Nužupancha. Juanqui Yooz yujcquiz juc'antiča parti Yooz taku paljayni profetanacžquiztanaqui.

²⁷ Juanž puntuquiztan Yooz tawk libruquiz cjiir-tača tuž cjan:

“Yooz Ejpqui tsjii žoñi cuchanžcaquiča ima Cristuž Yooz taku paljayi ojklayan. Nii žoñiqui Israel žoñinacžquiz Cristo zuma tjewskataquiča”.

²⁸ Juan Bautistača parti žoñž maatiquiztan tsjan juc'antiqui. Pero tjapa Yoozquin kuzziz žoñimi Yooz maati cjequiča. Chjul Yooz maatimi žoñž maatiquiztan tsjaa juc'antiča. —Jalla nuž cjichiča Jesucristuqui.

²⁹ Jalla nuž nonžcuqui tjapa Juanž bautistaž žoñinacami cjichiča:

—Zumapanča Yooz Ejpqui, —cjicanaqui. Nužuzakaz cjichiča impuesto cobriñi žoñinacami, Juanž bautista cjicanaqui.

³⁰ Pero fariseo žoñinacasti judiož lii tjaa-jiñinacžtanpacha Yoozquin kuzziz puntuquiztan chiižinta ana juyzu paachiča. Nižaza Yooziž

cuchanžquita Juan Bautista ana rispitchicha. Nižtiquiztanaqui ana Juanž bautistatača.

³¹ Jesucristo Jiliriqui cjichiča:

—¿Kjažtat tii timpuquiz žejlñi žoñinacajo? ¿Ject-naca iratatajo tinacajo?

³² Ocjala irataž tiinaca, ¿ana jaa? Ocjalanacaqui palazquin uzincan niž mazinacžquiz altu tawkžtan kjaw kjawča, tuž cjan: “Wejrnacaž pincallu pjujan, ana tsajtchinčucča ančucqui. Wejrnacaž llaquita itsan, ana kaachinčucča”. Jalla nižta ocjala iratača tii timpuquiz žejlñi žoñinacaqui.

³³ ¿Kjažtiquiztan nižta iratajo? Juan Bautistaqui tjonchiča. T'anta ana lujlñitača. Vinumi ana licñitača. Jalla nižtiquiztan ančucqui chiich-inčucča: “Zajriž tantacha niiqui”, cjan.

³⁴ Wiruñaquei wejrqui tjonchinča. Čjulumi lujlchinča. Nižaza čjulumi licchinča. Jalla nižtiquiztan ančucqui wejt quintra chutča: “Walja lujlñiča licñiča tiiqui. Jalla tiipanča ujchiz žoñinacž maziquiya, nižaza impuesto cobriñinacami”. Nuž chiyiñčucča.

³⁵ Tuž zakal cjiwča: Yooz puntu zuma zizñi žoñinacaqui Yooz tjaajinta puntu tjeeža.

JESUSAQUI TSJII FARISEO ŽOÑŽ KJUYQUIN LULCHICHA

³⁶ Wiruñaquei tsjii fariseo žoñiqui Jesusa luli kjawziča. Nekztanaqui niž kjuya ojkchiča Jesusaqui. Niž kjuya irantižcu misquiz julziča lujljapa.

³⁷ Nii wajtquizpacha tsjaa ancha ujchiz maatak žonqui želatča. Jesusa luli ojkchi quintu zizcu,

fariseo žoňž kjuya irantižquichiňča alabastro cjita maz putillžtan. Nii putillaqui zuma uluraz aceiti chjijpitača.

³⁸ Nižaza naaqui ancha kaacan Jesusiž kjojch latuquiz julzinča. Jalla nekztanaqui naaža čhjujč kaj čhjojcan Jesusiž kjojcha awjzňi kallantichinča. Nekztan naaža persun charžtan Jesusiž kjojcha chjujzinčinča, zuma kjoňipacha. Nekztan Jesusiž kjojcha chjulsinča. Nekztanaqui Jesusiž kjojchquiz nii zuma uluraz aceitižtan tjajlz-inčinča.

³⁹ Jalla nuž cheržcuqui, fariseo impitňi žoňi qui persun kuzquiz pinsichiča, tuž cjican: “Tii žoňi qui ultim werar Yooz taku paljayňi žoňizlaj niiqui, tiiqui zizkalal, taa maatak žoň ancha uj payiňča, jalla nii. Taa žoňzti tiiž kjojcha zakal lanlanžla”.

¿JAKZILTAT JUC'ANTI YOOZQUIN K'AACHIŇI CJE-SAYA?

⁴⁰ Jalla nekztanaqui Jesusaqui fariseo žoňžquiz cjichiča:

—Simona, amquiz tsjii taku chiyasača.

Nekztan nii Simón cjita fariseuqui kjaaziča, tuž cjican:

—Tjaajiňi, wejtquiz chiyalla.

⁴¹ Jalla nekztanaqui Jesusaqui cjichiča:

—Tsjii pucultan žoňi qui denario cjita paaz kajatača. Tsjii žoňi qui 500 denario cjita paaz kajatača. Tsjizuňzti 50 denario kajatača.

⁴² Jalla nekztanaqui nii pucultanaqui ana wira pjojki atchiča. Nižtami ana wira pjojki atchiž cjen nii kajňi žoňi qui nii pucultan žoňinacžquiz

cjichiča: “Ančhucaž kajžta paazqui anal cobrača. Jaziqui nužquizpanikal pertunača”.

Nekztanaqui Jesusaqui fariseo žoňžquiz pewcziča, tuž cjican:

—Jaziqui kjaaznalla amqui. ¿Jakziltat nii pucultan žoňžquiztan nii ana cobriňi žoňžquiz juc'anti k'aachiňi cjesaya?

⁴³ Jalla nekztanaqui Simón cjita fariseuqui kjaaziča, tuž cjican:

—Nii pajk kaja ana cobrita žoňi qui juc'ant k'aachiňi cječhani.

Nekztanaqui Jesusaqui cjichiča:

—Razunam chiiča.

⁴⁴ Nekztanaqui naa maatak žona kjutňi cheržcu Jesusaqui Simonžquiz cjichiča:

—Wejrqui am kjuya luzquichinča. Amqui anam kjaz onanchamča, tii wejt kjojcha awjzjapa. ¿Taa maatak žon cherkay? Taa maatak žonzti persun čhujc kajližtan wejt kjojcha awjzinča. Nekztanaqui persun charžtan chjujzinča.

⁴⁵ Amqui wejtquiz anam chjulzamča. Naazti nuž luzcu wejt kjojchami chjul chjulžinčinča.

⁴⁶ Amqui wejt achquiz ana aceitimi alžinčamča. Naazti wejt kjojchquizimi zuma uluraz aceite alžinča.

⁴⁷ Jalla nižtiquiztan amquiz chiižinuča tužu. Walja naaža ujnaca pertuntiquiztan taa maatak žonqui juc'anti wejr k'ayachtiča. Jakziltat ujlliquiztan pertunta cječhaja, jalla niiqui anaž juc'anti k'ayachtiča.

⁴⁸ Jalla nekztanaqui Jesusaqui naa maatak žonaquiz cjichiča:

—Am ujnacaqui pertuntača.

⁴⁹ Nekztan parti impitta žoñinacaqui nii nonžcu ninacpora parla kallantassiča, tuž cjican:

—¿Ject tii žoñejo? Wali ujnacamiž pertunla. Ujquiztan žoñinacamiž pertunča.

⁵⁰ Jesusaqui naa maatak žonaquiz cjichiča:

—Amiž criitiquiztan jaziqui amqui liwriitača. Jaziqui cuntintum okaquiča.

8

MAATAKANACAQUI YANAPCHICHA

JESUSIZQUIZ

¹ Wiruñaquei Jesusaqui wacchi watjanacaran jochinacaran ojklaychiča. Jalla nuž ojklaycan Yooz mantita zuma kamaña, jalla nii puntu paljaychiča. Niiž tuncapan illzta apostolonaca niižtan chicapachatača.

² Nižaza tsjii kjažultan niiž čhjetinta maatakanaca cumpañtichiča, ninacžtan chica. Niiž tuquiqui nii maatakanacaqui zajraž tantatača, y nižaza conanacchiztača. Jalla nii maataquiztan tsjaaquei María Magdalena cjititača. Jalla naaquiztan pakallak zajranaca ulanchitača.

³ Nižaza tsjaa žon želatča, Juana cjiti, Chuza cjita žoñž tjuntača. Naaža lucuqui Herodes cjita jiliri yanapñi secretariotača. Nižaza tsjaa Susana cjiti žon želatča. Nižaza tsjii kjažultan iya maatakanacaqui apsñitača. Nii maatakanacaqui persun cusastan atintiñitača Jesusizquiz.

CHJACZ QUINTU

⁴ Walja žoñinacaqui watjanacquiztan Jesusa cheri ulanžquichiča. Walja žoñinacaž

nuž juntazziž cjen, Jesusaqui tsjii quintu quint'ichiča, tuž cjican:

⁵ —Tsji zkala čhjaci žoñiqui zkal čhjaqui ojkchiča. Nekztan zkal semilla wichcan wichcan čhjacciča. Čhjaccan, parti semillanacazti jiczaran tjojtsiča. Nii tjojtsi semillaqui tjecantatača, y nižaza wežlanacaž lujltatača.

⁶ Tsji parti zkal semillanacazti maz yokaran tjojtsiča. Nii tjojtsi semillanacaqui jeczcanpacha nužquiz kjoñchiča. Anaž umit yoka želatča.

⁷ Parti zkal semillanacazti ch'ap yokaran tjojtsiča. Nužuntu pakan ch'apinacakazza atipchiqui.

⁸ Parti zkal semillanacazti zum yokquiz tjojtsiča. Nekztan pajkchiča. Nuž pajkžcu, zuma čhjeri pookchiča, patac čhjerchiz zapa chjojl-luquiz. —Nuž quint'izcu Jesusaqui altu tawkžtan cjichiča:

—Jecčhalaj cjuñchiz niiqui, ž-nonžna.

⁹ Jalla nekztanaqui niž tjaajinta žoñinacaqui Jesusižquiz pewcziča:

—¿Jaknužt chii tii am takajo? —cjican pewcziča.

¹⁰ Jalla nekztanaqui Jesusaqui kjaaziča tuž cjican:

—Ančucaquiz Yoozpachaž tjaajnaquiča ančuca kuzquiz, niž mantita kamañ puntuquiztan, nii. Yekjap žoñinaczquizzti quintunacžtankaz chiyuča Yooz mantita kamaña puntuquiztan. Jalla nužquiz weriž chiita quintu nonžcuqui parti žoñinacaqui ana wira intintiñiž cjissa. Weriž chiitiquiztanaqui ana wira tantiiñiž cjissa.

11 Nekztanaqui Jesusaqui niž tjaajinta žoñinacžquiz cjichiča:

—Jalla tižta puntunacquiztanž chiiča wejt zkala čhjacz quintuqui. Yooz takuča nii zkal semillanacaqui.

12 Nii jiczaran žejlñi žoñinacaqui Yooz taku nonziča. Yooz taku nonžtanaqui, diablu cjita zajraqui tjonza, ninacž kuz turwayžinzjapa. Jalla nuž paača diabluqui, nonžni žoñinacaž Yooz taku ana criyajo, y nižaza ninacaž ana liwriita cjeyajo.

13 Nižaza nii maz yokaran žejlñi žoñinacaqui Yooz taku nonziča. Yooz taku nonžcupacha cuntintuž catokča. Pero Yoozquin tjapa kuzzizpan ana nonža. Tsjipacamakaz catokča. Čjul pruebaž tjonanami ratullaž quejpsa.

14 Nižaza nii ch'ap yokaran žejlñi žoñinacaqui Yooz taku nonziča. Yooz taku nonžcu anaž tjapa kuztan catokča. Cusasanacapankaz cherza; nižaza wali jiru kamspanž pecča; nižaza pjijs-tanacapankaz pecča. Jalla nižtiquiztan čjul ana walinaca tjontan, ninacž kuznaca turwayskatča. Persun kuzquiz pectiquiztanaqui Yooz taku tjatža. Jalla nižtiquiztan ana zuma kamasacha. Ana pookñi zkalažtakaz kamča.

15 Nii zum yokquiz žejlñi žoñinacaqui Yooz taku nonziča. Tjapa kuztan Yooz taku nonža. Tjapa kuztanž catokča. Nižaza Yooz takucama zuma kamča Yoozquin tjurt'iñi kuzziz. Jalla nižtiquiztan zuma pookñi zkalažtakaz kamča, zumapankaz kamča.

MICHA TJEEZ QUINTU

16 Jesusaqui tjaajinchiča tuž cjican:

—Anaž jecmi micha tjeeznasača cajun kjuyltan nonzjapa, už tjajz zquit koztan nonzjapa. Micha tjeez nonz juntučpanž nekzipan tewznasača kjuyquiz luzni žoñinačzquin kjanajo.

¹⁷ Chjulu čhjojžtami wažtapanikaz cjequiča. Nižaza ana Yooz puntu ziztanacami kjanapacha ziztapanikaz cjequiča.

¹⁸ Werič chiita taku zuma nonžnalla ančhucqui. Jakziltažlaj catokni kuzziz niiqui, juc'anti zuma kuz tjaataž cjequiča, Yooz taku intintajo. Jakziltažlaj ana catokni kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiñiž cjequiča, “intintuča wejrqui” čhiichiž cjenami. —Jalla nuž tjaajinčiča Jesusaqui.

JESUCRISTUZ FAMILIA PUNTU

¹⁹ Wiručaqui Jesusiž maatan niž lajknacžtan irantižquichiča, jakziquin Jesusac želatčhaja, jalla ničju. Pero nižquin ana macjati atčiča. Kjuyquiz walja žoñinaca želatča.

²⁰ Jalla nekztanaqui tsjii žoñiqui Jesusižquiz mazziča, tuž cjican:

—Am maami am jilanacami kjuy zancu žejlča. Am chertz pecča.

²¹ Jesusaqui nekztan kjaaziča, tuž cjican:

—Yooz taku nonžni žoñinacaqui y nižaza Yooz takucama kamni žoñinacaqui, ninacapanča wejt familia cuntaqui, wejt maa cuntaqui, y nižaza wejt jilanaca cuntaqui.

JESUSACHA TJAMIMI KJAZ LJOJKIMI MAN-TIÑIQUI

22 Tsjii nooj Jesusaqui niiz tjaajinta zoñinacžtan luziicha tsjii warcuquiz. Nekztanaqui tuž cjičičha:

—Tii kotž nawjktuñtanž ojklay.

23 Jalla nuž ojkan Jesusaqui tjaajičha. Nekztanaqui tiripintit wali pjursanti tjami zalčičha. Jalla nii tjamiž cjen warcuqui kjaz ljojkižtan julz-mayaž cjisnatčha, kjaz chjijpi.

24 Nekztanaqui Jesusiž tjaajinta zoñinacaqui Jesusa žinčičha, tuž cijan:

—Tjaajiñi Maestro, Tjaajiñi Maestro, kotquiz julzmayaž cjis učumqui. Ticznačan učumni. —Jalla nuž chiitiquiztanaqui Jesusaqui žaazičha. Nekztanaqui tjamžquiz nižaza kjaz ljojkiči mantičičha apaltajo. Jalla nuž mantitiquiztanaqui tjamimi kjaz ljojkiči apaltičičha. Ch'ujupan cjis-sičha. Nužquiz walikaztačha.

25 Jalla nekztanaqui Jesusaqui niiz tjaajinta zoñinacžquiz chiižinčičha, tuž cijan:

—¿Ana wejtquin kuzziz cjissinčhuckaya? —Nuž pewcztiquiztan, nii tjaajinta zoñinacžti tsucchi ispantichi cjis-sičha. Nižtiquiztan ninacpora parlassičha, tuž cijan:

—¿Ject tii žoñejo? Tjamimi kjazmi tiiž mantitacamaž ojčha, tiiž chiita takukaz caza.

TSJII ZAJRAZ TANTA ZOÑI CHJETINTA

26 Nižtami Gadara cjita yokquin irantičičha, kotž nawjktuñtan, Galilea cjita yokž nawjktuñtan.

27 Jesusa yokquiz chjijwžtan tsjii nii wajtchiz zoñiqui macjatžquičičha. Ažk watanaca zajraž tantapantakalčha nii zoñiqui. Zajraž tantiquiztan

ana zquiti cutñitakalča. Nižaza ana kjuyquizimi kamñitakalča. Campu santuran kamñitakalča.

²⁸⁻²⁹ Jesusa cheržcu, niž yujcquiz tuzi t'okziča yokquizpacha; kjawcan puct'ichiča. Nekztanaqui Jesusaqui žoñi tanñi žajra mantichiča žoñžquiztan ulnajo. Nii chiitiquiztan zajraqi kjawchiča, tuž cjican:

—Jesusa, Arajpach Yooz Maati, ¿kjažtiquiztan am wejtquiz mitisi? Am roct'uča, anaž wejr tjatnalla, anaž wejr sufriskatalla.

Tuquiqui wilta wilta zajraqi nii žoñi tanñitakalča. Nižaza nii wajtchiz žoñinacaqui zajraž tanta žoñi čejlñitakalča, y nižaza carinžtan mokñitakalča. Jalla nuž moktiquiztanami čejltiquiztanami carina kojžcu atipasñipankaztakalča. Jalla nekztan zajraqi nii žoñi ch'ekti yokaran zajt zajtskatchiča.

³⁰ Nekztanaqui Jesusaqui nii pewcziča, tuž cjican:

—¿Čhjul tjuuchizzamta?

Nii zajraqi kjaaziča:

—Tama cjitaž wejrqui, —cjican.

Tama zajranacaqui nii žoñžquiz lusñitakalča.

³¹⁻³² Zcati cururan wacchi cuchinacaqui lujlcan žejlñitakalča. Jalla nižtiquiztan zajranacaqui Jesusižquiz rocchiča, tuž cjican:

—Anaž wejr nac casticta cjejajo mantalla. Nii cuchinacžquin luzkatalla. —Jalla nuž mantiskatz pecchiča zajranacaqui. Nekztanaqui Jesusaqui nuž mantichiča.

³³ Jalla nekztanaqui nuž mantitiquiztan zajranacaqui žoñžquiztan ulanžcu cuchinacžquin

luzi ojkchiča. Cuchinacžquin luzcuqui cuchinaca tjiiranchiča tsjii k'aw kjutñi. Nekztanaqui nii cuchinacaqui kossucpacha tjojtsiča nii barranc k'awquiz. Nižaza kotquin tjojtsiča. Jalla nužquiz tjapa ticziča.

³⁴ Cuchi itzñinacaqui nii cheržcu walja tsucchi zajtchiča. Watjaran jochiran quintu quint'ican ojklaychiča.

³⁵ Nii quintu nonžcu walja žoñinacaqui ojkchiča nii paatanaca cheri. Jesusižquin irantižcu, nii zajraž tanta žoñi žejtchi cherchiča. Nii žoñiqui julzi želatča Jesusiž kjojch latuquiz, zquti cutchi. Nižaza zuma tawkchiztača, ana lucuratztakaztača. Jalla nuž cheržcu, nii cheri tjonchi žoñinacaqui nužquiz ispantichiča.

³⁶ Nii žoñi čhjetiñi cherchi žoñinacaqui quint'ichiča parti žoñinacžquiz, jaknužt Jesusaqui žoñi čhjetinčhaja, jalla nii.

³⁷ Nii quintu nonžcu, tjapa Gadara cjita yokquiz žejlñi žoñinacaqui Jesusižquiz roqui kallantichiča nawjk okajo. Nii žoñinacaqui cuchinacž pertisiž cjen waljaž eksnatča. Jalla nižtiquiztanaqui Jesusaqui tsjii warcuquiz luzziča, ojkzjapa.

³⁸ Nii zajriquiztan čhjetinta žoñiqui Jesusižquiz rocchiča, tuž cjican:

—Amtan chical ojkkatalla.

Pero Jesusaqui kjaaziča, tuž cjican:

—Tekz am žela.

³⁹ Am kjuya oka. Žoñinacžquizim amqui quint'aquiča jaknužt Yoozqui am čhjetinčhaja, jalla nii.

Nekztanaqui nii žoñiqui ojkchiča. Jalla nuž ojkžcu tjapa kjutñi watjaran quint'ichiča, jaknužt Jesusaqui nii čhjetintčhaja, jalla nii.

JESUCRISTUCHA LAA ZOŃI CHJETINŃI

⁴⁰ Jalla nekztanaqui Jesusaž kotž nawjktuñtan quejpžquitan, žejlñi žoñinacaqui tjapa kuz risi-wchiča. Tjappacha Jesusiž tjonz tjewsitača. Nekztanaqui niž tjontiquiztan cuntintutača.

⁴¹ Jalla nekztan tsjii Jairo cjita žoñiqui iran-tižquichiča; ajcz kjuy jiliritača. Nii žoñiqui Jesusiž yujcquiz puct'ichiča. Nekztanaqui rocchiča niž kjuya okajo.

⁴² Nii oraqui nii žoñž zinta majtqui ticzmay-atača. Tuncapan watchiztača naa majtqui. Nekztan Jesusaqui jilirž kjuya ojkchiča. Jesusaž okan, walja žoñinacaqui ts'acjascan apziča.

⁴³ Jalla ninacžtan juntu tsjaa laa maatak žonqui okatča. Tuncapan wata inturu ljok ojkñi laa t'akjisichintakalča. Nižaza medicunacžquiz kul-katjawi ancha castassinča, ana čhjulchiz cjissin-tača. Nuž kullkatžcumi ana wira žetatča.

⁴⁴ Nekztanaqui naa laa žonqui Jesusiž wir kjut-tan macjatchinča. Niž zquit tjiiquiz lanzinča. Nii orapacha nuž lanžcuqui žejtchinča. Nižaza ljok ojkñimi tsijtsiča.

⁴⁵ Jalla nekztanaqui Jesusaqui pewcziča, tuž cjican:

—¿Ject wejr lanzejo?

Tjappacha ninacaqui ana zizñi chiichiča, nuž pewcžtiquiztan. Jalla nuž cjen Pedruqui niž maz-inacžtan cjichiča:

—Tjaajiñi Maestro, tii zoñinaca ancha amquiz ts'acjassa, nižaza tjapa kjuttanž am tewjctewjcča. Jaziqui ¿kjažtiquiztan am nuž pewczjo, “¿Ject wejr lanzejo?” cjicanajo?

⁴⁶ Nekztanac Jesusaqui cjichiča:

—Tsjii tsjiiqui wejr lanziča. Wejr persun kuzquiz naychinča wejt aziqiu tsjii čhjetinčiča, jalla nii.

⁴⁷ Naa maatak žonqui waj nuž Jesusiž kuzquiz pajta ziztiquiztan, cjarcatcan macjatchinča. Nekztan Jesusiž kjojchquiz quillzinča. Tjapa zoñinaca želan naaqui mazzinča, nii orac lanzintaž naaqui, jalla nii. Nižaza nii lanžcu nii orapacha žejtchi quirchinča naaqui. Jalla nuž cjican mazzinča Jesusižquiz.

⁴⁸ Jalla nekztanaqui Jesusaqui cjichiča:

—Cullacalla, tjapa kuztan criichiž cjen čhjetinta cjissamča. Jaziqui cuntintum am okaquiča.

⁴⁹ Jesusaž ima naatan parla žeržnan, tsjii zoñiqui tjončiča Jairo cjita zoñž kjuyquiztan. Nii Jairuqui ajcz kjuy jiliritacha. Tjonchi zoñiqui Jairužquiz cjichiča:

—Am majtqui ticzinpanča. Anam iya tii Maestružquiz molistis waquiziča.

⁵⁰ Jalla nii takunaca nonžcuqui, Jesusaqui Jairužquiz cjichiča:

—Ana am nic kuz turwayskata. Yoozquin tjapa kuzziz cjee. Nekztan am uzqui žetaquiča.

⁵¹ Jairuž kjuya irantižcu, Jesusaqui anaž jecmi kjuyquiz luzkatchiča. Jesusižtan Pedružtan, Jacobžtan, Juanžtan, naa uza maa ejpžtan jalla ninacakaz luzkatchiča.

⁵² Nii kjuyquiz žejlñi žoñinacaqui tjappachaž kaatkalča. Nižaza naa uzaž ticziž cjen walja llaquitatakalča. Pero Jesusaqui ninacžquiz cjichiča:

—Anaž kaa. Taa uzqui anača ticzin, antiz taa uzqui tjajča.

⁵³ Nuž Jesusiž chiitiquiztan nii žejlñi žoñinacaqui tjassiča nii nonžcu. Ticzinpanča nuž zizziča parti žoñinacaqui.

⁵⁴ Jalla nekztanaqui Jesusaqui naa uza kjara tanzinchiča, y nižaza altu tawkžtan chiichiča, tuž cjican:

—Kolta cullacalla, žaazna.

⁵⁵ Nii orapacha wilta žejtchin cjissinča. Nižaza nii orapacha tsijsinča. Nekztan Jesusaqui mantichiča naa uzaquiz čjeri tjaaznajo.

⁵⁶ Naaža maa ejpqui nuž jacatatchiž cjen ancha ispanichiča. Nekztanaqui Jesusaqui ninacžquiz paljaychiča:

—Anaž jeczquizimi chiichiyaquiča tii čhjetinta quintu, —nuž cjichiča Jesusaqui.

9

APOSTOLUNACA CUCHANTA

¹ Jalla nekztanaqui Jesusaqui niiž tuncapan illzta apostolonaca kjawziča. Nekztan ninacžquiz mantiz azi tjaachiča, tjapaman zajranaca chjatkatzjapa, nižaza tjapaman laanaca čhjetinzjapa.

² Nižaza Jesusaqui ninacžquiz mantichiča Yooz zuma kamañ puntuquiztan paljayajo, y nižaza laa žoñinaca čhjetnajo.

³ Nižaza cjichiča:

—Ančhucqui anaž čhjulumi chjichaquiča, jiczquin ojkan. Anaza ajtsmi, anaza žak quelsmi, anaza čherimi anaza paazmi. Nižaza zinta zquitikaz chjichaquiča.

⁴ Jakzi kjuyquinami irantižcuqui nii kjuyquin alujasaquiča. Jalla nicjuž kamaquiča, nii yokquiztan ojkcama.

⁵ Yekjap wajtchiz žoñinacaqui ančhuc anaž risiwz pecaquiž niiqui, nii wajtquiztanž ulnaquiča. Nižaza ančhuca kjojchquiz zcatchi pulpunaca tsajt tsajtsnaquiča. Jalla nii tsajt tsajtstaqui siñalaž cjequiča ninacž quintra, ančhuc ana risiwchiž cjen.

⁶ Jalla nekztanaqui Jesusiž nuž taku tjaatiquiztan apostolonacaqui niž mantitacama ojkcichiča. Tjapa jochinacž kjutni ojkcichiča, liwriiñi Yooz taku paljaycan, y nižaza laanaca čhjetincan.

JUAN BAUTISTAZ PUNTU

⁷ Tsjii chawc jiliriqiu Herodes cjita želatča. Jesusiž quintu zizcu, ana čhjulumi naazipanča nii oraqui. Inakaz želatča. Jesusiž quintu nonžcu yekjapanacazti cjichiča:

—Juanqui ticziquiztan jacatatchižlani.

⁸ Yekjapanacazti chiichiča tuž cjican:

—Tiila Eliasqui; jeczquichila.

Eliás cjitaqui tuquita Yooz taku paljayni profetatača. Yekjapanacazti Jesusiž puntu chiichiča, tuž cjican:

—Tiila tsjii tuquita Yooz taku paljayni profetaqui, jacatatchila.

Jalla nuž cjenami Herodes cjita jiliriqiu inakaz cjissiča.

⁹ Nii Herodesqui tuž cjichiča:

—Wejrpanča mantichintqui, Juanž acha muržcajo. Anziqui wacchi milajru paata quintunaca nonznuča. ¿Jectpan nii milajrunaca paañejo? ¿Juanpan cjesajo?

Jalla nekztanaqui Herodesqui Jesusižtan walja zalz pecchiča.

ZOÑINACŽQUIZ CHJERI TJAAZ MILAJRU

¹⁰ Wiruñaquí Jesusiž illzta apostolonacaqui cutjatchiča. Nekztan Jesusižquiz quint'ichiča jaknužt kamtčhaja, jalla ninaca. Jalla nekztanaqui Jesusaqui ninaca chjitchiča tsjii ana žejlz yokquin, Betsaida cjita wajtž žcati.

¹¹ Nuž ojka zizcu, žoñinacaqui walja apziča. Nekztanaqui nuž apžtiquiztan Jesusaqui zuma risiwchiča. Ninacžquiz paljaychiča Yooz mantita zuma kamañ puntu. Nižaza laanaca čhjetinchiča.

¹² Zezi cjee ora Jesusiž tuncapan illzta apostolonaca nižquin macjatchiča, tuž cjican:

—Tii žoñinaca cuchna joch kjutni wajt kjutni okaj cjee; tjajz kjuya kjuržcaj cjee; nižaza lujlz čhjeri kjuržcaj cjee. Tekziqui anaž čhjulumi žejlča. Jalla nuž cuch waquiziča amqui.

¹³ Pero Jesusaqui niž illzta apostolonacžquiz chiižinchiča, tuž cjican:

—Ančhucž antiz čhjeri tjaa.

Ninacaqui kjaaziča, tuž cjican:

—Anaž wejtnacalta čhjulumi žejlča. Pjijska t'antallžtan pizc ch'izlližtan, nižtallakaz wejtnacalta žejlča. Tinacžquiz tjaažjapa anapan

wacasachá. Tinacžquiz tjaasjapa, ¿chjeri kjayi okasaya?

14 Nii žejlñi žoñinacaqui pjijska warank luc-takatačha. Nekztanaqui Jesusaqui niiz tjaajintanacžquiz cjichičha:

—Tjulžna tii žoñinacaqui pjijska tuncquiztan pjijska tunca jalla nuž t'aka t'aka tjulžna.

15 Jalla nuž niiz mantitacama paachičha. Nekztan tjappacha julzičha.

16 Nekztanaqui Jesusaqui persun kjarquiz nii pjijska t'anta nii pizc ch'iz tanzičha. Nuž tanžcu arajpach kjutñi cherzičha. Nekztan Yooz Ejpžquin sparaquiz cjichičha, jalla nii t'antiquiztan, ch'izquiztan. Jalla nekztanaqui t'unžcu niiz tjaajintanacžquiz chjalzičha, parti žoñinacžquiz tojnajo.

17 Nekztanaqui tjapa nii žoñinacaqui chjekañcama lujlchičha. Jalla nuž lujltanaqui žejtchi t'anta ch'iz t'unanaca tuncapan canasta chjijpi ricujchičha.

*JESUSACHA YOOZIZ CUCHAÑŽQUITA
CRISTUQUI*

18 Tsjii nooj ana žoñinaca želan, Jesusaqui Yooz Ejpžquin mayizatčha. Niiž tjaajinta žoñinacapantačha niiztan chicapachaqui. Jesusaqui ninacžquiz pewczičha:

—¿Jaknužt pinsi žoñinacaqui wejt puntuquiztanajo?

19 Nekztanaqui nii tjaajintanacaqui kjaazičha, tuž cjan:

—Yekjap žoñinacaqui cjičha, Juan Bautistaž amqui. Yekjapanacazti zakaz cjičha, Elías amqui.

Yekjapanacazti cjičha, tuquita Yooz taku paljayñi profetažlani jacatatchini, —jalla nuž cjičha.

²⁰ Jaziqui nekztanaqui Jesusaqui wilta pewczičha, tuž cjican:

—Ančhuczti, ¿wejt puntuquiztan kjažzaž cjeejo? Pedruqui kjaazičha, tuž cjican:

—Yooziž cuchanžquita Crustumčha amqui.

²¹ Jalla nekztanaqui Jesusaqui zumpacha niiz tjaajintanacžquiz iwjt'ichičha, ana jeczquizimi nižta maznajo.

JESUSAQUI NIIZ PERSUN TICZ MAZZICHA

²² Nižaza Jesusaqui cjichičha:

—Yooz cuchanžquita žoñtčha wejrqui. Pero walja sufristančha; nižaza wajt jilirinacami tim-plu chawc jilirinacami judiož lii tjaajiñinacami wejr ana jilirižtakaz nayaquičha. Nižaza wejr conta cjistančha. Nižaza čhjep majquiztan jacatatačha.

²³ Wiruñaquei tjapa nii žejlñi žoñinacžquiz paljay-čičha, tuž cjican:

—Jequit wejttan chica kamz pecčhaj niiqui, primiraqui persun kamañ wira tjažla. Nižaza čhjul pruebanaca watanami zapuru wejttan chicapacha cjee, aunquimi persun wirami apt'ačhani.

²⁴ Jakziltat persun kamañ wira ana tjats pecčhaj niiqui, arajpach kamañaquei ana tjaataž cjequičha. Jakziltat wejt laycu persun kamañ wira tjažnačhaja, jalla niiqui arajpachquin wiñaya kamaquičha.

25 Arajpachquin wiñaya kamañ wira pertaquiž niiqui, ¿tii muntuquiz žejlñi cusasa čhjuljapat sirwasajo?

26 Nižaza quintra žoñinacaž želan, jakziltat wejtquiztan wejt tawkquiztan ana pajñi chiyaquiž niiqui, wejrqui nižtazakal nižquiztan ana pajñi chiyača wejt mantiz timpuquiz, nekziqui. Tsjii noojiqui walja poderchiz quejpžcača wejt Yooz Ejpž aztan, nižaza wejt Yooz Ejpž anjilanacžtanpacha. Mantizjapa quejpžcača.

27 Weraral cjiwča. Tsjii žoñinaca tekz žejlcanpacha anaž ticznaquiča ima Yooz mantiz timpuquiz kallantan.

JESUSAQUI TSJEMATAZ CJISSICHA

28 Tsjii quinsakal tjuñquiztan Jesusaqui curulla yawchiča Yooz Ejpžtan parli. Nižaza čhjepultan niž illzta žoñinaca chjitchičha, Pedružtan, Jacobžtan, Juanžtan; jalla ninacaqui Jesusižtan chica ojkchiča.

29 Yooz Ejpžtan parlican, Jesusiž yujcni niž cujtta zquitimi walja llijñi kjanapanikaz cjissičha, chiwicamatača.

30 Nii orapacha pucultan luctak žoñiqui parisizquichičha, Jesusižtan parlisjapa. Nii pucultanaqui Moiestan Eliastantača.

31 Nii pucultanaqui walja chiw kjana llijñi taypquiz tjonatča. Jesusiž ticz puntu parlatča. Jerusalén wajtquiz jaknužt ticznačhaja jalla nii puntu.

32 Nii oraqui Pedružtan niž mazinacžtan ancahaž tjaji tjonkatatča pero nii cheržcu ninacž tja-

jimi zajtchiča. Jesusiž tjeežta honora cherchiča nii pucultan zoñinacaž niižtan želan. Walja chiwi llijñi kjanñi cherchiča.

³³ Pucultan zoñinacaž Jesusižquiztan zarakan, Pedruqui cjichiča:

—¡Wejt Tjaajiñi Maestro, tekz žejlzqui wali-pankazza! Jaziqúi čhjep chjujlli kjuya kjuysla, tsji-iqui amta, tsjiiqui Moísesta, tsjiiqui Eliasta, jalla nuž.

Pedruqui ana zuma tantiižcu chiichiča.

³⁴ Jalla nuž Pedruž chiyan, tsjii tsjirižtakaz macjatžquichiča. Nekztan ninacžquiz urpuntichiča. Jalla nuž urpuntitiquiztan nii čhjepultan illzta zoñinacaqui walja tsucchiča.

³⁵ Tsjirquiztan tsjii jora chiižquiñi nonziča, jalla tuž cjican:

—Jalla tiča wejt k'ayi Maatiqui. Jalla tiiž chiita taku nonžna.

³⁶ Jalla nuž nii joraž chiitan, Jesusaqui zinalla želatča. Nii čhjepultan illztanacaqui nužquiz ch'uju quirchiča. Ana jeczquizimi nii cherta puntu chiichiča.

TSJII ZAJRAZ TANTA ZOÑI CHJETINTA

³⁷ Niiž jaka tažu curquiztan chjijwžquichiča. Walja zoñinacaqui Jesusižtan zali tjonchiča.

³⁸ Nii tama zoñinacžquiztan tsjii zoñiqui altu tawkžtan paljaychiča, tuž cjican:

—Wejt Tjaajiñi Maestro, wejt zinta majch cheržinžcalla.

³⁹ Wilta wilta zajraž tantača. Nii zajraqi ančaž kjaw kjawkatča. Nižazaž t'uckatča. Atquiztan ch'utuž jupokskatča. Persun janchiž čhjojritskatča. Niižquiztan ana zarakz pecča.

40 Amiž tjaajinta žoñinacžquiz rocchinča, wejt majch čhjetžinajo. Ana atchipanča.

41 Jalla nekztanaqui Jesusaqui kjaaziča, tuž cjican:

—Tii žoñinacajay ana criiñipanča. ¡Walja ujnacchizčhucpanča ančhucjay! ¿Čhjul oracamat ančhucatan wejr želaquiya? ¿Čhjul oracamat ančuca ujquiztan wejr awantaquiya? Nižtaqui am majch zjičzcalla.

42 Nii žoñž laa majch Jesusižquiz macjatan, zabraqui yokquiz tjojtchiča. Wilita t'uckatchiča. Jalla nekztanaqui Jesusaqui zajra ujziča. Nii žoñž majch čhjetinžcu, niž persun ejpžquiz intirjichiča.

43 Nii Yooz aztan paata obra cheržcu tjapa žoñinacaqui ispantichiča. Žoñinacaž ispantichi želan, Jesusaqui niž tjaajinta žoñinacžquiz paljaychiča, tuž cjican:

44 —Tjapa kuztanž tii weriž paljayta nonžna ančhucqui. Anaž tjatzna. Wejrqui tsewctan cuchanžquita Yooz Žoñtča. Quintra žoñinacžquiz wejr intirjital tarazuntal cjeeča.

45 Jalla nuž chiyan niž tjaajinta žoñinacaqui ana intintazziča. Nižaza nii chiitaqui ana kjanzt'itatača, ninaca intintajo. Ana intintazcumi, pewcz eksnatča niž chiita taku kjana intintisjapa.

YOOZ YUJCQUIZ, ¿JECT TUCQUIN CJES?

46 Wiruñaqu niž tjaajinta žoñinacaqui ninacpora ch'aassi kallantichiča, jakziltat ninacžquiztan tucquin cjes, jalla nii.

47 Ninacž kuz pinsita zizcu Jesusaqui tsjii uza tsijtskatchičha niž latuquiz.

48 Nekztan ninacžquiz paljaychičha:

—Jequit wejt cuntiquiztan tsjii uza risiwčhaj niiqui, wejrpacha risiwčha. Nižaza jequit wejr risiwčhaja, nižaza risiwčha wejr cuchanžquiñi. Jakziltat ančhucaquiztan wirquin nayta cjičjiyačhaja, jalla niičha tucquin zuma honorchizqui.

49 Wiruñaquei Juanqui cjichičha:

—Wejt Tjaajiñi Maestro, tsjii zoñiqui am tjuu chiican zajranaca chjatkatchičha. Nii cheržcu wejrnacqui ujzinčha, “Ana nižta paa”, cjican. Nii zoñiqui anačha učumnacatan ojklayñi.

50 Pero Jesusaqui cjichičha:

—Anaž nuž atajčha, jalla. Nižta paañiqui anačha učumnacatan quintra. Jakziltažlaja ana učumnacatan quintra, jalla niiqui učum favoraž paačha.

TSJII OJKTA PUNTU

51 Jalla nekztanaqui Jesusiž arajpacha ojkz tjuñi žcatžinžcatčha. Jalla nižtiquiztan walja p'ektichičha Jerusalén watja ojkzjapa.

52 Niž tuqui zoñinaca cuchanchičha, alujamint kjuya kjuržcajo. Jalla nekztanaqui nii cuchanta žoninacaqui Samaria cjita yokquin tsjii watja macjatchičha.

53 Nii Samaria wajtchiz zoñinacazti ana kjuyquiz kjawz pecatčha Jesusaž Jerusalén watja ojkz cjen.

54 Nii quintu nonžcu Jacobžtan Juanžtan Jesusižquiz cjichičha:

—Wejt Jiliri, ¿kjažt cjes? Wejrnaçqui arajpachquiztan uj mantižquila, cjiwčha, ninaca tjatanzjapa. Jaknužt tuqui timpu Elías cjita Yooz taku paljayñi profeta paatčhaja, jalla nuž. Jalla nuž waliž cjesaž, ¿ana jaa?

⁵⁵ Jalla nuž chiitiquiztan Jesusaqui ninacaž kjutñi cherzičha. Nekztanaqui ujzičha, tuž cjican:

—Ančhuca kuzqui ana waličha. Anaž tantiyassa ančhucqui.

⁵⁶ Wejrqui tsewctan cuchanžquita Yooz Zoñtčha. Wejrqui tsewctan tjonchinčha, ujchiz žoñinaca liwriizjapa. Ana tjonchinčha ujchiz žoñinaca tjatanzjapa.

Jalla nekztanaqui yekja watja ojkcichičha.

JESUCRISTUZTAN CHICA OJKLAYZ PUNTU

⁵⁷ Jiczquiz okan, tsjii žoñiqui Jesusižquiz cjichičha:

—Wejt Jiliri, jakziquinam ojkcčhaja amqui, wejrqui chicapachal ojklayz pecučha.

⁵⁸ Nekztan Jesusaqui niižquiz kjaazičha, tuž cjican:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjajzjapami.

⁵⁹ Wiruñaquei Jesusaqui yekja žoñžquiz tuž cjichičha:

—Wejttañ chicaž ojklaya.

Nii žoñiqui kjaazičha, tuž cjican:

—Wejt Jiliri, primiraqui wejt ticzi ejp tjatznačha.

⁶⁰ Nekztan Jesusaqui kjaazičha, tuž cjican:

—Ticzižtakaz ana zuma kamañchiz kamañi žoñinacaqui, jalla ninacaj ticzinaca tjatžla. Amqui ojkla, Yooz mantita zuma kamañ puntuquiztan paljayzjapa.

⁶¹ Wiruñaquí yekja žoñiqui Jesusižquiz cjichiča:
 —Wejt Jiliri, amtan chica ojklaz pecuča. Pero primiraquí wejt familianacžquiz wejt ojklaz puntu mazinžquiz pecuča.

⁶² Nekztan Jesusaquí kjaaziča, tuž cjican:
 —Jakziltat Yooztajapa langzñi kalltičhaja, jalla niíquí tirapan Yoozta langz waquiziča, ana wir kjutñi cheržcu. Jakziltat wir kjutñi chernasaž niíquí, nižaza tuquita kamañ wirquiz quejps pecasaž niíquí, jalla niíquí anaž Yooz mantita zuma kamaña tanznasača.

10

JESUSAQUI YOOZ LANGZQUIN ŽOÑINACA CUCHANCHIČHA

¹ Jalla wiruñaquí Jesusaquí pakallak tunc žoñinaca illziča. Jalla nuž illžcu Jesusaquí niíž tuquí tjapa kjutñi pucultan pucultan cuchanchiča, jakziqint okačhaja, jalla nii.

² Ima cuchancan ninacžquiz cjichiča:
 —Tsjii puntul chiižinasacha. Zkalaquí walja žejlča. Pero zkala ajzñi žoñinacača upaquí. Yooz Ejpquí zkal Patrunača. Jalla nižtiquiztan Yooz Ejpžquiztan mayiza, zkala ajzñi žoñinaca cuchanžcajo.

—Jalla nuž paljaychiča Jesusaquí, žoñinacača zkalažtakaz.

³ Nižaza Jesusaquí niíž cuchanžquita žoñinacžquiz cjichiča:

—Ančhucquí uuzanacažtakaz cuchnuča. Tanñi kitinacaž cheechi žoñinacž taypiquin ojklayaquíča ančhucquí. Jaziqui persunpachaž cwitazaquíča.

⁴ Nižaza anaza quelsmi chjichaquiča, anaza paaz pulsami. Ana enenžcu jiczquizic okaquiča.

⁵ Tsjii kjuya luzcu, ančhucqui tsaanaquiča, tuž cjican: “Tii kjuychiz žoñinacaqui walipankaj cjila”.

⁶ Nicju zuma kamñi žoñinaca želaquiž niiqui, walipankaz cjequiča nii kjuychiz žoñinacaqui. Nižaza nii kjuyquiz zuma kamñi žoñinaca ana želaquiž niiqui, ančucaž tsaanta takuqui nužquizkaz cjequiča.

⁷ Kjuyquiztan kjuya ana ojklayaquiča. Tsjii kjuya irantižcu, nekzpachapan kamaquiča. Chjulut nii kjuychiz žoninacaqui onačhaja jalla niicž lujlnaquiča. Langzñi žoñinaca pacta cjis waquiziča.

⁸ Tsjii watja irantižcu nii wajtquiz jakziltakat ančhuc kjawžnačhaj niiqui, jalla nekziqui lujlnaquiča čhjulu onanami.

⁹ Nižaza nekz žejlñi laanaca čhjetnaquiča. Nižaza paljayaquiča, tuž cjican: “Yooz mantita zuma kamaña ančucaquiz žcatžinžquiča”.

¹⁰⁻¹¹ Nižaza tsjii wajtquiz irantižcuqui, jalla nii wajtquiz anaž ančhuc kjawznaquiž niiqui, calli kjutñiž ulnaquiča, nii wajt žoñinaczquiz tuž cjican: “Tii wajt pulpu wejtnaca kjojchquiz zcatchipan cjen, jalla tii wajt pulpu tjappacha tsajt tsajtsnača. Jalla tii tsajtstaqui siñalaž cjequiča ančuca quintrā. Pero ančhucqui tuž zizla, Yooz mantita zuma kamaña ančucaquiz žcatžinžquichitača”. Jalla nuž chiižcuqui, nii ana ančhuc kjawzñi wajtquiztan okaquiča.

¹² Wejr cjiwča ančucaquiz; casticz tjuñquiziqui nii wajtchiz žoñinacaqui juc'anti castictaž cjequiča, nii tuquita Sodoma cjita

wajtchiz žoñinacžquiztanaqui.

*YOOZQUIN ANA JUYZU PAAÑI ZOÑINACŽ
PUNTU*

¹³ ¡Corazín wajtchiz žoñinaca, ančhucaquiz anawaliž wataquiča! ¡Nižaza Betsaida wajtchiz žoñinaca, ančhucaquiz anawaliž wataquiča! Ančuca watjanacquiziqui walja milajrunaca paatatača. Tiro Sidón cjita watjanacquiz nii milajrunaca paataž cjitasaž niiqui, walipan nii wajtchiz žoñinacaqui werar Yoozquiz cjuñžniž cjitasača, “Ujchizpantča; pertunalla”, cjicanaqui. Nižaza ninacž uj sint'ižcu nii wajtchiz žoñinacaqui llaquita kuz kjanapacha tjeesni cjitasača, lutu zquitichiz cujtžcu, nižaza achquiz kjupžtan tjajlžcu, jalla nuž.

¹⁴ Jalla nižtiquiztan ančhucqui casticu tjaz tjuñquiziqui juc'anti castictaž cjequiča nii Tiro Sidón cjita watjanacchiz žoñinacžquiztanaqui.

¹⁵ Capernaum wajtchiz žoñinaca, ¿kjažtiquiztan ančhucqui pinsejo, “Yoozqui učum honorchiz cjiskataquiča”, cjicanjo? Anaž nuž cjesača. Pero ančhuczti kozzuc tjojttaž cjequiča infiernuquin sufrisjapa, parti ujchiz žoñinacžtan chica.

¹⁶ Nekztan Jesusaqui niž tjaajinta žoñinacžquiz tuž cjichiča:

–Jakziltat ančuca taku nonžaj niiqui, nižaza wejt takumiž nonža. Nižaza jakziltat ančuca taku ana nonz pecčhaj niiqui, nižaza wejt taku anaž nonz pecča. Nižaza jakziltat wejt taku ana nonz pecčhaj niiqui, nižaza werj cuchanžquiñi Yooz Ejp anaž nonz pecča.

CUCHANTA ZOÑINACAQUI QUEJPZQUICHICHA

¹⁷ Wiruñaquí ní pakallak cuchanta žoñinacaquí ancha cuntintu quejpžquichiča, tuž cjican:

—Wejt Jiliri, am tjuu chiižcu, am aztan zajranacami ulanskatchinča.

¹⁸ Nekztanaquí Jesusaquí ninacžquiz cjichiča:

—Jesalla, tsjii rayužtakaz Satanás cjita diabluquí arajpachquiztan tjojtsiča. Jalla nuž cherchinča.

¹⁹ Wejrquí ančucaquí wejt azi tjaažinča. Jalla nižtiquiztan ančhucquí zkorami yek'achuncami tjecznaquíž niíquí anaž kjaž cjisnasača. Nižaza ní wejt aztan tjapa quintranaca atipaqúiča.

²⁰ Zajranacaž ulantiquiztan ančhucquí anaž ancha chipchipasača. Antiz ančuca tjuunaca arajpachquin apuntiquiztan, nekztanž ančhucquí chipchipz waquiziča.

CUNTINTU ŽOÑINACA

²¹ Ní orapacha Jesusaquí ancha cuntintutača Yooz Espíritu Santuž cjen. Nekztan cjichiča:

—Yooz Tata, arajpachquinami yokquizimi ampanča wali chawc jilirimquí. Am puntunaca humilde žoñinacžquiz tjeezamča, intintajo. Pero tí muntuquíž wali estudiantinacami zizñinacami am puntunaca anaž intintazziča, čhojžtažtakaz ninacžquiziquí. Jalla nužupanča am munañpaquí, Yooz Tata. Jalla nižtiquiztan am honora waytuča.

²² Nižaza Jesusaquí cjichiča:

—Yooz Tata, tjapa amiž ziztanacami wejtquiz tjaažinchamča. Anaž jecmi wejt kuz zizza. Yooz Tata, am panikaz wejt kuz zizza. Nižaza am kuz anaž jecmi zizza. Wejr panikal zizuča. Nižaza

Yooz Tata, jakziltižquiz wejrqui am kuz zizkatz pecučhaja, jalla ninacazakaz am kuz zizaquiča.

²³ Jesusaqui niiz tjaajinta žoñinacžtan zina želatča. Ninacžquiz cheržcu cjichiča:

—Anchucqui zuma paatanaca cherch-inčucča. Jakziltat weriž paatanaca persun čhjucžtan cherchižlaja, cuntintuž cjesača.

²⁴ Wacchi tuquita Yooz taku paljayñinaca nižaza tuquita chawc jilirinaca, jalla ninacaqui weriž zuma paatanaca cherz pecatča. Pero ana cherchiča. Nižaza ninacaqui Yooz puntu takunaca nonz pecatča. Pero ana nonziča. Jaz-tankaz ančucqui tii cherchinčucča, nižaza nonzinčucča. Jaziqui cuntintuž cjee.

ZUMA KUZIZ ZOÑINACA

²⁵ Wiruñaquei tsjii judiož lii tjaajiñi žoñiqui tsjitsiča. Nekztanaqui Jesusižquiz paljaychiča, Jesusa lii quintra chiikatzjapa. Nekztan pewcziča, tuž cjican:

—Wejt Tjaajiñi Maestro, Yooztan wiñaya kamzjapa ¿chjulut paaz waquizisaya?

²⁶ Nekztanaqui Jesusaqui niizquin kjaaziča, tuž cjican:

—¿Kjaž cjjrtat učhum liiquiziya? ¿Jaknuž lichamtajo?

²⁷ Nii lii tjaajiñiqui kjaaziča, tuž cjican:

—Žoñinacžlaqui Yoozquin tjapa kuziz cjistanča. Yoozquin tjapa animužtanami sirwistanča, nižaza tjapa aztanami, nižaza tjapa pinsamintužtanami. Tjapa kuziz Yoozquin cjistanča. Nižaza jaknužt persunpachquiz

okzñamžlaja, jalla nižta okzñi kuzziz cjistančha žoñinacžquizimi, lijitum mazižtakaz.

28 Jalla nekztanaqui Jesusaqui cjichičha:

—Walikam kjaaza. Jalla nuž amiž kjaaztacama kamaquiž niiqui, Yooztan wiñayam kamaquičha.

29 Jesusiž chiitiquiztan nii lii tjaajiñiqui atipz pecatčha. Jalla nekztanaqui Jesusižquiz pewczičha, tuž cjan:

—¿Jec žoñinacžquiz wejrlaqui okstankaya?

30 Nekztanaqui Jesusaqui kjaazičha, tuž quint'ican:

—Tsjii žoñiqui Jerusalén wajtquiztan okatčha, Jericó cjita wajt kjutñi. Nuž jiczquiz okan, tsjii kjažultan tjañinacžtan zalzičha. Tjañinacaqui nii žoñi kijtchičha, nižaza tjapa niž zquitinaca niž paaznaca kjañchičha. Nekztanaqui zuma chjojricama ana žaañipacha ecchičha. Nužquiz ticzmaya želatčha.

31 Nekztan tsjii icliz jiliriqui nii jicziñpacha okatčha. Pero chjojrichta žoñi cheržcu, tsjii latu chjuužcu watchičha.

32 Niiž jarupachaqui tsjii timpluquiz sirwiñi žoñiqui nii jicziñpacha ojkchizakazza. Nižaza nii chjojrichta žoñi cheržcu, nawcjuñ zakaz chju-uzičha.

33 Jalla nekztanaqui tsjii Samaria wajtchiz žoñiqui nii jicziñpacha tjonchizakazza. Jalla nuž nii kijchta chjojrichta žoñi cheržcu, ancha okzičha.

34 Jalla nekztanaqui kijchta žoñžquiz macjatchičha. Chjojricama cheržcu kullzinchičha aceitižtan vinžtan. Nuž kullžcu chjojri jeržinchičha zumpacha. Nekztanaqui

persun aznuquiz tewžcu chjitchiĉha, tsjii alujamintuquin. Jalla nicju cwitichiĉha.

³⁵ Jaka tažuqui ima wilta jicz ojkan nii Samaria wajtchiz žoñiqui persun paaz jescu, pizc billete pacchiĉha alujamintuchiz žoñžquiz. Nekztan cjichiĉha, “Tii chjojrichta žoñi am cwitižinalla. Tii paaz ana alcansaquiž niiqui, wejrqui pjojkaĉha, quejpžcuqui”.

³⁶ Jaziqui, ĵjakziltat nii ĉhjepultiquiztan chjojrichta žoñžquiz zuma okzikaya, lijitum mazižtakazya? ĵJaknužum am tantii? Kjaaznalla.

³⁷ Jalla nekztanaqui nii lii tjaajiñiqui kjaaziĉha, tuž cjican:

—Nii oksñi žoñipanĉha zuma mazižtakazqui.

Nekztanaqui Jesusaqui cjichiĉha:

—Jaziqui oka, nužuzakaz ammi paalla.

³⁸ Jalla nekztanaqui Jesusaqui tira ojkiĉha. Ojkan tsjii wajtquin luzziĉha. Jalla nicju Marta cjiti žonqui naaža kjuyquiz Jesusa kjawzinĉha.

³⁹ Martiqui cullacchiztaĉha, María cjititaĉha. Mariiqui Jesusiž kjojch latuquiz julzinĉha, nii chiiñi nonzjapa.

⁴⁰ Martizti naaža kjuy lurañquiz kuz tjaatĉha. Nekztan Jesusižquiz macjatĉhinĉha, tuž cjican:

—Wejt Jiliri, taa cullaquiqui wejr zinallakal tii kjuya lurañnacquiz jakjurpayĉha. Ana wejr yanapĉha. ĵAnam wejtquiztan sint'iya? Am chiižinžinalla, wejr yanapajo.

⁴¹ Nekztanaqui Jesusaqui naaquiz kjaaziĉha, tuž cjican:

—Marta, Marta, kjuy lurañnacžquiz kuz tjaachiž cjen am kuzqui turwayzikalala. Jalla nižtiquiztan ancha llaquitamkalala amqui.

42 Tsjii zintallapanikaz žejlča chekanaqui. Mariiqui nii zuma illzinča. Naaqui kuz tjaača wejt taku nonzjapa. Anaž jecmi taa cullaqui wejt taku nonžtiquiztan apaki atasacha.

11

YOOZ EJPZQUIN MAYIZIZ PUNTU

¹ Tsjii nooj tsjii yokquin Jesusaqui Yooz Ejpžquin mayizatča. Nuž mayiziz žeržtanaqui niž tjaajintanacžquiztan tsjii tjaajinta žoñiqui pewcziča tuž cijan:

—Jaziqui wejt Jiliri, Yooz Ejpžquin mayiziz tjaajznalla. Jaknužt Juanqui niž tjaajinta žoñinacžquiz Yooz Ejpžquin mayiziz tjaajinchižlaja, jalla nuž.

² Nekztanaqui Jesusaqui tjaajinčiča, tuž cijan:

—Yoozquin mayizizqui tužuča:

“Učhum arajpach Yooz Ejp, am tjuuqui zuma honorchiz cijlalla. Nižaza am mantiz timpu irantižquilalla. Nižaza am munañpaj cijlalla tii yokquizimi tsewc arajpachquinami.

³ Nižaza tonjtijapa nižaza zapurutijapa čhjeriž tjaazcalla, azziz cjisjapa.

⁴ Wejrnacqui pertunchinča wejtnacaquiz ana zuma paañi žoñinaca. Jalla nižtiquiz amqui wejtnaca ujnacaž pertunalla. Nižaza čhjul anawalinacami wejtnacaquiz ana watkatalla. Antiz čhjul anawalinacquiztanami liwriyalla”.

⁵ Nekztan Jesusaqui ninacžquiz cjichizakazza:

—Tsjii žoñiqui amiguchiztača. Nii amiguqui chica aramaž kjuyquiz tjončiča, tuž cijan: “Amigo, čhjep t'antaž kajznalla.

6 Wejt kjuyquiz tsjii žoñi irantižquichiča jiczquiztan. Anaž wejttac čhjulumí žejlča nižquiz tjaazjapa”.

7 Nekztanaqui nii žoñiqui kjaaziča kjuyltan, tuž cjican: “Anaž wejr chiizina. Kjuyami zuma chawjcztacha. Nižaza wejt ocjalanacaqui ajpžquiz wejttan chicaž tjajča. Anaž žaazñi atasacha. Nekztan anal čhjulumí tjaayi atasacha”.

8 Amiguž cjenami ana tjaayi žaaz pecchiča. Pero nižtami tjaayi žaaziča, ana iya molistita cjejajo.

9 Jaziqui cjiwča, Yooz Ejpžquiztan maya, nekztan Yooz Ejpqui ž-tjaaquiča. Nižaza zuma kamaña kjurzna, nekztan wachaquiča. Nižaza kjuy chawjczquiztan t'oc t'ocžcaquiča, nekztan cjetžtaž cjequiča.

10 Mayñi žoñinacami ninacž mayta tjaataž cjequiča. Nižaza kjurñi žoñinacami nuž kjuržcu wachaquiča. Nižaza chawjczquiztan t'oc t'ocñi žoñinacžquizimi cjetžtaž cjequiča. Jalla nužuča Yooz Ejpžquin mayizizqui.

11 ¿Kjažt tsjii ejpqui ančhucporquiz t'anta mayñiž majchquiz “Tiž t'antaqui” cjican tsjii maz chjalznasajo? Anapanž nuž cjesača. Nižaza, ¿kjažt ejpqui ch'iz mayñi majchquiz “Tiž ch'izqui” cjican zkorakaz chjalznasajo? Anaž nužupan chjalznasača.

12 Nižaza ¿kjažt ejpqui wallpi ziñi mayñi majchquiz “Tiž wallpi ziñiqui” cjican yek'achunca chjalznasajo? Anaž nužupan chjalznasača.

13 Jaziqui ančhucqui ana zum kuzziz cjenami zuma cusasapanikaz tjaasača persun maatinacžquiziqui. Ancha zuma kuzziz Yooz Ejpqui

juc'ant zumanaca ančhucaquiz tjaasača. Jakzil-tat Espíritu Santo mayačhaja, jalla niižquiz araj-pach Yooz Ejpqui Espíritu Santo cuchanžcaquicha, nii mayñinacz kuzquiz.

JESUSIZ QUINTRA CHIICHICHA

¹⁴ Wiruñaquí zajraqú tsjii žoñi upa cjiskatchičha. Nekztanaquí Jesusaž nii zajra ulanzkattan, nii upa ana chiiñi žoñiqui chii kallantichičha. Nekztan nuž paatiquiztan nekž žejlñi žoñinacaquí walja ispantichičha.

¹⁵ Yekjap žoñinacaquí Jesusiž quintra chutchičha, tuž cjican:

—Tiiquí anawal žoñikalala. Zajranacz Beelzebú jilirž aztan yekja zajranaca chjatkatčha.

¹⁶ Yekjap quintra žoñinacaquí yanz pecatčha, arajpach Yooz aztan milajru paañi, ana arajpach Yooz aztan paañi, jalla nii. Yanzjapa pewczičha:

—Jaziqui arajpach milajru paala, —cjican.

¹⁷ Pero Jesusaquí ninacz kuz zizzičha. Jalla nižtiquiztan paljaychičha, tuž cjican:

—Tsjii nacionchiz žoñinacaquí t'aka t'aka cjisnaquíž niíqui, ninacaž kichassiž cjen, nii nacionaquí tjatantaž cjequičha. Nižaza tsjii famillchiz žoñinacaquí chaasaquíž niíqui, ninacaž kichassiž cjen nii familiaquí tjatantaž cjequičha.

¹⁸ Nižaza Satanás cjita zajraž partimi t'aka t'aka cjesaž niíqui, ultimu tjatantaž cjesačha. ¿Kjažt nii zajranacz azi tjurasajo? Anaž azziz cjesačha. Anapanž tjurasačha. Jaziqui ančhucquí tuž cjičha, wejrquí zajranacz Beelzebú cjita jilirž aztan yekja zajranaca chjatkatčha, jalla nuž cjičha ančhucquí.

19 Pero wejrqui anaž nužu jalla. Nonžna. Ančhuca partinacami zajranaca chjatkatñizakazza. ¿Jecž aztan ninacac chjatkatjo? ¿Beelzebú cjita zajriž aztan chjatkatjo? Anaž cjesača. Ančhuca parti žoñinacaž paatiquiztan intintiz waquiziča, zajriž aztan anapan zajranaca chjatkatasača, jalla nuž intintiz waquiziča. Jalla nižtiquiztan ančhucqui kjanapachača ana zuma razunchizqui.

20 Jaziqui ultim werara Yooz aztanpankal wejrqui zajranaca chjatkatuča. Yooz aztan chjatkattiquiztan, kjanapacha tjeeža, Yooz mantiz kamañ timpu irantižquiča, jalla nii.

21 ‘Tsjilla quint’asača. Tsjii walja armichiz žoñiqui persun kjuya walja tjurt’iñitača. Jalla nižtiquiztan kjuyquiz chjojtana segurotača.

22 Nuž armichiž cjen cuntintu želatča. Nekztanaqui tsjii tsjan tjup žoñiqui tjončiča. Armichiz žoñi atipžcu, tjapa niž armanaca kjañčiča. Nekztan tjapa niž chjojta cusasanaca kjañchizakazza. Nekztan tjup žoñiqui niž mazinacžquiz kjañta cusasanaca tojunchiča.

23 ‘Nonžna. Jakziltat ana wejt favora cječhaj niiqui, wejt quintrača. Nižaza jakziltat Yooztajapa žoñinaca ana juntjapi yanapčhaj niiqui, wejt quintra Yoozquiztan žoñinacaž wichanskatča.

ZAJRIZ PUNTU

24 Nižaza Jesusaqui cjichiča:

—Tsjii zakal quint’asacha. Tsjii zajraqui žoñžquiztan ulanžcu kjoñ yokaran ojklayčiča, jeejzjapa kjurcan. Ana jeejz watžcuqui, niž kuzquiz pinsichiča, tuž cjican: “Jaziqui wejr

quepaka jakziquiztan ulanžquitučhaja, jalla nicju”.

²⁵ Jalla nuž quejpžcu niiž ulanta žoñžquiz zalchiča. Nii žoñž kuzqui tsjii zuma pewžta kjuyažtakaztakalča, nižaza zuma žcayi azquitžta kjuyažtakaztakalča.

²⁶ Jalla nuž zaltiquiztan nii zajraqui pakallak juc'ant anawali zajranaca zjijqui ojkičiča. Ninaca zjičcu, tjapa nii zajranacaqui žoñž kuzquiz luzičiča. Jalla nižtiquiztan nii žoñiqui juc'ant anawaliž cjissiča tuquita kamzquiztan, tsjan ana zuma.

²⁷ Jesusaž nuž quint'an, tsjaa maatak žonqui nii žejlñi žoñinacžquiztan altu joržtan paljayčiča, tuž cjican:

—Honorchiz cjila am matiñ maaqui, am jwess-inž cjen.

²⁸ Nekztanaqui Jesusaqui cjichiča:

—Juc'ant honorchiz cjila Yooz taku nonžñinaca. Nižaza Yooz tawk jaru kamñinaca.

ZOÑINACAQUI SIÑALA CHERZKAZ PECATCHA

²⁹ Tsjan tsjan žoñinacaqui Jesusiž muytataž ajcz-natča. Nekztanaqui Jesusaqui paljayi kallan-tičiča, tuž cjican:

—Jazta timpu žoñinacaqui ana zum kuzzizza. Milajru siñala paañipankaz pecča. Tuqui timpuqui Jonás cjita žoñiqui želatča, Yooz taku paljayñi. Jalla nižta paljayzqui tsjii siñalažtakazza, Yooziž cuchanžquita cjican. Wejrzakal Yooz taku paljayuča. Anaž iya čhjul siñalami želasča tii žoñinacžtaqui.

³⁰ Yooz Ejpqui Nínive cjita wajtchiz žoñinacžquiz Jonás cjita žoñi cuchanžquichiča, casticu tjaaz tjuñi maznajo. Jalla niitača siñalaqui, nii timpuquiz kamñi žoñinacžtaqui. Nižaza Yooz Ejpqui arajpachquiztan wejr cuchanžquichiča. Jalla wejrtča siñalaqui, jazta timpuquiz kamñi žoñinacžtaqui. Anaž iya čhjul siñalami tjaataž cjequiča.

³¹ Pjalz tjuñquiziqui, jazta timpuquiz kamñi žoñinacaqui pjaltaz cjequiča, zuma, ana zuma, jalla nii. Ana zuma žoñinacaqui castictaž cjequiča. Nonžna. Tuqui timpuqui tsjaa maatak jilir želatča, wartuñtan watja mantiñ. Pjalz tjuñquiziqui naaqui jakatatžcu jazta timpuquiz kamñi žoñinacž uj kjana tjeeznaquiča, jazta žoñinaca casticta cjejajo. Naaqui muzpa ažkquiztanpacha tjonchinča Salomón cjita jiliržquiz zali, niiž zuma razun taku nonžni. Pero tekzi wejrqui želuča Salomonžquiztan tsjan chekan jiliriqui. Pero jazta timpuquiz kamñi žoñinacaqui wejt taku anaž nonz pecča. Nižtiquiztan juc'ant ujchizza, nižaza juc'ant castictaž cjequiča.

³² Nižaza pjalz tjuñquiziqui Nínive wajtchiz žoñinacaqui jacatatžcu jazta timpuquiz kamñi žoñinacž uj kjana tjeeznaquiča. Jonás cjita žoñiž Yooz taku paljaytiquiztan, nii Nínive wajtchiz žoñinacaqui Yoozquin kuzziz cjissiča. Pero tekzi wejrqui želuča Jonasquiztan tsjan chekan jiliriqui. Nižaza wejrtča tsjan chekan Yooz taku parliñtqui. Pero jazta timpuquiz kamñi žoñinacazti anal Yoozquin kuzziz cjissiča, weriž paljayta Yooz taku nonžcu. Nižtiquiztan juc'ant ujchizza.

Nižaza juc'ant castictaž cjequiča.

KJANQUIZ KAMZ QUINTU

³³ Nekztanaqui Jesusaqui quint'ichiča tuž cjan:

—Anaž jecmi tsjii lámpara tjeezcu, chjozakquiz nonznasača, nižaza anaž tsjii cajon kjuylami nonznasača. Nii lamparaqui tseecupanž tsjijpsnasača, kjuyquiz luzni žoñinacžquiz kjanajo.

³⁴ Zoñž čhjujquiqui persun kuz lamparažtakazza. Zoñž čhjujqui zumažlaj niiqui nižaza žoñž kuzmi zumazakazza, zuma kjanquiztakaz kamča. Pero žoñž čhjujqui ana zumažlaj niiqui, kuzmi ana zumazakazza, zumchiquiztakaz kamča.

³⁵ Zuma kjanquizim kamčhaj niiqui, persun kamaña zumaž cwitazaquiča, ana zumchi kamañchiz cjisjapa.

³⁶ Tsjii žoñiqui kjanquiztakaz zumapankaz kamčhaj niiqui, nižaza ana čjul ana waliquiz kamčhaj niiqui, liwj niiž kamtanaca zumaž cjequiča, jaknužt tsjii lámpara wali kjančhaja, jalla nuž.

ANA ZUM KUZIZ ZOÑINACŽ PUNTU

³⁷ Jesusaž chyan, tsjii fariseo žoñiqui Jesusa čheri luli kjawziča, niiž kjuyquin. Pucultanaqui kjuya irantižcu, kjuya luzziča. Nekztan mizquiz julziča.

³⁸ Jesusaqui kjara awjz custurumpi ana cumplichiča ima lujlcan. Jalla nii cheržcu fariseo žoñiqui ispantichiča. Jesusaqui persun kuzquiz naychiča fariseo žoñiž ispantita.

³⁹ Nekztanaqui Jesusaqui niižquiz paljaychiča, tuž cjan:

—Tsjii žoñiqui tasanaca chuwanaca zawnctankaz awjza, nižaza chjujža. Nižta iratača ančhucqui fariseonaca. Ančhucqui zawnctankaz limpuča. Pero kjuyltanaqui ančuca kuzqui walja cjujchinacchizpanča. Ančuca kuzquiz tjangz zizza, nižaza čjul anawali paazmi zizza.

⁴⁰ ¡Zumzu žoñinaca! Yoozqui curpumi kuzmi paachiča. ¿Jalla ančhucqui anaž nii zizjo?

⁴¹ Ančuca cusasanacquiztan žoñinacžquiz tjaaz waquiziča. Ančhucqui tjapa žoñinacžtan okzñi kuzziz cjesaž niiqui, ančuca kuzmi zumapanž cjesača Yooz Ejpž yujcquiziqui, ana kjara awjz cuzturumpi paažcumi.

⁴² ¡Ayii pori fariseonaca! Ančhucqui Yoozquin diezmos tjaayiñchucča, nižaza tjapa plantanacquiztanami diezmos tjaayiñchucča. Jalla nuž paacan walikazza. Pero nuž tjaacanami ančhucqui ana lijituma zuma kamañquiz kamchinčhucča, nižaza ana Yoozquin kuzzizčhucča. Zuma kamzqui, nižaza Yoozquin kuzzizqui, jalla niiča chekanaqui. Pero diezmos tjaazmi zakaz cumpliz waquiziča.

⁴³ ¡Ayii pori fariseonaca! Ajcz kjuyquiziqui tucquin julzkaz pecča, nižaza honorchizkaj cjiw cjiča ančhucqui. Nižaza ančhucqui jakzi caliranami zuma rispitchizkaž wejr tsaanja cjiča ančhucqui.

⁴⁴ ¡Ayii pori fariseonaca! Nižaza jayii pori lii tjaažiñinaca! Ana lijitum kuzzizčhucča. Ančuca liiqui cjiča jakziltat tsjii sipultur juntuñ ojkchaja

jalla niiqui Yoozquin ana macjatasach̄a. Jalla nižta irata ančhucqui žoñinacžquiz ana Yoozquin macjatskatč̄a. Pero žoñinacaqui ančhucaž puntu cjiñč̄a, “Yooz žoñinacač̄a ninacaqui”. Ančhucqui ninaca incallč̄a, ana zuma kuzziz cjen. Ančhucqui ana pajta sipulturažtakazza.

⁴⁵ Jalla nuž chiitiquiztan tsjii lii tjaajiñiqui kjaazič̄a, tuž cjan:

—Tjaajiñi Maestro, jalla nuž chiižcu, wejtnacaquiz ana zumam chiič̄a.

⁴⁶ Nekztanaqui Jesusaqui cjichič̄a:

—¡Ayii pori lii tjaajiñinaca! Ančhucqui parti žoñinacžquin niiž jaru niiž jaru ch'ama cuzturumpinaca yapchinč̄ucč̄a: kuzi cuntažtakaz jepzinč̄ucč̄a. Ch'ama cuzturumpinaca yapchiž cjenami, ančhucqui anaž tsjii loc'anžtanami yanapz pecč̄a, žoñinaca nii cuzturumpinaca cumplajo.

⁴⁷ ¡Ayii! Ančhucqui ancha t'akjirič̄a. Ančhuca tuquita atchi ejpnacaqui Yooz taku paljayñi profetanaca conchič̄a. Ančhucpacha nii paljayñinacž sipuluranaca kjuyñič̄a, niwjctanaqui ančhucqui rispittažokaz cjič̄a. Pero ančhucqui anaž ultimu rispitch̄a.

⁴⁸ Tuquiqui ančhuca ejpnacaqui nii Yooz taku paljayñinaca conchič̄a. Nuž conchi cjenami ančhucaquiztan walikazza. Anzimi ančhucqui sipuluranaca kjuyč̄a, zuma žoñižtakazza. Pero ultimquiziqui ančhucqui ninacaž paljayta Yooz taku anazakaz nonz pecč̄a.

⁴⁹ Jalla nižtiquiztan Yooz Ejpqui ančhuca puntuquiztan zuma razun taku chiichič̄a, tuž cjan: “Wejrqui wejt taku paljayñi profetanacami

apostolonacami cuchanžcača. Nekztanaqui yek-japanaca nii Yooz taku paljayñinaczquiztan contaž cjequiča. Yekjapazti kijchtaž cjequiča”.

⁵⁰ Tii muntu kalltiz, niwctanpacha Yooziž cuchanžquita žoñinaca conchiča ančuca tuquita atchi ejpnacaqui. Ančhucqui nižta ana wal kuzzizzakazza. Jaziqui Yoozqui jazta timpuquiz žejlñi žoñinaczquiz zakaz casticaquiča.

⁵¹ Tsjii Zacarías cjita žoñiqui altaržtan tim-plužtan, jalla nii taypiquiz contatača. Abel contiquiztanami Zacarías contiquiztanami nižaza tjappacha contanacquiztanami Yooz Ejpqui jazta timpuquiz žejlñi žoñinaczquiz casticaquiča.

⁵² ‘¡Ayii pori lii tjajjiñinaca! Liwriiñi Yooz taku liižcu, zizcu, žoñinaczquiz ana nii tjajjinčinčucča. Yooz taku tsjii llave irata tanzinčucča. Nii llave tanžcanpacha ančhucmi liwriiñi Yooz jiczquiz ana luzzinčucča. Y nižaza nii llave tanžcu, ana cjetžinčinčucča, liwriiñi Yooz jiczquiz žoñinaca luzajo.

⁵³ —Jalla nuž chiižinžcu Jesusaqui ojkchiča.

Nii lii tjajjiñinacztan nii fariseonacztan, jalla ninacaqui muzpa žawjchi cjissiča Jesusiž quintra. Nižaza ninacaqui Jesusižquiz wiltan wiltan pewczyča,

⁵⁴ Jesusiž quintra tsjii ujchiz jwezjapa. Jesusiž kjaaztiquiztan uj tjojtunz pecatča.

12

FARISEO ŽOÑINACA

¹ Jesusaž nuž tjaajnan, zmali wacchi žoñinacaqui tjonchiča, waranka waranka. Nižaza zmali porapat tewksascan tewksascan tjonchiča. Primeraqui Jesusaqui niž tjaajinta žoñinacžquiz paljaychiča, tuž cjican:

—Fariseo žoñinacaqui anaž ultimu Yoozquin kuzzizza. Anaž lijitum Yooz žoñinacača, aunquimi lijitum žoñižtakaz cjicjiñi cjenami. Ninacžquiztan zumpachaž cwit'azaquiča, ana ninaca irata cjisjapa.

² Tsjii noojiqui tjapa chjozakuñ paatami tježtaž cjequiča. Nižaza tjapa chjozakuñ pinsitami ziztaž cjequiča. Tsjii noojiqui žoñž ultim kuz tježtaž cjequiča.

³ Nižaza jamazit chiitanacami kjana ziztaž cjequiča. Chjozakuñ chiitanacami tjapa žoñinacaqui zizaquiča.

¿JECŽQUIN EKS WAQUIZIYA?

⁴ Jaziqui ančhucqui, wejt mazinaca, tuž wejr chiižinuča. Anača eksqui tii curpu alaja conñižquiziqui. Curpu conžcu anaž iya čhjulumu payi atasacha.

⁵ ¿Jecžquin antiz ančhucqui eks waquiziya? Yooz Ejpžquin eks waquiziča. Yooz Ejpqui žoñž curpu žeti tucuzinskatžcu žoñž animumi infiernuquin tjojtjapa azzizza. Jalla nižquizza chekanaqui eksqui.

⁶ Tsjii pjijska wežlaqui pizc paazkaz cwističa. Anača juc'ant valorchiz cjen, Yooz Ejpqui zapa wežlallami cjuñča.

⁷ Pero zapa žoñžquiz juc'anti cjuñča. Nižaza ančuca ach charami kanžintača,

zintallquiztan zintalla. Anaž ančhucqui tsuca. Nii wežlanacžquiztan ančhucča juc'ant valorchizqui. Yooz Ejpqui ančhuc juc'ant cwitaquiča wežlanacžquiztan.

JESUCRISTUZ FAVORA CJEE

⁸ 'Ančucaquiz cjiwča: Jakziltat parti zoňž yujcquiz wejt favora cječhaj niiqui, nižaza wejrqui Yooz anjilanacž yujcquiz nii zoňž favorazakal chiyača.

⁹ Jakziltat parti zoňž yujcquiz wejr ana pajñi nicačhaj niiqui, nižaza wejrqui Yooz anjilanacž yujcquiz nii zoňž quintra ana pajñi zakal cjeeča.

¹⁰ 'Jakzilta zoňit Yooz Epiž cuchanžquita Zoňž quintra chiyačhaj niiqui, pertuntaž cjesača. Pero jakzilta zoňit Yooz Espíritu Santuž quintra chiyačhaj niiqui, anapanž wira pertuntaž cjequiča.

¹¹ 'Wiruñaquei ančhucqui juezanacž yujcquin nižaza jilirinacž yujcquin chjichtaž cjequiča, ajcz kjuyquiz. Jalla nuž chjichtiquiztan ana kuz turwaysi cjequiča, jaknužt chiyačhaja, nižaza jaknužt tjurt'azalaja, jalla nii.

¹² Ančuca chiiz ora Yooz Espíritu Santuqui ančuca kuzquiz chiizjapa tjaažnaquiča, jaknužt chiizalaj, jalla nii.

CWITAZA, ZMAZŇI KUZZIZ ANA CJSJAPA

¹³ Tsjii zoňiiquei Jesusižquiz paljaychiča, tuž cji-can:

—Wejt Tjaajiñi Maestro, wejt jilžquiz chiinalla, wejt parti irinsa tjaa-ajo.

¹⁴ Nekztanaqui Jesusaqui niižquiz cjichiča:

—Jila, ¿kjažtiquiztan amqui wejr jilirižtakaz cheržjo? Anapanž wejr juez partirtqui, ančhuca quija azquitzjapaqui.

¹⁵ Nižaza Jesusaqui ninaczquiz cjichiča:

—Persun kuzquiz naazna, nižaza cwitaza ana zmazni kuzziz cjisjapa. Zoñž wira kamañiqui anaž niž wacchi cusasanacquiztan yatisinsa.

¹⁶ Jalla nekztanaqui Jesusaqui tii quintu quint'ichiča, tuž cjican:

—Tsjii ricach žoñi želatča. Nii žoñž yokquiziqui zkalanacaqui ancha cusa pookchiča.

¹⁷ Jalla nuž pooktiquiztan nii ricach žoñiqui kuzquiz pinsichiča, tuž cjican: “¿Kjažt wejr cjequejo? Wejt yaaz kjuyanacaqui tii ajzta zkal čhjeri anaž wacasača”.

¹⁸ Jalla nekztanaqui pinsichiča, tuž cjican: “Aaaa. Tuž jazic cjeeka. Wejt zkala yaaz kjuyanaca pajlznaka. Nekztanaqui tsjan pajk kjuyanaca kjuysnaka. Jalla nekz tjappach zkal čhjeri yaaznaka, nižaza tjapa wejt cusasanaca”.

¹⁹ Jalla nekztanaqui nii ricach žoñiqui niž persun kuzquiz cjichiča: “Aaaa. Wejrqui zmali cusasanaca yaazinča, nižaza zmali čhjerinaca yaazinča, ažk wata tjurñipacha. Jeejznaka, nižaza cusa lujlsnaka, licsnaka. Nižaza cuntintul cjeeka”.

²⁰ Pero Yoozqui nii žoñžquiz cjichiča, “Zumzu žoñimča amqui. Tižwanpacha amqui ticznaquiča. Am zkal čhjerimi am cusasanacami nii yaasztanacami inamayaz cjequiča, ¿čhjuljapat cjeequi neejo? ¿Jeczapan cjeequi neejo?”

²¹ Jaknužt nii ricach žoñžquiz watchižlaja, jalla nižta irataž wataquiča persunjapapankaz

cusasa juntjapñi žoñinacžquiziqui. Nižta žoñinacaqui Yooz yujcquiziqui poripanž cjisnaquiča.

*YOOZ EJPQUI NIIZQUIN KUZIZ ŽOÑINACA
CWITICHA*

²² Jalla nekztanaqui Jesusaqui niž tjaajinta žoñinacžquiz cjichiča:

—Ančucaquiz tuž cjiwča. Žoñiqui žejtzjapaqui lujlz čhjeri pecča. Jalla nuž cjenami, ančhucqui anača čhjerinacžquiz kuzqui llaquizizkatzqui. Nižaza žoñiqui curpu wali cjisjapa zquiti pecča. Jalla nuž cjenami ančhucqui anača zquitinacžquiz kuzqui llaquizizkatzqui.

²³ Žoñž žetiqui čhjerquiztan juc'anti importiča. Nižaza persun curpumi zquitquiztan ju'canti importiča.

²⁴ Wežlanacžquiz cherna. Anaž zkalami čhjaccča. Nižaza anaž ajza. Nižaza ana čhjeri yaaz quetallchizza. Nižaza ana čhjeri yaaz kjuychizza. Jalla nuž cjenami nii wežlanacžtaqui lujlz čhjerinacami panž žejlča. Yooz Ejpkaz čhjeri tjaača. Pero ančhucqui Yooz yujcquiziqui wežlanacžquiztan juc'antiž importiča. Jaziqui ančucaquiz zakaz Yoozqui lujlz čhjeri tjaaquiča, žejtzjapaqui.

²⁵ Anaž jec kolta žoñimi persunpacha tsjan lajcha paki atasača, llaquiziñi kuziz cjenami anča lajcha pecñi kuziz cjenami.

²⁶ Jalla nižta ana atčucažlaj niiqui, žkjažtiquiztan lujlz čhjerinacžquizimi zquiti-nacžquizimi ančuca kuzqui llaquizizkatjo?

²⁷ Plantanacž pjakallaž chertzna. Anaž langza. Anaž kawanča. Yoozqui nii pjakallanacž pjakkatča. Zmali finu zquiti cujtžcumi anaž jecmi pjakallquiztanami juc'ant c'achalla cjesača. Nižaza finu zquiti cujtžcumi nii ancha ricachu Salomón jiliriqi anača pjakallquiztan juc'ant c'achaqi.

²⁸ Plantanacaqui tsjii upacamakaz c'achallača. Nekztanaqui jakatažu kattažu tsjii jurnuquiz tjutjunzjapa ujžtača. Jalla nuž cjenami Yooz Ejpkaz nii plantanacami nižta cwitiča. Ančhucča Yoozquin ana tjapa kuzziz žoñinaca. Ančhuczi Yooz yujcquiziqui čjul plantaquiztanami juc'antiž importiča. Jalla nižtiquiztan Yoozqui ančhuc juc'anti cwitiča; zquitchiz panž cjequiča.

²⁹ Jalla nižtiquiztan ančhucqui ana ancha llaquiziñi kuzziz ojklaya, čjul čjери kjurzquiztanami.

³⁰ Tii muntuquiz ana Yoozquin criichi žoñinacaqui ancha llaquiziñi kuzziz ojklayča nižta cusasanaca kjurcan. Ančhucqui anača nižta llaquiziñi kuzziz ojklayzqui. Werar Yooz Ejpchizčhucča. Yooz Ejpqui zizza, čjulut ančhuc pecčhaj, jalla nii. Ančhucqui čjери, zquiti, cusasanaca pecča, zejtzjapa, jalla nii zizza Yooz Ejpqui.

³¹ Nižtiquiztan ančhucqui Yooz Ejpžquinpankaz walja kuzziz cjee. Nižaza niž mantita zuma kamañquiz kuzziz cjee. Nekztanaqui Yooz Ejpqui ančhucquiz čjulumi cawalikaz tjaaquiča.

ARAJPACHQUIN CUSASANACCHIZ ZOÑINACA

³² Nižaza Yooz Ejpqui ančuca uchaquiča mantiñi puestuquiz. Jalla nužuča Yooz munañpaqui. Tii muntuquiz žejlcan anaž eksna, ančhucqui wejt uuzanacčhucča, aunqui koluculami.

³³ Ančuca cusasa žejlñinaca tuysna. Nekztan t'akjiri kamñi žoñinacžquiz tojna. Tii muntuquiz žejlcan jaknužt ančucaqui zuma žak quels tjaczaja, jalla nižta irata zuma munaziñi kuz tjacz waquiziča wiñaya zuma kamzjapa. Arajpachquin zuma cuntintu kamzjapa, ančuca kuz tjaczna, zuma azquicha. Tii muntuquiziqui tjañ žoñiqui ančuca cusasanaca kjañasača. Arajpachquin tjañ žoñinaca ana luzasača. Nižaza tekziqui tjujtami cjurimi ančuca zquitinaca lulasača. Arajpachquin tjujtami cjurimi ana želasača.

³⁴ Jakziltat tii muntuquiz walja cusasanachizlaja, tii muntuquiz kamañ wirquiz kuz tjaača. Pero jakziltat arajpachquin kamañ wirquiz kuz tjaačhaja jalla niiqui arajpachquin walja cusasanacchiz cjequiča.

KUZ TJACZI CJEE

³⁵ Nižaza Jesusaqui tii quintu quint'ichiča, tuž cjican:

—Arajpachquin ojkzjapa ančhucqui kuz zuma tjaczi tjewžna, tsjii tjeežta lamaparažtakaz.

³⁶ Tižtažtakaz cjee. Tsjii patrunaqui zalsñi pjjjstiquin ojkchiča. Piyunanacaqui patrunž cuttižquiz tjewža, niž irantižquitan kjuy zan chawjcz cjetžinzjapa. Jalla nižta irata ančhucqui Yooz tjonz tjuñi zuma tjewžna.

37 Weraral cjiwčha. Patrunaž tjonz oraqui jakzilta piyunanacat tjaji wajtsi tjewznačhaja, jalla ninacaqui cuntintuž cjee. Jalla nii piyunanacaqui patrunž misquiz julskattaž cjequiča. Nekztanaqui nii patrunapachaž čhjeri tjaaquiča, nižaza ninacžquiz atintaquiča. Jalla nižta irata Yoozqui paaquiča niž tjonz tjewzñinacžquiz.

38 Chica aramami, kjantatimi, čhjulorakat nii patrunaqui irantižquičhani. Nii oraqui jakzilta piyunanacat tjaji wajtsi tjewz tjewznačhaja, cuntintuž cjequiča.

39 Tsjilla zakaz cjiwčha, ančhucaž zizjapa. Tsjii kjuychiz žoñiqui čhjulorat tjañi tjonačhaja, jalla nii ora zizaquiž niiqui, tjaji wajtsipan tjewznaquiča, nii tjañi ana luzkatzjapa, nižaza ana tjangskatzjapa. Tjañi tjonz ora zizcu, anapan niž kjuya nužkaz ecasača.

40 Ančhucmi nižaza Yooz tjonz tjuñi walja listu tjacziž tjewžna. Tiripintit tsjii ana pinsita oraqui wejrqui quejpžcača. Wejrtča tsewctan cuchanžquita Yooz Zoñtqui.

PIZC PUNTA PIYUNANACA

41 Jalla nekztanaqui Pedruqui Jesusižquiz pewcziča, tuž cjican:

—Wejt Jiliri, ¿tii quintu quint'ichamčha wejt-nacaltajapakazkaya? už ¿tjapa žoñinacžtajapa, jaa?

42 Jesús Jiliriqui kjaaziča, tuž cjican:

—Tsjii kjuy cwitiñi žoñi želatča zuma cumpliñi, nižaza zuma intintiñi. Nii kjuychiz tuyñuqui zuma žoñž kjarquiz niž kjuya ecchiča, tjapa nii kjuyquiz žejlñinacžtan. Čhjeri tjaaž ora čhjeri

tjaajo, jalla nuž zakaz ecchiča nii žoňz kjarquiz. ¿Ject nii zuma cumpliňi žoňejo?

⁴³ Jalla tiiča nii žoňiqui. Kjuy tuyňu quejpsquizcama jakzilta žoňit niiž kjuya zuma cwitican žejlčhaja, jalla niiča zuma cumpliňi žoňiqui. Nižaza cuntintuž cjequiča nii zuma cwitiňi žoňiqui.

⁴⁴ Wejrqui weraral cjiwča. Kjuya tuyňuqui cumpliňi žoňz kjarquiz tjapa kjuy cusasanaca ecasača.

⁴⁵ Tsjemata cwitiňi žoňi zakaz želatča. Nii žoňiqui kuzquiz pinsichiča, “Kjuychiz tuyňuqui anaž uri tjonasaž, jaz”, cjican pinsichiča. Jalla nekztanaqui nii kjuychiz luctaka cjiňi maataka cjiňi piyunanaca wjajtňitača. Nižaza nii žoňiqui persun lujlsquin licsquin kuz tjaachiča.

⁴⁶ Tiripintit tsjii ana pinsita nooj kjuychiz tuyňuqui quejpžquichiča. Tsjii ana zizta ora quejpžquichiča. Jalla nižtiquiztan kjuychiz tuyňuqui nii ana zuma cwitiňi žoňžquiz juc'anti anawaliz casticu tjaaquicha. Nii ana zuma žoňiqui jaknužt ujchiz žoňinacaž castictaž cječhaja, jalla nižtapacha castictaž cjequiča.

⁴⁷ Tsjii piyunaqui zumpacha niiž patrunaž pecta langz zizziča. Niiž patrunž langz zizcanpacha, ana langziča. Jalla nuž zizcanpacha, ana langztiquiztanaqui juc'anti castictaž wjajtztaž cjequiča.

⁴⁸ Nižaza jakzilta piyunat ana niiž patrunaž pecta langz zizzaja, jalla nižta cjenpacha ana cumpličhaja, jalla niiqui upa casticta cjequiča. Jakzilta žoňžquiz wacchi cusasanaca cwitajo tjaatčhaja jalla nii žoňiqui tjapa nii

cusasanacquiztan quint'istanča. Jakzilta žoňžquiz wacchi cusasanaca cwitajo cumpjiita cječhaja, jalla nii žoňiqui cusasanacchiz tuyňužquiz quint'istanča tjapa cumpjiita cusasanacquiztan.

IYA TJAAJINTA

⁴⁹ Tsjiilla zakaz quint'ichiča Jesusaqui, tuž cji-can:

—Tekz werjqui tsjii uj peksñiztakaz tjonchinča. Nii uj peks oraqui wajiž cjila.

⁵⁰ Wejrqui tsjii wali pajk prueba watača bautismužtakaz. Nižaza nii watscama, ancha llaquital cjeeča.

⁵¹ Weriz tjontiquiztan žoňinacaqui anazumquin cjequiča; t'aka t'akaž cjequiča, wejtquiz criichinaca, ana wejtquiz criichinaca, jalla nuž.

⁵² Tii timpuquiztan nawjkhuc tsjii famillanacami t'aka t'akaž cjequiča. Tsjii famillquiz pjijskaltan cječhani, čhjepultanac quintraž cjequiča pucultan žoňžjapaqui.

⁵³ Nižaza ejpžtan persun majchtan quintraž cjequiča. Nižaza majchžtan persun ejpžtan quintraž cjequiča. Nižaza maatan persun tjunmat matatan quintraž cjequiča. Nižaza naa tjunmat matatan persun maatan quintraž cjequiča. Nižaza kjan maatan wazatan quintraž cjequiča. Nižaza wazatan kjanatan quintraž cjequiča. Jalla nuž cjisnaquiča, wejtquiz criichinacžtan ana wejtquiz criichinacžtan.

KUZ CAMPIYA, ANA CASTICTA CJEYAJO

⁵⁴ Jalla nekztanaqui Jesusaqui žoňinacžquiz cjichiča:

—Ančhucqui cjiñčhucča, wacchi tsjirinaca tajatan ulanžcaquiž niiqui, “chijnačhani”, nuž cjiñčhucča. Nekztan jalla nuž chijñiž watča.

⁵⁵ Nižaza wartan quera queržcaquiž niiqui, “kjutñit cječhani”, nuž cjinčhucča. Nekztan jalla nuž kjutñiž watča.

⁵⁶ ¡Hipócrita cheechi žoñi! Ančhucqui jana lijitum kuzziz žoñinaca! Tjamž puntu tsjirž puntu walja zizñi chiiñčhucča. ¿Kjažtiquiztan Yooz siñalanaca ana tantiyasajo? Kuz campiya, ima casticz ora irantan.

⁵⁷ Nižaza ¿kjažtiquiztan kamz puntu ana tantiyasajo, jaača zuma kamčhaja, jaača ana zuma kamčhaja, jalla nii?

⁵⁸ Jakziltat am quižcu jiliržquin chjichačhaja, jalla niižquiztan pertunam mayizaquiča ana enenžcu, ima jiliržquin irantican. Am quija ana pertunazta cjenaqui, nii jiliri qui policiquiz am intirjasača. Nekztanaqui nii policiaqui am carsilquiz chawcwasacha.

⁵⁹ Nekztanaqui wejrqui cjiwča, carsilquiz-tanaqui anapanim ulnasača, liwj tjappacha paczcoma. Anzi qui kuz campiya; Yoozquiztan pertuna maya, ana casticta cjejajo.

13

YOOZQUIN KUZIZ CJEE

¹ Nii orapacha tsjii kjaž žoñinacaqui quintu zjijcchiča, Jesusižquiz mazñi. Tuž cjican quint'ichiča. Pilato cjita jiliri qui tsjii Galilea wajtchiz žoñinaca conkatchiča. Nii conta žoñinacz ljocqui animal ljocnacžtan t'ajziča.

Tuquiqui animala contkalča, Yoozquin ofrenda tjaazjapa.

² Jalla nuž nonžcu Jesusaqui cjichiča:

—¿Kjažtiquiztan Galilea wajtchiz zoñinacžquiz nuž anawali watchitajo? ¿Parti Galilea wajtchiz zoñinacžquiztan juc'ant ujchiz ninacajo? ¿Jalla nižtazaž ančhuc pinsiya?

³ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucaquiz juc'ant anawaliž watasacha.

⁴ Jesusaqui quint'ichizakazza, tuž cjican:

—Tsjii tunca quinsakalcuni zoñinacaqui ticziča Siloé cjita wajt campanturi jalla ninacž juntun pajlžtiquiztan. ¿Kjažtiquiztan nižta watchitajo? ¿Parti Jerusalén wajtchiz zoñinacžquiztan juc'ant ujchiz ninacajo? ¿Jalla nižtazaž ančhuc pinsiya?

⁵ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucaquiz juc'ant anawaliž watasacha.

ISRAEL ZOÑINACŽ PUNTUQUIZTAN

⁶ Jalla nektanaqui Jesusaqui tsjii quintu zakaz quint'ichiča, tuž cjican:

—Tsjii zoñiqui niž yokquiz jiws muntinaca čhjacciča. Tsjii nooj ojkchiča “jiwsa pookchižcaa” cjican, ojkchiča. Irantižcu, muntinacquiz ana čhjul jiws frutanaca watchiča.

⁷ Jalla nižtiquiztan nii yoka cwitiñi zoñžquiz cjichiča: “Chera, čhjep wata jiws frutanaca kjuri tjonchinča. Ana jiws frutanaca pookchikalča. Jaziqui tii muntinaca k'atzna. Inapanikaz žejlča.”

⁸ Jalla nekztanaqui nii yoka cwitiñi zoñiqui patrunchiz cjichiča: “Wejt patruna, tii watcamakaz žela cjee. Wejrqui yokal zumpacha kjulznača, nižaza wanžtan wanit'ača.

⁹ Jalla nižtiquiztanaqui jiws frutanaca pookz atčhani. Anapan pookaquiž niiqui, nekztanaqui k'atžtaž cjequiča”. —Jalla nuž quint'ichiča Jesusaqui.

TSJAA MAATAK ZONQUI CHJETINTATACHA

¹⁰ Tsji jeejz tjuñquiziqui, Jesusaqui ajcz kjuyquiz tjaajnatča.

¹¹ Jalla neksz želatča tsjaa laa maatak žon. Tunca quinsakalcun watanaca laatača. Tsji zajraqui naa žon taj chutu paatkalča. Nižtiquiztanaqui anawira ts'iru tsijtsniñtača, ana čhjulu paazjapami.

¹² Jesusaqui naa žon cheržcu, kjawziča, nekztan tuž cjichiča:

—Cullacalla, am laaquiztan liwriita cjequiča.

¹³ Nekztanaqui Jesusaqui niž kjaržtan lanziča naa žonaquiz. Jalla nii orapacha naa žonqui ts'iru cjissinča. Nižtiquiztan Yooz Ejpžquin honora paljaychiñča.

¹⁴ Nii ajcz kjuy jilirizti Jesusižjapa žawjziča, nii jeejz tjuñquiz čhjetintiquiztan. Nekztanaqui nii jiliri qui zoñinacžquiz cjičhicha:

—Sojta tjuñikaz langz waquiziča. Jalla nii langz tjuñiran laanacaqui tjonsa čhjetintaž cjisjapa. Anača jeejz tjuñquiziqui tjonzqui.

¹⁵ Jalla nekztanaqui Jesús Jiliri qui nii jiliržquiz cjichiča:

—Ana zum kuzziz žoñinaca. Jeejz tjuñquiziqui tjapa ančhucanacaqui wacami aznumi cutzniñchucča, kjaz liqui okajo, ¿ana jaa?

16 Taa maatak žonqui Abrahamž majch maatquiztan tjoniñča. Tunca quinsakalcun wata chututača, Satanás cjita zajraž nuž chutu paañiž cjen. ¿Kjažt tii jeejz tjuñquiziqui taa laa žonqui ana čhjetinta cjesajo? Jeejz tjuñquizmi čhjetinzpanikazza.

17 Jesusiž nuž chiitiquiztanaqui tjapa niiz quintru žoñinacaqui azzi quirchiča. Parti žoñinacazti cuntintutača, Jesusaž nuž pajk milajrunaca paachiž cjen.

YOOZ MANTAPARU OJKŃI ŽOŃINACŽ PUNTU

18 Jalla nekztanaqui Jesusaqui cjichiča:

—Tižtača Yooz mantaparu ojkŃi žoñinacž puntuqui. Jalla nii puntuqui intintazkatasacha, mostaz cjita semillž puntu chiitiquiztan. Jalla tužuča.

19 Tsjii mostaza cjita semilla žejlča, ancha zkoltalla. Žoñiž čhjactan, walja pakjiž pajkča, tsjii pajk muntiž, nizta pakji. Nižaza nii mostaz muntiquiz wežlanacaqui tjuraž paasača. Jalla nužupan Yooz mantaparu ojkŃi žoñinaca yapaquiča, mostaz munti pajkŃila, jalla nižta irata.

20 Nižaza Jesusaqui cjichiča:

—Tii takunacžtanzakaz Yooz mantaparu ojkŃi žoñinacž puntu intintazkatasacha. Jalla tužuča.

21 Tsjaa maatak žonqui čhjep tupu jac'užtan levaturžtan t'ajzinča. Nekztanaqui tjappacha nii t'anti masaqui t'amchiča. Jalla nižta iratača,

tjapa kjutñi tii muntuquiz žoñinacaqui Yooz mantita kamañchiz cjisnaquiča.

LIWRIITA ŽOÑŽ PUNTU

²² Wiruñaqi Jerusalén jiczquiz ojkan, Jesusaqi tjaajinčiča. Jakziran watatčhaja, jalla nii watjaran jochiran tjaajinčiča.

²³ Nuž tjaajan, tsjii žoñiqui Jesusižquiz pewcziča, tuž cjican:

—Wejt Jiliri, ¿koluckaz liwriita žoñinacajo?

Nekztanaqui Jesusaqi kjaaziča, tuž cjican:

²⁴ —Ančhucqui tjapa kuz cjee, arajpach ojknii zkoz jicz zanquiz luzjapa. Wejrqui ančhucquiza cjiwča. Casticz tjuñquiziqui tjapa žoñinacaqui luz pecaquiča. Nii oraqui anaž ataquiča. Jalla nižtiqiztan anziqiu liwriiñi zanquiz luzjapa, tjapa kuz cjee.

²⁵ Tsjii noojiqui arajpach kjuychiz tuyñuqui tsijtsnaquiča liwriiñi zana chawjczjapa. Ančhucqui, zawnctan cjiñinaca, nii chawjczta zanquiz t'ok t'okaquiča, tuž cjican: “Wejt jiliri, cjetznalla, cjetznalla”. Kjuychiz žoñiqui kjaaznaquiča, tuž cjican: “Anal ančhuc pajuča. ¿Jecnactčhuckazlaj ančhucqui?”

²⁶ Jalla nuž chiitiquiztan ančhuczti zakaz chiyachani, tuž cjican: “Amtan chica lujlchinča. Nižaza wejtnaca wajt calliran tjaajinchamča”.

²⁷ Pero nii arajpach kjuychiz tuyñuqui kjaaznaquiča, tuž cjican: “Ančhucqui anapal pajuča, cjiwla. Wejtqiztan oka, tjapa ančhucqui ana zuma kuzzizčhucča”.

²⁸ Nekztan Jesusaqi cjichiča:

—Abrahamžtan, Isaacžtan, Jacobžtan, tjapa Yooz taku paljayñi profetanacžtan, tjappacha ninacaqui arajpach Yooz kjuyquiz želaquiča. Ančhuczi zawnctanpanikaz želaquiča. Jalla nuž zawnctan žejlcan ančhucqui kaaquiča, nižaza iżkež jojaquiča, ana luzzucaž cjen.

²⁹ Tjapa kjuttan criichi žoñinacaqui arajpach Yooz kjuyquin luzaquiča, užatan, wartan, tajan, tuwantan, nuž tjapa kjuttan. Nižaza nii luzzi žoñinacaqui arajpach Yooz kjuyquiz cusa at-intitaž cjequiča. Yooz čhjeri luli julznaquiča.

³⁰ Nižaza Yoozqui arajpachquin yekjap tii muntuquiz wirquin cjiñi žoñinaca tucquin cjiskataquiča. Nižaza yekjap tii muntuquiz tucquin cjiñi žoñinaca wirquin cjiskataquiča.

JERUSALEN CJITA WAJTQUIN TICZ PUNTU

³¹ Jesusiž taku žeržtan, nii noojpacha, tsjii kjaž fariseo žoñinacaqui tjonchiča, tuž cjican:

—Tekztan am oka. Herodes cjita jliriqui am conz pecča.

³² Jalla nekztanac Jesusaqui kjaaziča, tuž cjican:

—Ančhucqui nii mañus Herodesquin oka. Niižquin chiižca, tuž cjican: “Tsjii kjaž tjuñi tirapal Yooz obranacal paa-uča, zajranaca chjatkatcan, laanaca čhjetincan. Nekztan tsjii kjaž tjuñquiztan wejt obra žerznača”.

³³ Pero wejrqui tsjii kjaž tjuñi tiral kamača, Jerusalén wajtquin ticzcama. Jerusalén wajtquin Yooz taku paljayñi profetanacaqui ticstanča.

³⁴ ‘Jerusalén, Jerusalén wajtchiz žoñinacal Ančhucqui Yooz taku paljayñinaca coničhucča.

Nižaza Yooziž cuchanžquita zoñinaca maztan čhjaquiñchucča. Wallpiquei persun ozmachanaca kjarž koztan juntiñil, jantey. Jalla nižta irata wejrqui tii wajtchiz zoñinaca juntiz pecuča. Ančhuczi ana wira wejtquin tjonz pequiñchucča.

³⁵ Jalla nižtiqiztan ančuca wajt yokaqui ana Yooz kjarquiz žejlča. Nižaza wejrqui cjiwča. Tsjii noojiquei ančhucqui wejt puntuqiztan čhياquiča, “Honorchiz cjila, tii Yooziž cuchanžquita zoñiquei”. Jalla nii oracama, ančhucqui wejr ana wilta cheraquiča.

14

TSJII CURPU TJUUCHI ZOÑIQUEI CHJETINTATACHA

¹ Tsjii jeejz tjuñquiziqui Jesusaqui tsjii fariseo jilirž kjuya luli ojkčiča. Yekja fariseo zoñinacaqui Jesusa awayt'atča.

² Nižaza nii kjuyquiz želatča tsjii curpu tjuuchi zoñi. Jesús žcati želatča.

³ Nii cheržcu Jesusaqui fariseo zoñinaczquiz lii tjaajiñinaczquiz, jalla ninaczquiz pewcziča, tuž cjican:

—¿Jeejz tjuñquiziqui tsjii laa zoñi čhjetnasay? už čana čhjetnasaj?

⁴ Ninaczi ch'ujukaz cjissiča. Nekztanaqui Jesusaqui laa zoñi kjawžcu, čhjetinčiča. Nekztan laa zoñžquiz cjichiča:

—Oka amqui —cjicanaqui.

⁵ Nekztanaqui Jesusaqui fariseo zoñinaczquiz tuž cjichiča:

—Jeejz tjuñquiz cjenami aznumi wacami tujquiz tjojtsiž cjen okžcu, ¿anaž jooznasajo?

⁶ Jalla nuž chiitiquiztanaqui ana jaknuž kjaazñi atchiča.

PJIJZTA PUNTU

⁷ Nekztanaqui Jesusaqui nii kjuyquin lujlcan jalla tižta cherchiča. Kjawžta žoñinacaqui tucquin julz kjuratča, nižaza honorchiz cjis pecatča. Jalla nižta cjičjiñi cheržcu, Jesusaqui, tuž cjičiča:

⁸ —Amqui tsjii zalzñi pjijztiquiz kjawžta cjesaž niiqui, anača tucquinpan julzqui. Am jarupacha tsjii juc'ant jilir žoñiqui tjonasaž niiqui, am tucquin julzpantaž cjesača.

⁹ Jecčhalaj pucultan ančhucqui kjawzi, jalla nii kjawžñi žoñiqui amquiz chiyasača, “Am julz tii juc'ant jiliržquin tjaa”, cjican. Jalla nižtiquiztanaqui amlaqui azanpanti wirquin julz cjesača. Am aziž cjesača.

¹⁰ Ana nižta paa. Antiz tuž cjee. Tsjii zalzñi pjijztiquiz kjawztaž cjesaž niiqui, wirquinpankaz julzqui. Nekztan nii kjawžñi žoñiqui iran-tižcuqui, amquin chiyasača, tuž cjican: “Wejt k'ayi jila, ticchuc watžca, tucquin julžca”. Jalla nuž kjawžcu tucquin tjulžtiquiztan parti žoñinacz čhujcquiziqui honorchizim cjesača.

¹¹ Jakzilta žoñit parti žoñinaczquiz persun honora chii chijačhaj niiqui, wiruñcaqui nii žoñiqui ch'ujukaz cjesača. Pero humilde kuzziz žoñizti honorchiz cjiskattaž cjequiča.

¹² Nižaza Jesusaqui nii kjawžñi žoñžquiz cjičiča:

–Chjeri tjaasim pecĥhaj niiqui, anam kjawznaquiz am persun mazinacĥquiz, niĥaza am persun jilanacĥquiz, niĥaza am persun famill parintinacĥquiz, niĥaza am ricach visinunacĥquiz, jalla ninacĥquiz alaja anam kjawznaquiĥa. Ninaca ĥjeri luli kjawznasaĥ niiqui, ninacaqui am zakaz kjawznasaĥa. Niĥtiquiztan amzakam ĥjeri tanznaquiĥa. Niĥtiquiztan ana gastichim cjequiĥa.

¹³ Ana niĥta paa. Antiz tuĥ cjee. Chjeri tjaasim pecĥhaj niiqui, kjawznaquiĥa pori ťoĥinaca, zuch ťoĥinaca, coj ťoĥinaca, zur ťoĥinaca, jalla ninacĥquiz kjawznaquiĥa.

¹⁴ Nuĥ paaĥcu cuntintum cjequiĥa. Ninacaqui anaĥ ĥjulumi tjepĥi atasĥa. Yooz zuma kamaĥchiz ťoĥinacĥ jacatatĥ tjuĥiĥ tjontan, jalla nekmim amqui tjepuntam cjequiĥa.

¹⁵ Jalla nuĥ Jesusiĥ chiita taku nonĥcu, tsjii julzi ťejlĥi ťoĥiqui Jesusiĥquiz cjichiĥa:

–Arajpach Yooz Ejpĥ kjuyquin lujlĥinaca cuntintuĥ cjequiĥa.

¹⁶ Jalla nekztanaqui Jesusaqui nii ťoĥĥquiz quint'ichiĥa, tuĥ cjican:

–Tsjii nooj tsjii ťoĥiqui pajk pjijzta paachiĥa. Tuquiqui walja ťoĥinaca kjawskatchiĥa pjijztiquiz.

¹⁷ Pjijzta ĥjeri lujlz ora piyunaqui kjawĥta ťoĥinacĥquiz cuchanĥquitaĥa, tuĥ cjeyajo: “Tjapacha listu tjacĥtaĥa, jaziqui ť-tjona”.

¹⁸ Nekztanaqui kjawĥta ťoĥinacaqui pasinza mayizichiĥa. Tsjii ťoĥiqui cjichiĥa: “Anzilla yoka kjaychinĥa. Jalla nii cherĥquistanĥa. Jalla niĥtiquiztan amqui wejr pasinz't'alla”.

19 Tsjizti cjichiča: “Anzilla tunca waca kjaychińča. Jalla nii waca yanstanča. Jalla nižtiquiztan zumaž pasinzt'alla”.

20 Tsjizti cjichiča: “Anzilla tjunatan zalzinča. Nižtiquiztan anal oki atasacha”.

21 Nii cuchanžquita piyunaqui quejpžcu patrunžquiz tjappacha quint'ichiča, jaknuž žoñinacat kjaaztčhaja, jalla nii. Nuž quint'itiquiztan nii patrunaqui walja žawjchi cjissiča. Nižaza piyunžquiz cjichiča: “Uri ojklayžca calliran nižaza wajt tjiyaran. Pori žoñinaca zjiyczna, nižaza zuch žoñinaca, cojonaca, zuranaca, jalla ninaca kjawžca”.

22 Wiruñahui nii piyunaqui mazziča tuž cjican: “Wejt patruna, amiž mantitacama ojklaychinča. Nižaza iya julz campo žejlča”.

23 Nekztanaqui patrunaqui cjichiča piyunžquiz: “Wilta ojklayžca callinacaran jicznacaran. Žoñinaca kjawkwawcan ojklayžca kjuyquiz chjijsnajo. Kjawžta žoñinaczquiz tjonkatžca”.

24 Nekztan Jesusaqui cjichizakazza:

—Wejrqui cjiwča. Weriz primira kjawžta žoñinacaqui anapan čhjeri lulasača wejt arajpach pjiztiquiziqui. —Jalla nuž cjichiča Jesusaqui.

JESUCRISTUZQUIN KUZUZ PUNTU

25 Walja žoñinacaqui Jesusa apziča. Nekztanaqui Jesusaqui tsijtsu žoñinacz kjutni quejpchiča, tuž cjican:

26 —Jakzilta žoñit wejtquin kuzuz cječhaj niiqui, niž persun ejpmi, maami, tjunmi, maatinacami, persun jilanacami, persun

cullaquinacami, nižaza niiž persun kamañ wirami, jalla ninacžquiztanami wejtquin juc'anti kuzziz cjistanča. Anaž wejtquin juc'anti kuzziz cjequiž niiqui, anaž wejt partir žoñi cjichuca cjesača.

²⁷ Jakzilta žoñit wejt partir žoñi cjis pecčhaj niiqui, tjapa kuztanž wejtquiz cjistanča niiž persun wira apt'iz cjenami.

²⁸ Tsjilla cjesača. Jequit tsjii campanturi kjuyz pecčhaj niiqui, primiruqui gasto zumpacha tantiistanča, paaz wacata ana wacata, jaknuž nii campanturi tsajczjapa, jalla nii.

²⁹ Ana zumpacha tantiižcu kallantaquiž niiqui, nekztan ana tsaqui atchucaž cjesača. Jalla nuž ana tsajcñi cheržcu parti žoñinacaqui nii žoñžquiz iñarasača,

³⁰ tuž cjican: “Nii žoñiqui campantur kjuyi kallantichiča. Nekztan ana tsaqui atchiča. Ana zuma tantiichiča”. Jalla nuž tjasaquiča.

³¹ Nižaza jakzilta chawc jilirit quira zalz pecačhaj niiqui, primiruqui zumpacha tantiistanča, niiž tunca warank zultatunaca tsjiizuñž paatunc warank quintra zultatunacžquiz atipata, ana atipata, jalla nii.

³² Ana atipchucažlaj niiqui, quintra jiliržquin ažquin cjen cumisiuna cuchansa, nužquiz pasinza paajo, acuerdo luzjapa.

³³ Jalla nižta, ima wejtquiz kuzziz cjen, zumpacha tantiiz waquiziča. Jakzilta žoñit čhjultakquiztanami anaž wejtquiz juc'anti kuzziz cjequiž niiqui, anapanž wejt parti žoñi cjesača.

³⁴ Yacuqui zumača. Yacuqui lak'ansnasaž ni-
iqui, ¿jaknužt wilta zuma cjesajo?

³⁵ Anapanž cjesača. Anaž yokjapa sirwasača, nižaza anaž yok kulljapa sirwasača. Jalla nuž ana sirwanami tjojtspanikazza. Jakziltažlaj cjuñchiz niiqui, zumpacha nonžna Yooz puntu intintisjapa.

15

KATCHI UUZU QUINTU

¹ Impuesto cobriñi žoñinaca nižaza ujchiz žoñinaca Jesusižquiz macjatžquichiča, niž taku nonzjapa.

² Jalla nižtiquiztanaqui fariseo žoñinacžtan lii tjaajiñinacžtan jalla ninacaqui Jesusiž quintra chutchiča, tuž cjican:

—Tii žoñiqui ujchiz žoñinacami risiwñipanikazza, nižaza ninacžtan chica čhjeri lujlñiča.

³ Jalla nižtiquiztan Jesusaqui ninacžquiz quint'ichiča tuž cjican:

⁴ —Tsjii žoñiqui patak uuzichiztača. Nekztanaqui tsjiilla katchiča. Jalla nekztanaqui parti uuzinaca ilakz yokquin ecchiča, katchi uuzi wajtzcama. ¿Jakziltat ančucaquiztan ana nižta paajo?

⁵ Nižaza katchi uuzi wajtžcuqui, azkar juntuču tjojtžcu, awatiriqui tjonchiča, anča cuntintu.

⁶ Nižaza kjuya irantižcuqui žcatinta visinunacžquiz nižaza mazinacžquiz kjawziča, tuž cjican: “Wejttan cuntintuž cjee. Wejt katchi uuziqui wajtchinča”.

⁷ Nižaza wejrqui cjiwča, jalla nižta iratača arajpachquinaqui. Tsjii ujchiz žoñiqui Yoozquin kuzziz cjesaž niiqui, arajpachquin

žejlñinacaqui ancha cuntintuž cjisnaquiča. Llatunc tunc llatuncani ana Yoozquin kuzziz žoñinaca želačhani: “Wejrnacqui zuma kamok”, cjicanaqui. Pero arajpachquinaqui ninacžquiztan juc'anti cuntintuž cjequiča nii zinta Yoozquin kuzziz žoñiž cjen.

KATCHI PAAZ QUINTU

⁸ Jesusaqui quint'ichizakazza, tuz cjican:

—Nižaza tsjaa tunca paazziz žon želatča. Nekztanaqui tsjii paaz tjatanchinča. Paaz tjatanžcu, lámpara pekzinča. Nižaza kjuya pewchinča, zumpacha. Nuž zuma pewcan, katchi paaz wajtchinča.

⁹ Nii paaz wajtžcu, mazinacžquiz nižaza žcatinta visinunacžquiz kjawzinča, tuž cjican: “Wejttan cuntintuž cjee. Wejt katchi paaz wajtchinča”.

¹⁰ Wejrqui cjiwča. Nižaza arajpachquinaqui Yooz anjilanacaqui cuntintuž cjequiča čjulorami tsjii ujchiz žoñiqui Yoozquin kuzziz cjisnačhaja, jalla nii oraqui.

EJPZQUIZTAN ZARAKCHI MAJCH QUINTU

¹¹ Nižaza Jesucristuqui tii quintu zakaz quint'ichiča, tuž cjican:

—Tsjii žoñi želatča, pucultan lucmajch ocjalchiz.

¹² Nii upañažta majchqui ejpžquiz cjichiča: “Tata, irinsaž wejtquiz tjaall amqui”. Jalla nekztanaqui ejpqui irinsa t'akžinchiča pucultan majchnacžquiz.

¹³ Tsjii kjaž majquiztan upañažta majchqui irinsa tuychiča. Nekztan tjappacha niž

cusasanaca juntjapžcu, ažkquin ojkchiča yekja nacionquin. Nekztan nii nacionquin tjappacha niž cusasanaca gastichiča, ana zuma kamcan.

¹⁴ Nužquiz tjappacha cusasanaca miržcuqui, upañazta majchqui ana čjulchiz cjissiča, žoñi maya. Nižaza nii nacionquiz čjjeri upsiča. Upañazta majchqui čjjerž kjara passiča.

¹⁵ Nekztanac niiqui langz kjuri ojkchiča. Tsjii žoñžquiz langz wajtchiča. Nii patrunaqui jochi mantichiča, cuch i chajo.

¹⁶ Ancha čjjeri eeczatchiča nii ejpžquiztan zarakchi majchqui. Ana čjulu lulimi onantaž niiqui. Jalla nekztanac cuch lulinacami chjajpinacami lujlnatakaztača.

¹⁷ Jalla nekztanaqui kuzquiz pinsiskatchiča, tuž cjican: “Tjappacha wejt ejpž piyunanacaqui cusa čjjerinaca lujlčhani. Nižaza žejtchinacami žejlčhani. Wejrzi tekzi t'akjiri želuča; čjjerž kjara pascu, ticz atučhani.

¹⁸ Quepaž wejrqui, tira wejt ejpžquin. Nižaza wejt ejpžquin cjeeča: ‘Wejt Tata, Yooz quintra am quintra uj paachinča.

¹⁹ Wejrqui anam am maati cjichucača. Kjažllami tsjii am piyunažtakaz uywalla’ ”. Jalla nuž cjican pinsichiča.

²⁰ Nekztanaqui ejpžquin zarakchiča; ejpž kjuy kjutñi ojkchiča. Ažkquin cjen ejpqui niž majch pajchiča. Kuzquiz ancha okziča, ancha k'aaztichiča. Nekztan majch zali zajtchiča. Majch žcojržcu, chjulziča.

²¹ Nekztanaqui majchqui ejpžquiz cjichiča: “Tatay, wejrqui Yooz quintra, am quintra uj paachinča. Jaziqui wejr am maati anaž

cjichuca”.

²² Jalla nekztanaqui ejpqui piyunanacžquiz cjichiča: “Uri, jila walurchiz zquiti jwesanzca. Nii zquitžtan wejt majch tjužzna. Niiž loc'anquiz zurtija majczina. Nižaza zapato tjužzna.

²³ Nekztanac ančhucqui walipunt cjew wacaž zjičzca conzjapa. Pjijztaž paaquiča. Zuma čhjeriž lulaquiča.

²⁴ Wejt majch ticzižtakaz katchitača. Jaziqui ticziquiztan jacatatchižtakaz tjonchiča. Nižtami nižtan zalchinča”. Jalla nekztanaqui pjijzta payi kallantichiča.

²⁵ Jalla nuž upaňažta majch tjonz ora, niiž jilaqui joch yokquintača. Kjuy žcati irantižcan, pjijzta nonziča, tsajtņi wayliž jora.

²⁶ Jalla nižtiquiztanaqui jilir majchqui tsjii tsjii piyuna kjawziča. Nuž kjawžcu, “čhjulut wat?” cjican, pewziča.

²⁷ Piyunaqui kjaaziča, tuž cjican: “Am lajkqui tjonchila. Wiwusa anazak kjaž cjissi tjonchiča. Nižtiquiztan am ejpqui walipunt cjew wac conkatchiča, pjijzta paazjapa”.

²⁸ Jalla nii quintu zizcu, jilir majchqui walja žawjchiča. Pjijztiquiz ana luz pecatča. Nuž cjen ejpzakazza nii roqui ulanžquichi luzcajo.

²⁹ Nekztanaqui jilir majchqui ejpžquiz cjichiča: “Kjaž watanaca wejrqui am sirwichinča. Nižaza am mantitacama okintača. Jalla nuž cjenami ana wira tsjii cabrallami onanňamtača, wejt mazinacžtan pjijzta paazjapami.

³⁰ Anziqui tii am ana cazņi majchqui tjonchiča. Tiiqui ana zuma kamcan am paaz gastichila, ana

zum maatakanacžtan zejlcan. Nuž paata cjenami, nižtajapa tsjii walipunt cjew waca conchamča”.

³¹ Jalla nekztanaqui niž ejpqui kjaaziča, tuž cjican: “Wejt maati, amqui wejt chicaž kamňampanla. Tjapaž wejttac žejl-la, niic amtacamača.

³² Tii am lajkqui ticzižtakaztača. Jaziqui ticziquiztan jacatatchižtakaz tjonchiča. Nižaza katchitača. Jaziqui wažtača. Jalla nižtiquiztan ancha cuntintuž cjen pjizta paaz waquiziča”.

16

CUSASANACA CWITIŃI PIYUNA QUINTU

¹ Nižaza Jesusaqui niž tjajjinta žoňinacžquiz tsjii quintu zakaz quint'ichiča, tuž cjican:

—Tsjii ricach žoňi želatča. Niž kjuy cusasanaca cwitajo tsjii piyuna utchiča. Wiruňaqui yekja žoňinacaqui nii patrunžquiz mazziča, tuž cjican: “Tii am piyunaqui am cusasanaca ancha anawali gastiňiča”.

² Jalla nekztanaqui patrunaqui piyunžquiz kjawziča, tuž cjican: “¿Čhjul quintut am puntuquiztan nonojo? Jaziqui jaknužum amqui wejt cusasa cwitižinčhaja, jalla nii wejtquiz quint'alla. Amiž ana zuma cwitichiž cjen anam iya wejt cusasa cwitasača”.

³ Nekztanaqui nii piyunaqui pinsichiča, tuž cjican: “¿Jaziqui kjažt wejr cjisnaquejo? Wejt patrunaqui wejrž jakjurpayla nii wejt langzquiztanaqui. Jaziqui ana ancha langziž cjisnula wejrqui. Wejtta azi ana žejlča, zkal yokquiz langz-

japa. Nižaza žoñžquiztan tomangz eksnuča, azučha.

⁴ ¿Jalla nuž ana langzñi atchiž cjen, čhjulut paa-as?” Nekztan piyunaqui cjichiča: “Aaaa. Čhjulut paa-as, nii zizuča wejrqui. Nekztan žoñinaca wejr atintiñiž želačan. Wejr kjawznačan ni-nacž kjuyquizimi”.

⁵ Jalla niž pinsita jaru piyunaqui zina zina patrunž kajchi žoñinaca kjawziča. Tsjii primira kajchi žoñžquiz pewczyča, tuž cjican: “¿Kjažum wejt patrunžquiz kajchamta?”

⁶ Kajñi žoñiqui kjaaziča, tuž cjican: “Patac turril aceite kajchinča”. Jalla nekztanaqui piyunaqui cjichiča: “Tiž am factura. Uri julzna. Yekja factura paa. Pjijska tunca turril aceitekaz cjiirzna”.

⁷ Wiruñaquei tsjiizuñ kajchi žoñžquiz pewczyča, tuž cjican: “Am, ¿kjažum kajchamta wejt patrunžquiz?” Kajñi žoñiqui kjaaziča, tuž cjican: “Patac quintal tircu”. Nii piyunaqui cjichiča: “Tiž am factura. Nižaza yekja factura paa, quinsakal tunca quintal tircukaz cjiirzna”.

⁸ Jalla nii piyunaž nuž paan patrunaquei nii anawal piyuna c'uñchi pajchiča, niž cusasanaca cwitiñi. Jalla nižtažtakaz anawali kamñi žoñinacaqui tii muntuquiz cusasquin kuzziz kamča. Jalla nuž kamcan ninacaqui c'uñchi tjojknañičha zuma kamñi žoñinacžquiztan juc'anti.

⁹ 'Wejrqui cjiwča. Tii ujchiz muntuquiz kamcanaqui žejlñi cusasanaca gastis waquiziča, zuma paacan tsjii zuma amigo tanzjapa. Jalla nekztan ticžcu ančhucqui kjawztaž cjequiča niž

arajpach kjuyquin.

10 'Jakzilta žoñit koluc cusasanaca zumpacha cwit'ačhaj niiqui, nižaza wacchi cusasanaca zumpachazakaz cwit'aquiča. Nižaza jakzilta žoñit koluc cusasanaca ana zuma cwit'ačhaj niiqui, nižaza wacchi cusasanaca ana zuma cwit'ichiž cjequiča.

11 Nižaza jakzilta žoñit tii ujchiz muntuquiz žejlñi cusasanaca ana zumpacha cwit'asačhaj ni-iqui, jalla nižta ana zuma kamchiž cjen, Yoozqui werar arajpach cusasanaca nii cwitiñijapa ana tjaasača.

12 Jakzilta žoñit Yooziž tjaata cusasanaca ana zuma cwit'ačhaj niiqui jalla nižta ana zuma kamchiž cjen, Yoozqui arajpach cusasanaca tjaaz cjen pacha ana tjaasača.

13 'Anaž jakzilta piyunami pizc patruna sirwi atasacha. Piyunaqui tsjii patrunžquizkaz kuz tjaasača. Tsjiizuñ patrunaž jaytaquiča. Nižaza nii piyunaqui tsjii patrunžquizkaz zumpacha sirwaquiča. Nii tsjii patrunžquiz anapan zuma sirwi atasacha. Yoozmi paazmi žejlča pucultan patrunažtakaz. Pero žoñinacaqui pucultižquiz kuz ana tjaasača. Tsjii patrunžquizpankaz zuma sirwasača.

14 Ancha paaz pecñi fariseo žoñinacaqui tjapa Jesusiž chiita taku nonziča. Jalla nuž nonžcu Jesusa iñarchiča.

15 Jesusaqui nižtiquiztan cjichizakazza:

—Ančhucqui cusa žoñižtakaz ojklayiñchucča žoñž yujcquiziqui. Yoozti ančuca kuz zizza. Tii muntuquiz žejlñi žoñinacaqui ana zuma kuzziz

žoninacž honorakaz waytiča. Yooz Ejpzti nii ana zuma kuzziz žoñinaca chjaawjñipanča.

LII PUNTU

¹⁶ Nižaza Jesusaqui cjichiča:

—Juan Bautistaž tjonzcama, Moisés mantita lii azziztača. Nižaza Yooz taku paljayñi profetž tjaajintanacami azziztača, Juan Bautistaž tjonzcama. Nii timpuqui jalla nii mantita takunaca azziztača. Pero Juan Bautistaž tjontiquiztan, liwriiñi Yooz taku nižaza Yooz mantita kamañ puntu paljayzqui, jalla niiča tsjan chekanaqui. Jaziqui walja žoñinacaqui Yooz mantita kamañquiz luzjapa tjapa kuz tjaača.

¹⁷ 'Jalla nuž cjenami tjuñimi warawarami yokami katasacha. Pero tjapa nii arajpach Yooz liizti anaž wira katasacha.

JAKJURPAYZ PUNTU

¹⁸ Nižaza Jesusaqui cjichiča:

—Jakzilta žoñit niž maataka jakjurpayžcu yekja maatakžtan zalsnačhaj niiqui, jalla nuž cjenaqui adulterio uj paača. Nižaza jakzilta žoñit jakjurpayta maatakžtan zalsnačhaj niiqui, adulterio uj zakaz paača.

RICACH ZOÑŽTAN PORI ZOÑŽTAN QUINTU

¹⁹ Nižaza Jesusaqui tsjii quintu zakaz quint'ichiča, tuž cjican:

—Tsjii wali jiru ricach žoñiqui želatča. Zuma finu zquiti cujtžñitača. Nižaza zapuru pjijztakaz ancha cusa čheri lujlchiča.

²⁰ Nii oraqui tsjii pori žoñi želatča Lázaro cjita. Niž janchiqui walja zkira cijjtchitača. Zapuru ricach žoñž kjuy zanquiz julzi žejlñitača.

21 Nii ricachuqui žejtchi čhjerinaca tjojtñitacha. Nii pori žoñizti tjojtta žejtchi čhjerinaca lujlz pecñitača. Pacunacaqui pori žoñžquiz macjatžcu niiz žkiranaca issañitača.

22 Tsjii noojiqui nii pori žoñiqui ticziča. Nekztanaqui Yooz anjilanacaqui nii chjitchiča Yooz illzta zuma yokquin, Abraham cjita žoñžtan chica želajo. Wiruñaquí nii ricachu žoñiqui ticzizakazza. Nekztanaqui yokquiz tjatžtatača.

23 Nii ricachu žoñiqui infiernuquin sufrican želatča. Nicju sufrican, tsewc kjutñi cherchiča. Ažquiztan cherchiča Abrahamžtan Lazaružtan.

24 Jalla nuž cheržcu, kjawchiča, tuž cjican: “Abraham tatay, wejr okznalla. Lázaru cuchanžca, niiz loc'ana kjaztan t'awžcu, wejt lasquiz lanznajo, ch'uñkatajo. Tii asñi ujquiz anchal sufruča”.

25 Abrahamzti cjichiča: “Jila, cjuñznalla, muntuquiz kamcan, ancha cusa kamchamča. Lazaruzti t'akjiri kamchiča. Jaziqui anziqiu Lazaruqui kuztača, ancha cuntintuča. Amzti ancha sufriča.

26 Nižazakaz Yoozqui pajk pal k'awa utchipanča wejtnacquiztanami amquiztanami. Jaziqui tekztan nawjkchuc ojkz pecñinacaqui anaž okasača. Nižaza nawjktan tjonz pecñinacaqui anaž tjonasača”.

27-28 Jalla nekztanaqui nii ricuqui cjichiča: “Abraham tatay, wejtta pjijskaltan jilanaca žejlča. Jaziqui am rocuča, wejt ejpž kjuyquin Lázaru cuchanžinžcalla, ninacžquiz paljayajo, nižaza tii infiernuquiz ana tjonajo”.

29 Pero Abrahamqui niizžquiz kjaaziča, tuž cji-can: “Ninacžta žejl-la Moisés cijjrtami nižaza Yooz

taku paljayñi profetanacž cjiirtami. Nii cjiirtanacquiz cazla, kuz tjaala”.

³⁰ Jalla nekztanaqui nii ricuqui kjaaziča tuž cjičan: “Razunam chiiča, Abraham tatay. Pero tsjii žoñiqui ticziquiztan ninacžquin okačhaj ni-iqui, Yoozquin kuzziz cjiskatačhani”.

³¹ Nekztanaqui Abrahamqui cjichiča: “Ninacaqui Moisés mantita taku nižaza Yooz taku paljayñinacž taku ana criyačhaj niiqui, tsjii ticziquiztan jacatatchi žoñž takumi ana zakat criyačhani”. —Nuž quint'ichiča Jesusaqui.

17

UJQUIZ TJOJTТА PUNTU

¹ Nekztanaqui Jesusaqui niíž tjaajinta žoñinacžquiz cjichiča:

—Ujquiz tjojtskatñi žoñinaca žejlñipantača. Pero Yoozqui nii ujquiz tjojtskatñi žoñinacaqui anawaliž watkataquiča.

² Jakzilta žoñit Yoozquin kuzziz žoñi ujquiz tjojtskatačhaj niiqui, nižta ana zum žoñinacaqui koz kot kjazquin tjojttaž waquiziča, tsjii pajk taj maztan jorquiz mokžinta. Jalla nuž tsjan cusaž cjesača nii ujquiz tjojtskatñi žoñžtaqui.

³ Nižta žoñinacžquiztan ančhucqui walja cwitassa, ana ujquiz tjojtsjapa. Tsjii am jilanacžquiztan am quintra uj paačhaj niiqui, jalla niížquiz žumpacha chiižina, niíž kuz campiita cjejajo. Nekztan niíž kuz campiita cječhaja, jalla nii uj paañi žoñžquiz pertunaquiča amqui.

⁴ Zapa wiltami nii am quintra uj paañi žoñiqui pertuna mayzičhaj niiqui, amqui pertunaquiča, tsjii nooj pakallawk wilta am quintra uj paanami.

YOOZQUIN KUZUZ PUNTU

⁵ Wiruñaquí Jesusiž illzta žoñinacaquí Jesusa jiliržquíz paljayčiča tuž cjican:

—Juc'anti Yoozquin kuzziz cjisjapa yanapalla.

⁶ Nuž maytiquiztan Jesusaquí kjaaziča, tuž cjican:

—Tsjii mostaz semillaquí aunquí koltallami wali pakji pakñiča. Jalla nižta iratača ančhucquí. Yoozquin walja kuzzizčhucčhalaj niiqui, milajrunacami zakaz paasača. Walja Yoozquin kuzziz želanaquí, tií sicómoro cjita muntiquíz cjesača, tuž cjican, “Tekztan pajlta cjee, nižaza kotquin tjojtta cjee”. Jalla nuž chiitiquiztan nižtapachaž cjesača.

PIYUNZ PUNTU

⁷ Jesusaquí cjichizakazza:

—Tsjilla chiyasača. Ančhucquiztan piyunchiz žoñi želasača. Piyunaquí joch yokquiztan tjonasača, uywanaca itzcu, nižaza zkala yoka kjullžcu. Jalla nuž langzquiztan tjontanaquí, anapanž ančhucquí cjesača, “Watžca, julzna, tiiča lujlzna” cjicanaquí.

⁸ Ančhucquí antiz piyunžquíz cjesača, “Chjeriž apura kisna. Nižaza wejr atintisjapa, zumpacha tjaczna. Wejrquí lulača, licača. Nekztanž amquí lulaquíča, nižaza licaquíča”. Jalla nuž tsjii piyunžquíz cjesača.

⁹ Jakzilta piyunat niž patrunž mantitanaca paačhaj niiqui, patrunaquí sparaquíž cjesajo?

10 Ančhucqui Yooz piyunažtakazza. Jalla nižtiquiztan tjapa Yooz mantitacama kamcan, ančhucalaqui chiiz waquiziča, tuž cjican, “Wejrnacqui am piyunitča. Inakaztča wejrnacqui. Jaknužt paaz waquizičhaja, jalla niikaz paayinča”.

*MOJKCHI JANCHICHIZ ZOÑINACA
CHJETINTATACHA*

11 Jalla nekztanaqui Jesusaqui Jerusalén watja ojkan, Samaria cjita yoka Galilea cjita yoka nii taypiquin watchiča.

12 Nekztanaqui tsjii watjallquiz, waj irantawc cjen, tuncaltan mojkchi janchichiz zoñinacaqui Jesusižquin zali tjonchiča. Ažkquiztan Jesusižquiz chiižinchiča.

13 Altu tawkžtan tuž cjichiča:

—¡Jesusa, Jiliri, wejtnacaquiz okznalla!

14 Jalla nii laanaca cheržcu, Jesusaqui cjichiča:

—Icliz jiliržquin persun janchi tjeezñi oka.

Jalla nuž ojkan, laanacaqui žejtchi quirchiča.

15 Tsjii tsjiiqui persun janchi žejtchi cheržcu cuttichiča, Jesusiž kjutñi, altu joržtan Yooz honora waytican quejpčiča.

16 Jalla nuž Jesusižquin wilta zalžcu, niiz yujcquiz quillziča, nižaza tuzi t'okziča yoka iranta. Jesusižquiz ancha sparaquiz cjichiča. Nii zoñiqui Samaria wajtchiz zoñitača.

17 Nekztanaqui Jesusaqui cjichiča:

—¿Ančhucqui anataj tuncaltanpacha žejtchinčhucjo, tii laaquiztanajo? ¿Jakziquint tsjii partinacajo?

18 Amqui anaž tii wajtchiz žoñila. Am zinakaz quejpžquila Yoozquin honora wayticanaqui.

19 Nekztan Jesusaqui nii žoñžquiz cjichiča:

—Tsijsna, oka. Amiž tjapa kuz criitiquiztan, jaziqui čhjetintamča.

YOOZ MANTIZ TJUŇI PUNTU

20 Nekztanaqui fariseo žoñinacaqui Jesusižquiz pewcziča, tuž cjican:

—Čhjlorat Yooz Epiž mantiz tjuñi irantižcaquiya?

Nekztanaqui Jesusaqui kjaaziča, tuž cjican:

—Yooz Epiž mantiz tjuñiqui anača cherchuca.

21 Anača “tekzipan” cjican nii tjuñi tjeez-nasača. Nižaza anača “nii nawjk” cjican nii tjuñi tjeeznasača. Yooz mantizqui žoñinacž kuzquizpachača. Jalla nižtiquiztanac Yooz mantizqui anaž cherchuca cjesača.

22 Jalla nekztanaqui Jesusaqui niž tjaajintanacžquiz cjichiča:

—Tsjii sufris timpuqui irantižcaquiča ančhucquiz. Jalla nekztanac ančhucqui wejr arajpachquiztan quejpsquiñi cherz pecaquiča, tsjii noojillami. Pero weriž arajpachquin želan, anaž wejr cheri atasacha. Wejrqui tsewctan cuchanžquita Yooz Zoñtča.

23 Nižaza nii sufris timpuquiziqui žoñiqui Cristuž puntuquiztan parlaquiča, tuz cjican: “Arajpachquiztan chjijwžquičiča. Tekzi žejlča”. Tsjiižti zakaz chiyaučiča, “Nii nacjuča Cristuqui” cjican. Pero ančhucqui anaž nicju okaquiča, nižaza nii chiita taku anaž criyaquiča.

24 Tsjii liwjliwjñi rayu cjita tjonñila, jantey, jalla nuz liwjtayžcaquiča, liwjpacha irantaž kjanžnaquiča. Jalla nižta irata wejrqui arajpachquiztan wilta tjonča. Weriz tjonan, tjappacha zizasča. Jalla nižtaž wejt tjonz tjuñiz cjequiča.

25 Anziqui primiraqui wejrqui walja sufristanča. Nižaza tii timpuquiz kamñi zoñinacžquiztan anapan criital cjeeča. Ana werj chertz pecaquiča.

26 Jaknužt Noež kamta timpuquiz watčhaja, jalla nižtazakaz wataquiča ima weriz tjonan. Wejrqui tsewctan cuchanžquita Yooz Zoñtča.

27 Noež timpuquiz jalla tuž kamñitača zoñinacaqui. Zuma čhjeri lujlñitača, nižaza licñitača. Nižaza zalzñitača, nižaza zalzjapa tjaañitača. Jalla nuž zoñinacaqui kamchiča asta Noež pajk warcu kjuyquiz luzcama. Yooz kamañquiz kamzqui ana importayñitača. Jalla nekztanaqui kjaz juyzuqui tjonchicha. Jalla nii juyzuquiziqui tjappacha anawali kamñi zoñinacaqui ticziča.

28 Nižaza jaknužt Lot cjita zoñž timpuquiziqui watčhaja, jalla nižtazakaz wataquiča ima weriz tjonan. Lujlñitača, licñitača, kjayñitača, tuyñitača, čhjacñitača, y nižaza kjuya kjuyñitača. Yooz kamañquiz kamzqui ana importayñitača.

29 Jalla Lotž Sodoma cjita wajtquiztan ulantan, tiripintit uj azupri chijñi tjonchiča. Nuž chijintiquiztan tjappacha ujžcu ticziča.

30 Wejt tjonz tjuñquiziqui nižta iratazakaz wataquiča. Wejrqui tsewctan cuchanžquita

Yooz Zoñtča.

³¹ 'Nii wejt tjonz tjuñquiziqui jakziltat kjuy zawncu želačhaja, anaž kjuy cusasanaca aptiñi luz waquiziča. Nižaza jakziltat joch yokquin želačhaja, anaž wajt kjuya cuttis waquiziča.

³² Lotž tjuna puntuquiztan cjuñzna.

³³ Jakziltat persun kamañquiztan ana jaytačhaja, jalla niiqui anaž arajpachquin kamaquiča. Nižaza jakziltat persun kamañ wira jaytičhaja, jalla niiqui arajpachquin wiñaya kamaquiča.

³⁴ 'Nižaza wejrqui cjiwča. Weriz tjonan nii arama pucultan tsjii kjuyquiz tjajaquiča. Jalla nuž tjajan, tsjiiqui arajpach kjutñi waytižcu chjichtaž cjequiča, tsjiizti pachpiquiz nii kjuyquiz ectaž cjequiča.

³⁵ Nižaza pucultan maatakanaca chica jawuncan, tsjaaqui arajpach kjutñi waytižcu chjichtaž cjequiča. Tsjaazuñzti pachpiquiz ectaž cjequiča.

³⁶ Nižaza pucultan luctakanaca joch yokquin želan, tsjiiqui arajpach kjutñi waytižcu chjichtaž cjequiča, tsjiizuñzti nii joch yokquinpacha ectaž cjequiča.

³⁷ Jalla nižta tjaajinta takunaca nonžcu, niž tjaajinta žoñinacaqui pewcziča, tuž cijan:

—Wejt Jiliri, ¿jakziquin tižtanaca wataquiya?

Jalla nekztanaqui Jesusaqui kjaaziča, tuž cijan:

—Jakziquin ticzi janchi žejlčhaja, jalla nicju cun-turinacaqui muzpa ajcsñiča. Jalla nižta irata jakziquin ana wali paañinacaqui žejlčhaja, jalla nicju ana walinaca wataquiča.

18

ZEW ZONATAN JUEZ JILIRZTAN QUINTU

¹ Nekztanaqui Jesusaqui tjaajinchiča, zoñinacžlaqui Yoozquin mayizizpanča, ana upa kuzcan, jalla nuž tjaajinchiča.

² Tjaajincan jalla tuž quint'ichiča:

—Tsjii juez jiliri tsjii wajtquiz želatča. Yooz ana rispitñitača, nižaza ana čjul zoñimi rispitñitača.

³ Nii wajtquizpacha želatča tsjaa žew maatak žon. Tsjii nooj naa žonqui juez jiliržquin ojkchinča, tsjii quija quijsquizjapa, nižaza naaža quintrižtan naa zumpacha azquichajo.

⁴⁻⁵ Azkapan juez jiliri qui ana naaža quija nonz pecchiča. Niiž wiruñ nižtami pinsichiča, tuž cjian: “Taa žew žonqui tirapanikal quižtan wejr molističa. Yoozmi zoñimi wejta anaž importiča. Jalla nuž cjenami taaža quija nonznača, wejtquiz ana tira molistajo tii quižtan. Wejrqui ana azquichačhaj niiqui, naaž tjontjonanaqui wejt žawjwat zjijcnačhani”.

⁶⁻⁷ Nekztanaqui Jesús Jiliri qui cjičiča:

—Jalla nuž čiichiča nii anawal juez jiliri qui. Nižaza Yooz Ejpqui niiž illzta zoñinacž quijanaca azquichaquiča. Ninacaqui majiñami weenami Yoozquinkaz mayiziča. Ninacž mayizitiqiztan Yoozqui ana enenžcu ninacž quintranaca azquichaquiča.

⁸ Wejrqui cjiwča, tsjii noojiqui Yooz Ejpqui niiž illztanacž quija apuraž atintaquiča. Yooziž tsewctan cuchanžquita Zoñi tjontan, Yoozqui ul-timupan niiž illztamiž quija azquichaquiča. Nii

tjonz tjuñquiziqui, ¿tii yokquiz žejlñi žoñinacaqui Yoozquin kuzziz želasaya?

YOOZQUIN MAYIZIZ PUNTU

⁹ Tsji žoñinacaqui želatča, persun honora waytican, nižaza parti žoñinaca iñarcan. Jalla nii žoñinaczquiz tii quintu quint'ichiča Jesusaqui, tuž cjican:

¹⁰ –Pucultan žoñinacaqui timpluquin ojkchiča, Yoozquin mayiza. Tsjiiqui fariseo partiquiztantača. Tsjiizuñqui impuesto cobriñi žoñitača.

¹¹ Fariseo žoñiqui tsijtchi mayiziñitača, tuž cjican: “Yooz Tata, amquiz sparaquiž cjiwča. Wejrqui anača nii yekja žoñinaca iratitqui. Ninacača tjañinacaqui, nižaza ninacača ñejonacaqui, nižaza ninacača adulteriuquiz ojklayñinacaqui. Nižaza wejrqui anača tii impuesto cobriñi iratitqui.

¹² Wejrqui pizc wilta simanquiz ayunasiñča. Nižaza tjapa weriž cantiquiztan tsjii tunca parti tjayiñča”.

¹³ Jalla nii impuesto cobriñi žoñizti wirquin acha colzi želatča. Ana tsewcchuc cherzipanž želatča. Jalla nuž persun ujchiz cjen persun tuzi čhajccan želatča. Nižaza cjichiča: “Yooz Tatay, wejr ujchizpantča. Wejr okznalla”.

¹⁴ Jaziqui ančucaquiz cjiwča. Nii impuesto cobriñi žoñiqui Yooz Epiž yujcquiziqui niž ujquiztan liwriitača. Niiž kjuya pertunta ojkchiča. Nii fariseo žoñizti Yooz Epiž yujcquiziqui tira ujchizpantača. Ana pertunta cjissiča. Persun honora waytiñi žoñinacaqui ultimquiziqui azipanž

cjesača. Nižaza ultimquiziqui humilde kuzziz žoñinacazti honorchiz cjiskattaž cjequiča.

OCJALANACZ KUZ PUNTU

¹⁵ Tsjii nooj žoñinacaqui Jesusižquin ocjalanaca zjijcchiča, kjaržtan lanznajo. Nuž zjijcan, Jesusiž tjaajinta žoñinacaqui ocjala zjijcñi žoñinaca ujziča.

¹⁶ Nuž nonžcuqui Jesusaqui kjawziča, tuž cji-can:

—Ocjalanaca wejtquin tjonaj cjee, ana chiižina. Tii ocjalanacž kuz irata jalla nižta kuzzizza Yooz Epiž mantita kamañchiz žoñinacaqui.

¹⁷ Tii razunazakal chiyuča. Ana tii ocjalanacž kuz irata Yoozquin kuzzizzalaj niiqui, ana Yooz Ejpž arajpach watja luzasača.

LIWRIITA CJIS PUNTU

¹⁸ Wiruñaquei tsjii jiliriqui Jesusižquiz pewcziča, tuž cji-can:

—Tjaajiñi Maestro, zumača amqui. Arajpach wajtquin wiñaya kamzjapa, ¿chjulut paasaya?

¹⁹ Nekztanaqui Jesusaqui kjaaziča, tuž cji-can:

—¿Kjažtiquiztan amqui wejtquiz “zumačham” cjeejo? Anaž jecmi zumaqui, Yoozpankazza zumaqui.

²⁰ Amqui Yooz mantitanaca zizza: “Anača adulteriuquiz ojklayzqui. Anača žoñimi conzqui. Anača tjañi cjisqui. Anača toscarami chiizqui. Am maa ejpča rispitzqui”.

²¹ Nekztanaqui nii jiliriqui cjichiča:

—Wejrqui koltallquiztanpacha tjapa nii lii jaru cumpliñča.

²² Jalla nuž nii žoñiz chiita nonžcu, Jesusaqui cjichiča:

—Tsjillakaz pjaltiĉha amtaqui. Tjappacha am ĉhjultak cusasanaca tuysna. Nekztan porinacžquiz nii paaz ona. Jalla nuž onanžcuqui tsewcta arajpachquin juc'ant ricachum cjequiĉha. Jaziqui nekztan wejttan chica ojklayñi cjesaĉha.

²³ Nii oraqui walja ricachutaĉha nii žoñiqui. Jalla nuž Jesusiž chiitiquiztan nonžcu, walja llac-tazziĉha.

²⁴ Nii žoñi llaquita cheržcu, Jesusaqui cjichiĉha:

—Ricachunacžtaqui walja ch'amaĉha Yooz kamañ jiczquiz luzqui, Yooz mantita kamañquiz cjis-japaqui.

²⁵ Tsjii camello cjita pajk animalaqui ch'aman acuj cjuñquiz luzasaĉha. Ricachunacžtaqui tsjan ch'amaĉha Yooz jiczquiz luzqui, Yooz mantita kamañquiz cjisjapaqui.

²⁶ Jalla nii nonžcu, nonžñi žoñinacaqui cjichiĉha:

—¿Jequit liwriita cjesajo?

²⁷ Nekztanaqui Jesusaqui cjichiĉha:

—Žoñiqui anaž persunpacha liwrii atasaĉha. Yoozpankazza liwriiñiqui. Yoozqui jecmi liwrii atasaĉha.

²⁸ Nekztanaqui Pedruqui cjichiĉha:

—Wejt Jiliri, wejrnacqui tjappacha ecchinĉha, amtan chica ojklayzjapa.

²⁹ Jalla nekztanaqui Jesusaqui kjaaziĉha, tuž cjan:

—Weraral chiyuĉha. Jakzilta žoñimi kjuya, maa ejp, jilanaca, cullaquinaca, tjun, maatinaca, jalla ninaca ecĉhaj niiqui, Yooz mantita kamañquiz ojklayzjapa,

³⁰ tii muntuquiz žejlcan juc'anti tjaataž cjequiča. Y nižaza arajpachquin ojkžcu, Yooztan wiñaya cuntintu kamaquiča.

JESUSAQUI NIIŻ PERSUN TICZ ORA MAZZICHA

³¹ Nekztanaqui Jesusaqui niiž tuncapan tjaajintanaca tsjii latu kjawziča, tuž cjican:

—Jaziqui Jerusalén watjaž ojkla. Wejrqui tsewctan cuchanžquita Yooz Zoñtča. Tuquitanpacha Yooz taku paljayñi profetanacaqui wejt puntuquiztan mazincan cjiŕchiča. Jalla nii Jerusalén wajtquin ninacz mazinta taku tjappacha cumplisnaquiča.

³² Yekja wajtchiz zoñinaczquiz intirjital cjeeča. Nižaza ancha iñartal cjeeča; arartal cjeeča. Nižaza llawzižtan tjujtal cjeeča.

³³ Nižaza wjajtal cjeeča. Nekztanaqui conatal cjeeča. Pero ticžcuqui čhjep majquiztan jatatača.

³⁴ Jalla nii tjaajinta zoñinacaqui Jesusiž chita ana zinta intintazatča, čjul puntuquiztan chiičhaja, jalla nii. Nii takuqui ana intintichuc takužtakaztača.

ZUR ZOŃI CHJETINTA

³⁵ Jalla nekztanaqui Jesusaqui Jericó cjita wajt žcati irantatča. Jalla nuž irantan tsjii zur zoñi jicz latuquiz julzi želatča, niiqui kjaraž chjinchjinačha onajo.

³⁶ Walja zoñinaca watwatñi nonžcu, zur zoñiqui pewcziča, tuž cjican:

—¿Kjažtiquiztan tama tama zoñinaca watwat?

³⁷ Nekztanaqui zoñinaca kjaaziča, tuž cjican:

—Jesusa, nii Nazaret wajtchiz zoñiqui watča tii jiczquiz.

³⁸ Jalla nii zizcu, zur zoñiqui altu joržtan kjawchiča, tuž cjican:

—¡Jesusa, Davidž maati, wejr okznalla! Ana wali želuča.

³⁹ Nii Jesusiž tuqui ojkñi zoñinacaqui nii zur zoñi ujziča, ch'uj želajo. Zur zoñizti juc'anti altu joržtan kjawchiča, tuž cjican:

—¡Davidž majch, wejr okznalla!

⁴⁰ Nekztanaqui altu joržtan chiiñi nonžcu, Jesusaqui tsijtsiča. Zur zoñi zjijqui cuchanchiča. Zur zoñi žcatžinžcu Jesusaqui pewcziča, tuž cjican:

⁴¹ —¿Ĉhjulut amta wejr paaquiya?

Nii zur zoñiqui kjaaziča, tuž cjican:

—¡Wejt Jiliri, Ĉhjucquiz cjetžinalla!

⁴² Nekztanaqui Jesusaqui cjichiča:

—Am Ĉhjucqui cjetžtaj cjsla. Amiž tjapa kuz criitiquiztanaqui, Ĉhjetintamča.

⁴³ Nii orapacha zur zoñiqui cherñi cjissiča. Nekztanaqui Jesusižtan chica ojklayatča, Yoozquin honora waytican. Jalla nižta paata cheržcu, tjapa zoñinacaqui Yoozquin honora waytichizakazza.

19

JESUSIZTAN ZAQUEOZTAN

¹ Jalla nekztanaqui Jerusalén wajt kjutñi ojkan Jesusaqui Jericó cjita watja luzziča; nekztan nii wajt taypiquiz watchiča.

² Nicju tsjii ricach zoñi želatča Zaqueo cjita. Nii zoñiqui impuesto cobriñiz jiliritača, ancha ricachutača.

³ Nižaza nii zoñiqui Jesusa pajz pecatča. Kolta zoñitača. Jalla nižtiquiztan wacchi zoñinacz tayp-iquiz cjen, Jesusižquin anatača cherchuca.

⁴ Nekztan Zaqueoqui tucquin žajtžcu tsjii sicómoro cjita munti yawchiča, Jesusa chertzjapa. Nii munti, jicz latuquiz želatča, Jesusiž watz žcatipan.

⁵ Nii munti nuž watcan, Jesusaqui tsewcchuc cherziča. Nuž cheržcu cjichiča:

—Zaqueo, apura chjijwžca. Tonj tjuñi am kjuyquiz kamstanča.

⁶ Jalla nuž chiitiquiztan Zaqueoqui apura chjijwžquichiča. Ancha cuntintu Jesusa risiwchiča.

⁷ Jalla nii cheržcu, tjappacha nii zoñinacaqui Jesusiž quintra chuchchiča, tuž cjican:

—Jesusaqui nii ujchiz zoñž kjuya kami ojkča.

⁸ Jalla nekztanaqui Zaqueoqui tsijsu, Jesusa Jiliržquiz cjichiča:

—Wejt Jiliri, tii zizza. Porinaczquiz tjaa-ača chicata wejt cusasa žejlñinaca. Nižaza jakzilta zoñžquiztan wejr incalltučhaja, jalla nii zoñžquiz wejr tjepnača pajkpic wiltiquiztan juc'anti.

⁹ Nekztanaqui Jesusaqui cjichiča:

—Tonj tjuñi tii kjuychiz zoñinacaqui liwriitača, Yooz kamañquiz luzjapa. Tii zoñiqui Abraham cjita majchmaatiquiztanpacha tjonñiča.

¹⁰ Wejrqui tsewctan cuchanzquita Yooz Zoñtča. Wejrqui tii muntuquiz tjonchinča, ujchiz zoñinaca kjawzñi, nižaza ninaca liwrii.

PIYUNANACZQUIZ PAAZ INTIRJITA QUINTU

¹¹ Jerusalén wajtž žcati želan, žejlñi žoñinacaqui pinsichiča, tuž cjican: “Anzilla Yooz mantiz tjuñiqui tjonachani”. Jalla nuž pinsitiquiztan, nižaza nii žejlñi žoñinaca niž chiita taku nonznan, Jesusaqui tii quintu paljaychiča,

¹² tuž cjican:

—Tsji žoñi želatča rispitta famillquiztan. Nii žoñiqui ažkquin yekja wajtquin ojkchiča, chawc jilir nombamiento tanzjapa. Nuž tanžcu quejpžcaquiča.

¹³ Ima ojkcan, nii žoñiqui tunca niž piyunanaca kjawziča. Kjawžcu zapa maynižquiz tsji pajk valorchiz paaz intirjichiča. Nižaza ninaczquiz cjichiča: “Tii paaztan negociož paaquiča, wejt quejpsquizcama”.

¹⁴ Nii žoñž persun wajtchiz žoñinacaqui nii walja chjaawjkatchiča. Jalla nižtiquiztan niž wirquin tsji cumizuna mantichiča, tuž cjeyajo: “Tii žoñi anaž pecča učum chawc jiliri cjisjapa”.

¹⁵ Nižtami chawc jiliri nombritatača. Nekztan niž yoka quejpchiča, mantizjapa. Niiž iran-tižcuqui, kjawžñi cuchanchiča niž paaz intir-jita žoñinaczquin, jaknužt zapa mayni paaztan canchaja, jalla nii zizjapa.

¹⁶ Primir piyunaqui prisintichiča, tuž cjican: “Wejt patruna, am paaztan canchinča tunca wiltan wiltan juc'anti”.

¹⁷ Nii chawc jiliriqui nii piyunž honora paljaychiča, tuž cjican: “Ancha waliča. Zuma piyunamča amqui. Nii zkoluc paaztan zumpacha trabajchamča. Jaziqui amqui jilirim cjequiča, tunca watja mantiñim cjequiča”.

18 Tsjii piyunazti prisintichizakazza, tuž cjican: “Wejt patruna, am paaztan canchinča pjijska wiltan wiltan juc'anti”.

19 Nii chawc jiliriqiu paljaychiča, tuž cjican: “Jaziqui jilirim cjequiča. Pjijska wajtquiztan mantiñim cjequiča”.

20 Nekztanaqui tsjii piyunazti prisintichizakazza, tuž cjican: “Wejt patruna, tiž am paazqui. Tsjii pañquiz žcucžcu chjojchinča.

21 Amqui walja cumpliskatñi patrunamča. Jalla niztiquiztan am eksinča. Ricujñamča ana amiž nonztaqui. Nižaza ajžñamča ana amiž čhjectaqui”.

22 Nekztanaqui nii chawc jiliriqiu chiižinchiča, tuž cjican: “Ana zum piyunamča amqui. Am persun chiita takuqui am uj tjeeža. Amqui zizzamča, wejrqui kjanapanžlani cumpliskatiñ žoñtni, jalla nii. Ana weriž nonztaqui ricujñiñchalani. Ana weriž čhjectaqui ajžniñchalani.

23 Nižtiquiztanaqui, ¿kjažtiquiztanam amqui wejt paaz ana bancuquiz majcžinjo? Bancuquiz majcžintiquiztan wejrqui paaz machtanpacha ricujtasača, tekz quejpžcu”.

24 Nekztanaqui nii patrun jiliriqiu parti žoñinacžquiz mantichiča, tuž cjican: “Intirjita paaz kjažzna. Nii tunca paazziz žoñžquiz tjaa”.

25 Žoñinacaqui cjichiča: “¡Wejt Jiliri! Tunca paazzizza nii žoñiqui”.

26 Patrun jiliriqiu kjaaziča, tuž cjican: “Ančhucaquiz tii razunal cjiwča. Jakzilta žoñit niž wacchi tjaata cusasa zuma cwitača, jalla nižquiz juc'anti tjaata cjequiča. Nižaza jakzilta

žoňit niiž koloculla tjaata cusasa ana zuma cwitačhaja, jalla niižquiztan asta nii zkolocullami kjaňtaž cjequiča”.

²⁷ Nižaza nii jiliriqui mantichiča, tuž cjican: “Nii wejt quintra žoňinacaqui ana wejr pecchiča ninacž chawc jiliri cjisjapa. Jaziqui zjijczna ticju. jZjijczcu wejt yujcquiz conzna!” Jalla nuž mantichiča nii jiliriqui.

JESUSAQUI JERUSALENQUIN LUZZICHA

²⁸ Jalla nuž quint'izcu, Jesusaqui Jerusalén watja tira ojkchiča.

²⁹ Betfagé cjita nižaza Betania cjita watjanaca žcatžincan, nižaza Olivos cjita curulla žcati želan, jalla nekztan pucultan niiž tjaajinta žoňinaca cuchanchiča,

³⁰ tuž cjican:

—Nii nawjka watja oka. Jalla nicju ančhucqui mokta aznu wačhaquiča. Anaž jecmi nii aznuqui yawchi. Jalla nekztanaqui moktiquiztan jweržcu, tekz zjijca.

³¹ Jalla nuž jweržcu zjijcawc cjen cunamit žoňimiž pewcznačhan, “¿Kjažtiquiztan tii aznu jwerjo?” cjicanaqui. Jalla nii puntu pewcziquiztan ančhucqui kjaaznaquiča, tuž cjican: “Jesusa Jiliriz tii aznu pecča”.

³² Nekztanaqui nii pucultan tjaajintanacaqui ojkchiča. Jaknužt Jesusa chiitčhaja, jalla nuž cjitacama watchiča. Jalla nuž tsjii mokta aznu watchiča.

³³ Jalla nuž jweran, nii aznuž tuyñunacaqui pewczicha, tuž cjican:

—¿Kjažtiquiztan nii aznu jwer ančhucjo?

³⁴ Tjaajintanacaqui kjaaziča, tuž cjican:

—Jesusa Jiliriqui tii aznuž pecča.

³⁵ Nekztanaqui Jesusižquiz chjitchičha. Nekztan zquitinaca jepžcu ninacaqui Jesusižquiz yawkatchičha.

³⁶ Nii aznuquiz Jesusaž jiczquiz okan, žoñinacaqui zquti chjinčičha, zquitinac juntuñ okajo chawc jilirižtakaz.

³⁷ Olivos cjita curulla watan, Jerusalén watja tjenziča. Jalla nekztanaqui tjapa niž tjaajinta žoñinacaqui altu joržtan Yooz honora wayti kallantichiča. Chipchipcan Yooz honora waytichiča, tjapa Jesusiž paata milajrunaca cherčiz cjen.

³⁸ Nižaza cjichiča:

—¡Chawc Jiliri! ¡Yooz tjuuquiz tjonchi jiliri! ¡Honorchiz cjila! ¡Arajpacha žejlñinaca cuntintuž cjee! ¡Arajpach Yoozquin wali honorchiz cjila!

³⁹ Jalla nuž Jesusižquiz honora waytitiquiztan tsjii žejlñi fariseo žoñinacaqui paljayčičha, tuž cjican:

—Tjaajiñi Maestro, tii am apzñi žoñinaca ujna ch'uj želajo.

⁴⁰ Nekztan Jesusaqui kjaaziča, tuž cjican:

—Ančhucaquiz cjiwčha, tii žoñinacaž ch'uj cjisnaquila niiqui, tii maznacamiž altu joržtan chiyasača, wejt honora waytizjapa.

⁴¹ Jerusalén watja žcatžincan, jalla nii watja cheržcu, Jesusaqui nii wajtchiz žoñinacaž cjen kaachiča,

⁴² tuž cjican:

—Jerusalén wajtchiz žoñinaca, tonj tjuñquiziqui wejt puntuquiztan intintaztasaz niiqui, zuma cuntintuž cjitasača. Walipankaz kamtasača.

Ančuca kuznaca jeejskatz pecučha. Pero wejt puntuquiztan ančucaquiztan čhojžtača. Jaziqúi ančhucqui Yooz zumanaca anaž cherasača.

⁴³ Wejt puntu ana intintazziž cjen walja anawali tjuñinacaž tjonaquiča. Nii tjuñinacquiziqui ančuca quintra žoñinacaqui tii wajtž tjiya tsjii pirka quintra paaquiča. Tjapa kjuttanž ančuca wajt muytata quintrarionacaqui želaquiča.

⁴⁴ Nižaza ančuca wajt pirkami k'ala pajltaž cjequiča. Tii wajtchiz žoñinaca ocjalanacžtanpacha contaž cjequiča. Nižaza tjappacha k'ala pampa nonžtaž cjequiča, anaž maz tawkitami želaquiča. Yoozqui anchucaquiz tsjii liwriiñi cuchanžquichiča; ančhuczi nii liwriiñiqui ana pajchinčhucča. Jalla nižtiquiztan tii wataquiča. —Jalla nuž cjichiča Jesusaqui.

JESUSAQUI TIMPLU PEWZICHA

⁴⁵ Jerusalén watja irantižcu, Jesusaqui timpluquiz luzziča. Timpluquiztan zawncchuc liwj tuyñinacami kjayñinacami tjirkatchiča.

⁴⁶ Ninacžquiz cjichiča:

—Cjijrta Yooz takuqui tuž cjiča: “Wejt kjuyaqui Yoozquin mayiziz kjuyača”. Ančhuczi tii wejt kjuya tjañi žoñinacž kjuyažtakaz paachinčhucča.

⁴⁷ Jalla nekztanaqui zapuru Jesusaqui tjaj-natcha timpluquiz. Pero timplu jilirinacami lii tjajjiñi maestrunacami wajt jilirinacami, jalla ninacazti jaknužt Jesusa coní atas, jalla nii kaznatcha.

⁴⁸ Pero tjappacha nii wajtchiz žoñinacaqui Jesusiž taku nonzjapa kuz tjaatča. Jalla nižtiquiztan

ana jaknužquiztanami nii conz puntuqui asip-tiskatz atatčha.

20

¿JECT JESUSIZQUIZ MANTICHI?

¹ Zapuru Jesusaqui timpluquiz žoñinacžquiz tjaajnatčha, y nižaza liwriiñi Yooz taku paljay-atčha. Jalla nuž tjaajnan, tsjii nooj timplu jilirinaca, lii tjaajiñi jilirinaca, wajt jilirinaca, jalla ninacaqui Jesusižquiz macjatchičha.

² Nuž macjatžcu Jesusižquiz paljaychičha:

—Jaziqui am chiyaquičha. ¿Jec am mantichi tii paazjapajo? Nižaza ¿jec jilirit am utchi jilirižtakaz cjisjapajo?

³ Nekztanaqui Jesusaqui kjaazičha, tuž cjican:

—Wejrmi jazic ančhucaguiz zakal pewcznačha.

⁴ ¿Ject Juan mantižquichi bautisjapajo? ¿Yoozkaya uz žoñinaca, ja? Kjaazna.

⁵ Jalla nuž chiitiquiztanaqui ninacpora ch'aasi kallantichičha, tuž cjican:

—¿Jaknužum cjeequi? “Yooz mantitachha” cji-can učhum kjaaznaquiž niiqui, “¿Kjažtiquiztan ančhuc nii Juan ana criichinčhuctajo?” jalla nuž cječhan tiicni.

⁶ “Žoñiž mantitacha Juanqui” cjican učhum kjaaznaquiž niiqui, tjapa žoñinacaqui učhum conačhani maztan čhjajawi. Tii žoñinacaqui Juanž puntuquiztan cjiñičha, niiqui werarapančha Yooz taku paljayñi profetaqui, jalla nii.

⁷ Nuž palt'izcu nii jilirinacaqui kjaazičha, tuž cjican:

—Wejrnacqui anal zizuča, jequit Juanqui bautisajo mantizquitčhaja, nii.

⁸ Nekztanaqui Jesusaqui cjichiča:

—Nižaza wejrqui ana zakal maznasača, jec jil-iriž mantita paa-učhaja wejrqui, nii.

ANA WAL PIYUNANACA QUINTU

⁹ Nekztanaqui Jesusaqui žoñinacžquiz paljayi kallantichiča. Paljaycan tii quintu quint'ichiča, tuž cjican:

—Tsjii patrun žoñiqui uwasanac zkala čhjaczicha. Nekztan nii zkala partira tjaachiča piyunanacžquiz. Nekztanaqui ažkquin ojkchiča ažk tjuñi kami.

¹⁰ Uwasa ajz kujicha timpu tjontan patrunaqui piyuna cuchanžquichiča niž partir zkala ricujzjapa. Nii pachpiquiz partira langzñi žoñinacazti patrunaž cuchanžquita piyuna kijchcu chjatkatchiča. Ana čhjulchiz cuchanchiča.

¹¹ Nekztanaqui patrunaqui wilta tsjiižtan piyuna cuchanžquichiča. Nekztan partir yokquiz kamñi žoñinacaqui patrunaž cuchanžquita piyuna ch'aanchiča, nižaza kijtchiča, nižaza ana čhjulchiz cuchanchiča patrunžquin.

¹² Nekztanaqui patrunaqui tsjiižtan cuchanžquichiča. Nii partira žoñinacaqui cuchanžquita piyuna chjojritchiča, nižaza chjatkatchiča.

¹³ Nižtami nii yokchiz patrunaqui pinsichiča, tuž cjican: “¿Čhjulut wej r paas? Wejt k'ayi majch cuchnača. Jalla nuž cheržcuqui nii partira žoñinacaqui rispitačhani”.

14 Pero partira zkala langzñi zoñinacazti cuchanžquita majch cheržcu, ninacpora parlassičha, tuž cjican: “Tiiqui tjappacha tii irinsa tanznačhani. Jaziqui ticž conžla. Nekztan učhumž tii zkal yokac tanznaquičha”.

15 Nuž pinsitiquiztan partira langzñi zoñinacaqui cuchanžquita majch yok tjiya jwescu conchičha.

‘Jaziqui pewcznučha:

—Nii zkal yokchiz patruaqui ¿čhjulukat nii zoñinacžtanac paačhani?

16 Wejrqui cjiwčha. Tjonžcu zkal yokchiz patruaqui partira langzñi zoñinaca conaquičha. Nekztanaqui patruaqui niž zkal yoka yejkžquin tjaaznaquičha.

Jalla nuž nii quintu nonžcu, zoñinacaqui cjichičha:

—jYooz munañpaqui anaj nii cjila!

17 Jesusaqui ninacž kjutñi cheržcu cjichičha:

—Wejt puntuquiztanaqui cjiirta Yooz takuqui tuž cjičha:

“Kjuy pirkiñinacaqui tsjii maz tjojtchičha. Nekztanaqui tjojtta mazqui isquinquiz cjissičha. Ultimquiziqui tucquin cjissičha”.

18 Nii maz cjen jakziltat ujquiz tjojtsnačhaja, jalla niiqui pirasužtakaz t'okuntaž cjequičha. Nižaza jakziltiž juntuñ nii mazqui tjojtsnaquiž niiqui, pulpužtakaz t'oknaquičha.

—Jalla nuž cjichičha Jesusaqui.

TASA PACZ PUNTU

19 Jesusaqui nii quintu chiyatčha quintra zoñinacž puntu. Jalla nižtiquiztan timplu jilirinaca, nižaza lii tjaajiñi maestrunaca, jalla

ninacaqui Jesusaqui tanz pecatĉha nii orapacha. Pero parti Źejlĉni Źoĉinaca ekskcu, ana tani atĉiĉha.

20 Pero nii quintranacaqui JesusiŹquiz tiraŹ awayt'atĉha. NiŹaza tsjii kjaŹt awayt'ini Źoĉinaca mantichiĉha, JesusiŹtan ojklajajo zuma ŹoĉiŹtakaz. NuŹ chica ojklajcan JesusiŹquiztan ana zuma taku jwes pecatĉha, uj tjojtunzjapa. Jalla nuŹ uj jwezanŹcu nii wajt chawc jilirŹquiz intirjiz pecatĉha.

21 Jalla nuŹ awayt'ican JesusiŹquiz pewcziĉha tuŹ cjican:

—Tjaajiĉni Maestro, zizuŹ wejrnacqui, am werarapan tjaajiĉnamĉha. KjaŹtam parti Źoĉinacac chiyaj cjee, amqui werarapankaz chiiĉnamĉha Yooz kamaĉn puntuqui.

22 Jaziĉqui tjaajznalla tii puntuquiztan. Wejrnacqui César cjita chawc jilirŹquiz tas paaz tjaayiiĉha. ¿Jalla nuŹ tas paaz tjaazqui wali cjesaya, uz anaŹ wali cjesaj?

23 Pero nuŹ pewcztiquiztan nonŹcu Jesusaqui ninacŹ pizc kuzziz naychiĉha. Nekztanaqui cjichiĉha:

—¿KjaŹtiquiztan anĉhucqui chawc ujquin wejr tjojtskatz pecjo?

24 Tsjii paaz zjijca, chertzjapa.

Paaz zjiĉŹcu, Jesusaqui cjichiĉha:

—¿Tii paazquiz jecŹ yujĉta? ¿NiŹaza tii paazquiz jecŹ tjuu cijirtata?

Ninacaqui kjaaziĉha:

—César cjita jilirŹ yujĉĉha, niŹ tjuuzakazza.

25 Nekztanaqui Jesusaqui ninacŹquiz cjichiĉha:

—ĉjulumi jilirŹta cjenacqui jilirŹquiz tjaa. NiŹaza ĉjulumi Yoozta cjenacqui Yoozquiz tjaa.

²⁶ Anaž jecmi Jesusižquiztan ana wal taku jwesi atasacha nii žejlñi žoñinacž yujcquiz cjican-pachaqui. Jalla nuž Jesusiž kjaaztiquiztanaqui ninacaqui ispantichiča; ch'uju cjissiča.

ZOÑINACA JACATATZ PUNTU

²⁷ Wiruñaquei tsjii kjažt saduceo cjita žoñinacaqui Jesusižtan zali ojkchiča. Nii saduceo žoñinacaqui tjaažiñitača, ticzi žoñiquei anapan jacatatasacha, nuž cjiñitača. Jalla nii jacatatz puntuquiztan Jesusižquiz paljaychiča,

²⁸ tuž cjican:

—Tjaaziñi Maestro, Moisesaquei učumnacalta cijrtkalča, tuž cjican: “Tsjii žoñi ticznasaž niiquei, niž tjun ana ocjalchiz cjesaž niiquei, nekztan nii ticzi žoñž jilaqui naa žew žon tjunatan zals waquiziča, nii ticzi jilž cuntiquiztan ocjala paaz-japa”.

²⁹ Jaziquei pakallak jilazullca želatča. Jilir jilaqui zalsiča. Nekztan ticziča ana ocjalchiz.

³⁰ Nekztanaqui tsjii taypir jilaqui žew žon tjunatan zalsizakazza. Nekztan ticzizakazza ana ocjalchiz.

³¹ Nekztanaqui yekja taypir jilaqui žew žon tjunatan zalsizakazza. Niiž jaru niž jaru naa tjunatan zalsiča tjapa nii pakallak jilazullcanacaqui. Nižaza tjappacha ticziča jilazullcanacaqui. Ana ocjala ecchipanča.

³² Ultimquiziquei naa maatak žonqui ticzinča.

³³ Jaziquei žoñinaca jacatattanaqui, ¿jakzilta jilž tjunt cjequejo naa žonjo? Tjappacha nii pakallak jilazullcaqui naa žonatan zalsiča. —Jalla nuž pewcziča saduceo quintra žoñinacaqui.

34 Jalla nižta puntuquiztanaqui Jesusaqui kjaaziča, tuž cjican:

—Tii muntuquiz žejlcanaqui luctakami maatakami zalza; nižaza maatinaca zalsjapa tjaača.

35 Jakziltat Yoozquin kuzzizlaj niiqui ticziquiztan jacatatžcu, arajpach wajtquin želaquiča. Nicju žejlcan ana zalznaquiča. Nižaza anaž zalzmi želasača.

36 Arajpachquin žejlcan, žoñinacaqui anjilažtakaz cjequiča; ana ticznasača. Nižaza jalla nuž jacatattiquiztanaqui Yooz žejtñi maatinacapanča.

37 Yooz tawk libruquiz tsjii ujsñi kal quintu žejlča. Nii quintu quint'ican Moisespachača učum zizkatchi, žoñinaca ticziquiztan jacatatñi, jalla nii. Nii Yooz tawk libruquiz Moisesqui cji-rchiča, tuž cjican: “Yooz jiliriqiu Abrahamž Yoozza. Nižaza Isaacž Yoozza. Nižaza Jacobuž Yoozza”.

38 Nii žoñinacz curpu ticziž cjenami, žejtča. Yoozqui anača ticzi žoñž Yoozqui. Niiča žejtñi žoñž Yoozqui. Tjapa Yoozquin kuzziz žoñinacaqui žejtchipan žejlča.

39 Jalla nekztanaqui tsjii kjaž lii tjajjiñi maestrunacaqui cjichiča:

—Zuma Tjajjiñi Maestro, walim chiichamča.

40 Jesusiž walja zizñi zizñi chiican quintra žoñinacaqui eksiča iya pewczjapaqui. Panž atip-tatača ninacaqui.

JESUSAQUI TSJII PEWCZICHA

41 Nekztanaqui Jesusaqui cjichiča:

—Zoñinacaqui tuž cjiñiĉha: “Cristuĉha Davidž Majchqui”. ĆKjažtiquiztan nuž cjeejo?

42-43 Davidpachaĉha cjichi Salmos cjita libruquiz, tuž cjican:

“Yooz Ejpqui wejt chawjc jiliržquiz cjichiĉha: ‘Am kjojch koztan am quintri žoñinaca t'oksnacĉha, jalla nii t'okscama wejt žew latuquiz julzi žela amqui’ ”.

44 Davidpachaĉha Cristuž puntuquiztan “Wejt chawjc jiliriĉha” cjican chiichiĉha. Jalla nižtiquiztan, Ćjaknužt Cristo chawjc jiliri cjicanpacha Davidž majch cjesajo?

JUDIO LII TJAAJIŃI MAESTRUNACZ PUNTU

45 Tjapa žoñinacaž nonznan, Jesusaqui niž tjaa-jinta žoñinacžquiz paljaychiĉha, tuž cjican:

46 —Lii tjaažiñi maestrunacžquiztan cwitaza. Ninacaqui tol zquitchiz ojklayz justasniĉha, walja honorchiz cjisjapa. Nižaza palazquiz ojklaycan zuma rispitchiž tsaanskatz pecniĉha. Nižaza ajcz kjuyquiz tucquin julz pecniĉha. Nižaza pjijstiquiz lujlcan ancha tucquin julžcu honorchiz cjiskaz pecniĉha.

47 Nižaza ninacapacha žew maatakž cusasanaca tanzjapa, incallĉha. Zoñinaca incallzjapa Yooztan ažka ažka parlitazoka cjiñiĉha. Yoozquin tjapa kuzziz žoñinacažtakaz tjeez pecĉha. Jalla nižtiquiztan ninacaqui juc'ant tsjan anawaliž castictaž cjequiĉha.

21

OFRENDA PUNTU

¹ Tsjii nooj timpluquiz žejlcan, Jesusaqui wali jiru ricach žoñinaca cherchiča ofrend cajquiz paaz uchñi.

² Nižaza tsjaa poris žew maataka cherchiča. Naa žewqui pizc paazalla utchiñča.

³ Jalla nii cheržcu Jesusaqui cjichiča:

—Tii razunal cjiwča. Taa poris žew žonqui ofrend cajquiz juc'ant jila utchiñča, tjapa parti žoñinacžquiztan.

⁴ Parti žoñinacaqui žejtchi paaz utchiča. Naa poris žewzti tjappacha naaža paaz utchiñča; ana iya žejlča, čhjeri kjayzjapa.

JUDIUZ TIMPLU PUNTU

⁵ Yekjap žoñinacaqui timplu puntuquiztan parlatča, nižaza nii timpluquiz žejlñi c'achja maznac puntuquiztan parlatča, nižaza nii Yoozquiz ofrenda tjaata puntuquiztan parlatča. Jalla nuž nonžcu timplu puntuquiztan Jesusaqui chiichiča, tuž cjican:

⁶ —Tsjii nooj tjapa tii timplu pajltaž cjequiča. Ana zinta tii maznaca pirkita želaquiča.

TII MUNTU TUCUZINZ PUNTUQUI

⁷ Jalla nektanaqui Jesusižquiz pewcziča, tuž cjican:

—Tjaajiñi Maestro, ¿čhjulator tii amiž chiita wataquejo? Ima amiž chiita takunaca watan, ¿čhjulut siñalažtakaz cjequejo?

⁸ Nektanaqui Jesusaqui cjichiča:

—Ančhucqui persunpachquiz cwitaza, anača incallskata. Walja žoñinacaqui wejt tjuu aynakcaž tjonaquiča, tuž cjican: “Wejrtča Cristutqui”. Nižaza “Wajillaž Cristuž

tjonaquiča”. Nuž cjicanž ojklayaquiča. Jalla nuž chiyamani ančhucqui anača criya, nižaza anaž ninacžtan apznaquiča.

⁹ Chjulorat quira zalz quintumi nižaza kichas zalz quintumi želačhaj niiqui ančhucqui wiraž ana tsucaquiča. Nuž: watanami imaž tii muntu tucuzinzqui irjatžcaquiča. Jalla nižta ana wali-nacača primiraqui watstanqui.

¹⁰ Jesusaqui tira paljaychiča, tuž cjican:

–Tsjii nacionžtan tsjii nacionžtan kichasaquiča nacionpora. Nacionanacquiztan quiranaca zalassaquiča.

¹¹ Nižaza pajk terremotonacaž wataquiča, yokaž chjekinskatcan. Nižaza parti yokaran wali chawc mach'a želaquiča. Nižaza parti yokaran anawal cona želaquiča. Nižaza arajpachquin anawali ispantichucanacaž parizaquiča, pajk siñalažtakaz wataquiča.

¹² Pero ima tižtanaca watcan ančhucqui tantaž cjequiča, nižaza kijčtaž cjequiča. Nižaza ajcz kjuyquin chjichtaž cjequiča uj jwesanzjapa. Nižaza carsilquiz chawčtaž cjequiča. Nižaza wali chawjc jilirž yujcquin chjichtaž cjequiča. Jalla nižtanacaž ančucaquiz wataquiča, ančucaž wejtquin kuzziz cjen.

¹³ Jilirž yujcquiz chjichta cjen, ančhucqui wejt favoraž tjurt'auquiča.

¹⁴ Ima jilirž yujcquiz tjurt'ican ančhucqui ančuca kuzquiz ana tantiiz waquiziča, jaknužt tjurt'ačhaja, jalla nii.

¹⁵ Tjurt'iñi chiiz oraqui weril zizñi taku tjaajžcača ančuca kuzquiz. Nii ančucaž zizñi

taku chiitiquiztan anaž jecmi ančuca quintra kjaazñi atasacha. Inakaz cjisnaquiča.

¹⁶ Ančucqui tarasuntaž cjequiča. Maa ejp, jilanaca, famillanaca, mazinaca, jalla ninacžquiztanami tarasuntaž cjequiča ančucqui. Nekztan yekjap ančucaquiztan contaž cjequiča.

¹⁷ Nižaza wacchi tii muntuquiz kamñi žoñinacaqui ančucaquiz chjaawjkataquiča, weriž cjen.

¹⁸ Jalla nuž cjenami anaž zinta ančuca ach charami pertiskatta cjequiča.

¹⁹ Nižaza sufrichiž cjenami jakziltat zumpacha Yoozquin tjurt'ichi cječhaja, Yooztan wiñaya cuntintu kamaquiča.

²⁰ Jesusaqui cjichizakazza:

—Jerusalén watja zultatuž muyuntita cjen, ančucqui naaznaquiča, ultimu nii watjaqui t'ezintaž cjeekalaka, jalla nuž cjequiča ančucqui.

²¹ Jalla nuž naazcan, Judea yokquin žejlñi žoñinacaqui cur kjutñi zajtcu atipz waquiziča. Nižaza Jerusalén wajtchiz žoñinacaqui wajtquiztan ulanz waquiziča. Nižaza joch yokquin žejlñi žoñinacaqui ana wajtquin quejpsquiz waquiziča, atipz waquiziča.

²² Nii noojiqui Yoozqui Israel žoñinaca casticaquiča. Casticz puntuquiztan tjapa Yooz tawk libruquiz cijirtaqui cumplisnaquiča.

²³ ¡Ic maatakanacajay! ¡Wawa t'ichiñi maatakanacajay! Ancha ana wali sufraquiča. ¡Tjapa tii yokquiz žejlñi žoñinacajay! Ančaž

llact'azaquiĉha, castictaž cjequiĉha.

²⁴ Zoñinacaqui quirquiz ticziž cjequiĉha. Yekjap zoñinacacazti tanžcu chjichtaž cjequiĉha yekja nacionquin. Nižaza yekja wajtchiz zoñinacaqui tii wajtchiz zoñinaca mantaquiĉha, nii yekjanacž timpu tucuzinžcama, nižaza Yooz munañpa timpucama.

²⁵ Jalla nekztanaqui tjuñquizimi jiizquizimi warawarquizimi, jalla ninacžquiz siñalanaca wataquiĉha. Nižaza pajk kot ljojkiž kjawaquiĉha. Jalla nižtiquiztan tii yokquiz žejlñi zoñinacaqui walja tsucchi kuzziz cjequiĉha, nižaza turwayžinta kuzziz cjequiĉha.

²⁶ Arajpachquin žejlñi kjananacami ĉhjekinskattaž cjequiĉha. Jalla nii cheržcu zoñinacaqui pinsaquiĉha, tii muntu kjažt wataquejo, jalla nii. Tii muntu tucuzinz tjewznaquiĉha. Jalla nižta watan zoñinacaqui tsucscukaz tismayaquiĉha.

²⁷ Jalla nekztanaqui zoñinacaqui wejr, nii tsewtan cuchanžquita Yooz Zoñi, quejpžquiñi cher-aquiĉha. Walja kjancan wejt azi tjeežcan tsjir taypiquiz tjonaĉha.

²⁸ Jalla nižta anawalinaca wati kallantan, anĉhucqui walja Yoozquin kuzziz cjee. Achamiž wayta, tsewcchucĉha cherzna. Wajillaž anĉhuca ultim liwriiz tjuñi tjonaquiĉha.

²⁹ Nižaza Jesusaqui tii quintu quint'ichiĉha tuž cjican:

—Higo muntiquiztan naazna; ĉhjul muntimi naazna.

³⁰ Anĉhucmi tsjii munti ch'ojñapachaž c'ajan tuž zizza, kjutunz timpu žcatžinĉha, jalla nii.

³¹ Jalla nižta irataž tii weriž chiitanaca watan, ančhucqui tuž zizaquiča, Yooz mantiz tjuñi žcatžinča, jalla nii.

³² Tii razunal cjiwča. Ima tjapa tii timpuquiz kamñi žoñinacaž ticznán, tjapa weriž chiitanaca wataquiča.

³³ Arajpachami yokami tucuzinznaquiča. Wejt takuzti anapanž tucuzinznaquiča, panž cumplisnaquiča.

³⁴ Ančhucqui persunpachquiz cwitaza. Ančhucqui anaž turpi kuzziz cjee. Ana wali kamz cjen, nižaza licz cjen, nižaza tii wir cusasanacžquiz kuz tjaaž cjen, jalla nuž cjen žoñinacaqui turpi kuzzizza. Ana zuma kaman Yooz tjonž tjuñi tiripintit ančhuc tanaquiča

³⁵ tsjii trampaqui tiripintitž tanža, jalla nižta irataž Yoozqui tii muntuquiz ana wali kamñi žoñinaca tiripintit tanaquiča, casticzjapa.

³⁶ Ančhuczti listu tjaczi tjewzñi cjee. Zapuru ančhucqui Yoozquiztan azziz cjisjapa mayiza, tjapa watñi anawalinacquiztan atipzjapa, nižaza tsewctan cuchanžquita Yoož Žoñž yujcquiz zuma prisintizjapa.

³⁷ Jalla nuž tjaažinchiča Jesusaqui. Majiñqui Jesusaqui timpluquiz tjaažnatča zapuru. Weenqui Olivos cjita curullquin želi okatča.

³⁸ Tjapa žoñinacaqui wentan timpluquiz tjonatča Jesusiž taku nonžñi.

22

JESUSA TANZ TANTIITA

¹ Jalla nekztanaqui ana liwaturchiz t'anta lujlz pjijsa irantižcatcha. Nii pjijsaqui pascua cji-tatača.

² Nii oraqui timplu jilirinacami lii tjaajiñi maestrunacami, “¿Jaknužt Jesusa conas?” cjican kazziča. Pero ninacaqui parti žoñinaca walja ekscu, ana coni atchiča.

³ Jalla nekztanaqui Satanás cjita zajraqui Judas kuzquiz luzziča. Judasqui Iscariote cji-tazakaztača. Judasqui parti tuncapan illzta žoñinacžquiztan nekztantača.

⁴ Judasqui timplu chawc jilirinacžtanami, timplu zultatž jilirinacžtanami parli ojkchiča. Ninacžtan zalžcu, parličiča, jaknužt ninacž kjarquiz Jesusa intirjas, jalla nii.

⁵ Jalla nuž Judas parlitiquiztan quintra žoñinacaqui ancha cuntintutača. Paaz tjaaz compromitchiča.

⁶ Jalla nižtiquiztan Judasqui asiptičiča, “Way” cjican. Nekztanaqui tantiya kallantičiča, jaknužt ana tama žoñi želan Jesusa intirjas, jalla nii.

SANTA CENA PAACHICHA

⁷ Jalla nekztanaqui ana liwaturchiz t'anta lujlz pjijsaqui irantižquichiča. Nii pjijsaqui tsjii uuzi wilana conspantača, pascua pjijsa paazjapa.

⁸ Nekztanaqui Jesusaqui pucultan niž tjaajintanaca cuchanchiča. Pedružtan Juanžtan ninacatača. Ima cuchancan ninacžquiz tuž cjichiča:

—Ančhucquiž oka, učhumnacaž pascua čhjeri lujljzapa, tjaczca.

⁹ Nekztanaqui nii pucultan tjaajintanacaqui Jesusižquiz pewcziča, tuž cjican:

—¿Jakziquin wejrnacqui čhjeri tjacznaquiya?

¹⁰ Jesusaqui kjaaziča, tuž cjican:

—Ančhucqui watja luzcu, tsjii žoňžtan zalaquiča kjaz luuz kuzzi. Nii žoňž wirquiz apznaquiča, jakziquin luzáčhaja, jalla neksz.

¹¹ Jalla neksz luzcu nii kjuychiz žoňžquiz paljayaquiča, tuž cjican: “Wejt Tjaajiňi cjiča: ¿Jakziquin visitz kjuya žejlya, wejt tjaajintanacžtan pascu čhjeri lujlžjapaya?”

¹² Nekztanaqui tsewcta pisuquiz tsjii pajk kjuya tjeeznaquiča ančhucquiz. Nii kjuya listu tjaczta cjequiča. Jalla neksz čhjeri lujlž tjacznaquiča.

¹³ Jalla nekztanaqui nii pucultanaqui ojkchiča. Nekztan Jesusiž chiitacama watchiča. Jaziqi nekziqi pascu čhjeri kissiča.

¹⁴ Pascu čhjeri lujlž ora cjen, Jesusaqui niž illzta žoňinacžtan misquiz julziča.

¹⁵ Jalla nuž julžcu Jesusaqui ninacžquiz cjichiča:

—Wejrqui ančhucatan tii pascu pijjsta čhjeri lujlžjapa ancha pecchinpanča, ima ticzan.

¹⁶ Ančhucquiz cjiwča, ančhucatan ana iya tii pijjsta paacha, čhjuloracamat Yooz ultimu tjapa mantačhaja, jalla nii oracama. Nekztan tii pijjsta wilta paa-ača.

¹⁷ Jalla nekztanaqui Jesusaqui persun kjaržtan wasu tanziča. Nekztan Yooz Ejpžquin sparaquiž cjichiča. Nekztanaqui niž illztanacžquiz cjichiča:

—Tii wasu tanžna. Ančhuccama tojžcuqui liczna.

18 Tekztan nawjkchuc wejrqui uwas kjazqui anal iya licača, čhjuloracamat Yooz tjapa mantachaja, niicama.

19 Jalla nii licžcuqui, Jesusaqui persun kjaržtan t'anta tanzicha. Nekztan Yooz Ejpžquin sparaquiž cjichiča. Nekztanaqui t'anta kjolžcu niž illztanacžquiz tjaachiča, tuž cjican:

—Tiiča wejt curpuž cuntaqui. Tii wejt curpuqui intirjitaž cjequiča ančhuca laycu. Nižaza wejr cjuñžcu, tii lujlznaquiča.

20 Nekztan čhjeri lujlžcu, wasu tanzicha. Nekztan niž tuqui chiita taku irata chiichizakazza, tuž cjican:

—Wejt ljocqui ančhuca laycu tjawktaž cjequiča. Wejt ljocžtan ew žejtz kamaña ut'aytaž cjequiča. Tii wazuquiztan liczqui wejt ljoc cuntiquiztanča.

21 Wejt quintra tarasunñi zoñiqui wejttan chicapachača tii misquiz.

22 Wejrqui tsewctan cuchanžquita Yooz Zoñtča. Wejrqui Yooz Epiž munañpi jaru jalla nii kamañ jiczquiz okača. Wejt quintra tarasunñi zoñžquizzti anawaliž cjisnaquiča.

23 Jalla nuž chiitiquiztan tjaajinta zoñinacaqui ninacpora pewcsassiča:

—¿Jequit wejrnaquiztan nii tarasunñi zoñi cjes?
—Nuž cjican ninacpora pewcsassiča.

¿JEQUIT TUCQUIN CJEEQUI?

24 Jalla niž wiruñaquei nii tjaajintanacaqui ch'aassiča, ject tucquin naazi cjeequi, jalla nii.

25 Pero Jesusaqui ninacžquiz cjichiča:

—Chawc jilirinacaqui persun wajtchiz zoñinaca mantiñicha anawal patrunažtakaz. Nižaza nii jilirinacaqui mantita zoñinacžquiz jilirž hono-rakaz waytiskatča, “walipan paača tii jiliriqiu”, cjičan.

²⁶ Ančhuczti anaž nižta paaz waquiziča. Antiz ančhucqui tižta paaz waquiziča. Jakziltat tsjan chawc jilirizlaj niiqui, tjowažtakaz cjis waquiziča. Nižaza jakziltat mantiñizlaj niiqui, piyunažtakaz cjis waquiziča.

²⁷ ¿Ject tucquin chekan zoñejo? ¿Misquiz julzñi zoñej chekanaqui? Už ¿nii misquiz atintiñi zoñej, jaa? Tii razunal cjiwča: Misquiz julzñi zoñiča tucquin chekanaqui. Jalla nuž cjenami wejrqui ančhucaporquiz atintiñi zoñižtakaztča.

²⁸ ‘Ančhucqui wejttan chica žejlchinčhucpanča wejtquiz anawali watanami. Wejtquiztan ana zarakchinčhucča.

²⁹ Jalla nižtiquiztan wejrqui ančhuc učača, mantiñi jilirinaca cjisjapa. Jaknužt wejt Yooz Ejpqui mantiñi jiliri cjisjapa wejr utčaja, jalla nižta.

³⁰ Jalla nuž cjen ančhucqui arajpach wajtquin wejttan chica želaquiča, nižaza wejttan chica lujlznaquiča. Nižaza nekziqiu wejttan chica jilirž sillquiz julznaquiča tuncapan Israel t'akquiz žoninaca pjalzjapa.

*SIMON PEDRUQUI JESUSA ANA PAJÑI
CHIYAQUICHA*

³¹ Nekztan Jesusaqui cjichiča:

—Simona, Simona, tiim zizaquiĉha amqui. Satanasqui am pecĉha, niĭž parti cjiskatzjapa. Trigožtakaz layinz pecĉha, ujquiz tjojtskatzjapa.

³² Simona, am laycu tjurt'izinchinĉha ana juc'anti upa kuzziz cjeyajo. Amqui Yoozquin tjapa kuztan quejpžcu am jilanaca yanapaquiĉha tjup kuzziz tjurt'ajo.

³³ Nekztanaqui Simonaqui cjichiĉha:

—Wejt Jiliri, wejrqui listuĉha amtan chica ojkszjapa; carsilquizimi lusasaĉha; nizaza amtan chicapachami ticsnasaĉha.

³⁴ Jalla nuž chiitiquiztanaqui Jesusaqui cjichiĉha:

—Pedro, amquiz chiyuĉha, ima wallpaž kjawan, amqui wejt puntuquiztan nicaquiĉha. Chjep wilta wejr ana pajnim chiyaquiĉha.

JESUSIZ CHIIZINTA TAKUNACA

³⁵ Jalla nekztanaqui Jesusaqui paljaychiĉha, tuž cjican:

—Tuquiqui wejrqui anĉhuc cuchanchinĉha ana quelzziz, niĭžaza ana paazziz, niĭžaza ana yekjat ĉhjatchiz. Jalla nuž okan ĉanĉhucaquiz ĉhjulut pjaltichiya?

Nekztanaqui ninacaqui kjaaziĉha:

—Anaž ĉhjulumi pjaltichiĉha, —cjican.

³⁶ Nekztanaqui Jesusaqui ninacžquiz cjichiĉha:

—Anziqui jakziltat quelzziz cjeĉhaja, nii quelzqui ĉhjicha. Niĭžaza jakziltat paazziz cjeĉhaja, nii paazqui ĉhjicha. Jakziltat ana armichiz žejlĉhaja, persun chaquita tuyžla, arma kjayžjapa.

³⁷ Ančucaquiz chiyučha. Wejt puntuquiz-tanaqui Yooz takuqui tuž cjičha: “Castictaž cjequičha anawal žoñinacžtan chica”. Wejt persunquiz cumplistančha nii cjiřta Yooz takuqui. Nižaza tjapa cjiřta Yooz takuqui wejt puntuquiz-tan cumplistančha.

³⁸ Jalla nekztanaqui ninacaqui cjichičha:

—Wejt Jiliri, tekzi pizc arma žejlčha.

Jesusaqui kjaazičha:

—Nužquizka cjila, —cjican.

JESUSAQUI YOOZ EJPZQUIN MAYIZICHICHA

³⁹ Jalla nekztanaqui Jesusaqui ulanchičha. Olivos cjita curullquin ojkchičha, jalla nicju ojkñipantačha. Tjaajinta žoñinacaqui Jesusižquiz apzičha.

⁴⁰ Olivos cjita curulla irantižcu, Jesusaqui cjichičha:

—Yooz Ejpžquin mayiza ana ujquiz tjořtsjapa.

⁴¹ Nekztanaqui Jesusaqui niž tjaajintanacžquiztan žoñiž maz čhjacta, jalla nužullquin ojkchičha. Jalla nicju quillsičha Yooz Ejpžquin mayizizjapa.

⁴² Mayizican cjichičha:

—Yooz Tata, amqui munaquiž niiqui, wejr li-wriyalla tii sufrisquiztan. Pero anal wejt kuzcama ojkz pecučha. Jaknuž am kuz munčhaja, jalla niicama ojkz pecučha.

⁴³ Jalla nii oraqui arajpachquiztan tsjii Yooz Epiž cuchanžquita anjilaqui jecžquichičha, Jesusa azi tjaazjapa.

⁴⁴ Jesusaqui jalla nuž ancha llact'azcan, tjapa aztan Yoozquin mayizatčha. Jalla nuž mayizan

ancha pjalñi pjatziĉha ljocžtakaz ĉhjujatĉha yok kjutñi.

⁴⁵ Yoozquin mayiziz žeržcu, tsijtsiĉha Jesusaqui. Nekztanaqui niiž tjaajintanacžquiz quejpĉiĉha. Ninaca llaquizinpantiž tjajatĉha. Nuž cjen Jesusaqui tjajñi zalĉiĉha.

⁴⁶ Jalla nekztanaqui Jesusaqui ĉjichiĉha:
—¿Anĉhucqui kjažtiquiztan tjaj-jo? Zaazna, Yoozquin mayiza ana ujquiz tjojtsjapa.

JESUSA PRESO TANTA

⁴⁷ Jesusaž ima parla žerznan, walja žoñinaca tjonĉiĉha. Judas ĉjita žoñiqui tucquinpan tjonĉiĉha. Judasqui nii tuncapan illzta žoñinacž partiquiztantāĉha. Nekztan Jesusižquin macjatchiĉha ĉjulzjapa.

⁴⁸ Jesusaqui Judasquiz ĉjichiĉha:
—Judas, ¿wejr tsjii ĉjulžcum amqui tarazu-naquiya? Wejrtĉha Yooz cuchanžquita žoñtqui.

⁴⁹ Jesusižtan žejlñi žoñinacaqui jalla nižta ĉeržcu, pewĉziĉha, tuž ĉjican:

—Wejt Jiliri, ¿cuchillu armižtan tjurt'aquiya?

⁵⁰ Tsjii nii tjaajintanacžquiztan timplu jilirž piyuna ĉhjojritĉiĉha, žew ĉjuñi ĉhajtžinĉiĉha.

⁵¹ Pero Jesusaqui ĉjichiĉha:
—Nužquizkaz ĉjee. Armižtan ana iya tjurt'aquiĉha.

Nekztanaqui nii orapacha Jesusaqui nii piyunž ĉjuñi lanžcu ĉhjetinĉiĉha.

⁵² Timplu ĉawc jilirinacami nižaza timplu zultatž jilirinacami, nižaza wajt jilirinacami, jalla ninacami Jesusa preso ĉhjichi tjonĉiĉha. Niacžquiz paljayĉiĉha Jesusaqui, tuž ĉjican:

—¿Kjažtiquiztan ančhucqui cuchillu armižtan, nižaza tuñžtan tjonchinčhucta, wejr tanzjapaya? ¿Wejrqui tjañ žoñtkaya?

⁵³ Zapuru timpluquiz kamchinča ančhucatan chica. Nii oraqui wejr ana kjaž cjichinčhucča. Pero anziča ančuca tanz oraqui. Tii orakaz zumchiquiz kamñinacaqui mantasača.

PEDRUQUI JESUSA ANA PAJÑI CHIICHICHA

⁵⁴ Jalla nekztanaqui žoñinacaqui Jesusa preso tanchičha. Tanžcu timplu chawc jilirž kjuya chjitchičha. Pedruqui ažkquiztanalla apziča.

⁵⁵ Jalla nii jilirž kjuy patio taypiquiz tsjii uj luminaru taaziča. Žoñinacaqui uj muytata julzi želatča. Nižaza Pedruqui ninacžtan chica julzi želatča.

⁵⁶ Jalla nuž uj kjanquiz julzi želan, tsjaa piyun žonqui Pedro žejlñi cherchinča. Nekztan naaqui cjichinča:

—Tii žoñiqui nii žoñžtan chica ojklayñitala, niž tiic, ¿ana jaa?

⁵⁷ Pedruzti nuž cjitiquiztan nicchičha, tuž cijican:

—Cullaca, nii žoñi anal pajuča.

⁵⁸ Jalla niž wiruñpacha, tsjiizuñ Pedro cherchizakazza. Jalla nuž cheržcu, cjichičha:

—Amqui nii parti žoñimla.

Nekztanaqui Pedruqui kjaaziča; tuž cijican:

—Anapanča wejrqui.

⁵⁹ Tsjii orquiztanaqui yekja žoñiqui paljaychizakazza, tuž cijican:

—Ultim werara, tii žoñiqui nii žoñžtan chica ojklayñipantala. Tiiqui Galilea wajtchiz žoñizakazla.

60 Jalla nekztanaqui Pedruqui cjichiča:

—Jila, čjulukam nižta chiičhani, anal zizuča.

Jalla nuž chiyan nii orapachaqui tsjii wallpi jora kjawchiča.

61 Jalla nuž wallpi jora kjawan, Jesusaqui Pedruž kjutñi kjutžcu cheržquichiča. Jalla nižtiquiztan Pedruqui, Jesús Jilirž tuqui chiita cjuñziča. Tuquiqui Jesusaqui cjichiča: “Ima wallpaž kjawan, amqui wejt puntuquiztan nicaquiča. Čjep wilta wejr ana pajñim chiyaquiča”.

62 Jalla nuž watžcu, Pedruqui ulanchiča. Nuž ulanžcu ancha kaachiča, Jesusa ana pajñi chiižcu.

63 Jesusa itzñi žoñinacaqui walja iñarchiča. Nižaza Jesusa wjajtchiča.

64 Nižaza Jesusiž čhjujcuqui chawjczinžcu yujcquiz kijtchiča, tuž cjican:

—¡Tantiyalla! ¿Ject am kijchjo?

65 Nižaza niž quintra čjul anawalinacami chichiča, nuž iñarchiča.

JESUSA JILIRINACZ YUJCQUIZ CHJICHTA

66 Tjuñiž tjewctanalla, tjapa judío jilirinacaqui juntassiča, wajt jilirinacami, timplu jilirinacami, lii tjajjiñinacami, jalla ninacami. Jalla nekztanaqui Jesusa chawjc parliz kjuya chjitchiča. Nicju ajczi jilirinacžquin apantichiča. Nekztan jilirinacaqui nižquiz pecunchiča, tuž cjican:

67 —Jaziqui am chiya, ¿ampanim Cristumpanikaya?

Jesusaqui kjaaziča, tuž cjican:

—Wejrqui “jesalla” cjež niiqui, anaž wejr criyaquič ančhucqui.

⁶⁸ Nižaza wejrqui ančhucquiz pewcznaž ni-iqui, anaž wejr werara kjaazta cjeeča. Nižaza wejr anaž cujtznacuiča

⁶⁹ Wejrqui tsewctan cuchanžquita Yooz Zoñtča. Tekztanpacha wejrqui tjapa azziz Yooz Ejpž žew latuquiz julzil cjeeča. —Jalla nuž kjaaziča Jesusaqui.

⁷⁰ Jalla nekztanaqui tjapa nii žejlñi žoñinacui pecunchiča, tuž cjican:

—¿Am Yooz Majchimpanikaya?

Nekztan Jesusaqui kjaaziča, tuž cjican:

—Wejrpanča, ančhucž pecunča, jalla nužupanča.

⁷¹ Jalla nekztanaqui ninacui cjichiča:

—¿Čhjul juc'antiž tisticu tumpasajo? Učhumpachala niž persun ata chiiñi nonztaqui, ana wali chiichiča, “Yooz Majchča wejrqui” cjican.

23

JESUSIZTAN PILATO CJITA JILIRZTAN

¹ Jalla nekztanaqui tjapa nii žejlñi jilirinacui tsijtsiča. Nekztanaqui Jesusa chjitchiča Pilato cjita jiliržquin.

² Jalla nicju uj tjojtñi kallantichiča, tuž cjican:

—Wejrnacui tii žoñi wajtchinča, tii wajtchiz žoñinacžquiz anawaliž aptjapcan zelatča. Jalla nuž wajtchinča. Tii žoñizakaz cjiča: “Učhumqui Romanž jilirž tasa ana tjaz waquiziča” jalla nuž cjiča tiiqui. Nižaza cjiča, “Wejrtča Yooz

cuchanžquita Cristutqui”. Nuž cjican, cjičha, “Wejrtčha chawc jiliritqui”.

³ Jalla nekztanaqui Pilato cjita jiliriqúi tuž pewczičha:

—¿Judío wajtchiz žoñinacž chawc jilirim amya?

Nekztan Jesusaqui kjaazičha, tuž cjican:

—Jalla nužupančha, am nuž chiita, jalla nii.

⁴ Nekztanaqui Pilatuqui timplu chawc jilirinacžquiz, nižaza žejlñi žoñinacžquiz cjichičha:

—Anal tii žoñžquiz čhjul ujmi wačučha.

⁵ Nii žoñinaczi ancha ujquiz tjojtskatz pecatčha. Jalla nižtiquiztan cjichičha:

—Tii žoñiqúi niž tjaajintiztan waljaž tjojktila tjapa Judea yokquin žejlñi žoñinacaqui. Primiraqui Galilea yokquinž nižta paatčha tiiqúi. Jaziqúi tekzi nižtazakaz paačha.

JESUSA HERODIZQUIZ CHJICHTA

⁶ Jalla nuž nonžcu, Pilatuqui pewczičha, tuž cjican:

—¿Tiiqúi Galilea yokchiz žoñikaya?

⁷ “Jesalla” cjican kjaaztan, Pilatuqui Herodes cjita Galilea chawc jiliržquin nii Jesusa cuchanchičha. Herodesqui Jerusalén wajtquiz želatčha nii ora.

⁸ Jesusa cheržcuqui Herodesaqui ancha cuntintučha. Walja niž puntuquiztan quintunaca nonchičha. Jalla nižtiquiztan ažkanaca Jesusižtan zalz pecatčha. Jesusa milajru paañi cherz pecatčha.

⁹ Herodesaqui walja pewcñi kallantichičha. Pero Jesusazi ana kjaazñi žejlchičha.

¹⁰ Jalla nicju zakaz timplu jilirinacami lii tjaa-jiñinacami chicapacha želatča. Ninacaqui walja Jesusiž quintra chiichiča, uj tjojtunzjapa.

¹¹ Herodesaqui zultatunacžtan Jesusa iñarchiča. Burla paachiča. Zultatunacaqui Jesusižquiz chawc jilirž punchu tjutziča. Jalla nekztanaqui Herodesaqui wilta Pilatužquin cuchanžquichiča.

¹² Nii oraqui Herodestan Pilatužtan amigo pajassitača. Niiž tuquiqui quintratača.

JESUSA PILATUZQUIN CUCHANTA

¹³ Jalla nekztanaqui Pilatuqui juntjapchiča timplu jilirinacami wajt jilirinacami, nižaza žoñinacami.

¹⁴ Juntjapžcu, cjichiča:

—Ančhucqui wejtquiz tii žoñi zjičchinčhucča, tuž cjan: “Tii žoñiqui žoñinacaž aptjapñiča”. Nekztanaqui ančuca yujcquiz tiižquiz pecunchinla. Jalla nuž pecuntiquiztan tii žoñž ujqui ana watchinpanla, anchucaž tii žoñžquiz uj tjojtuntiquiztanaqui.

¹⁵ Herodesaqui nižazakaz ana čjul ujmi watchiča. Jalla nižtiquiztan wilta wejtquin cuchanžquitača. Ziza ančhucqui, tii žoñiqui anapanž ticz waquiziča.

¹⁶ Jaziqui cunkal casticača, nekztanaqui cut-snača.

¹⁷ Nii pjištiquiz cjenaqui Pilat jiliričiqi cuzturumpichiztača, tsjii pres žoñi liwrii cuts, jalla nii. Nii cuzturumpi paañitača žoñinacž kuz wali cjisjapa.

¹⁸ Jalla nuž Pilatuž chiitiquiztanaqui tjappacha nii žoñinacaqui kjawi kallantichiča, tuž cjan:

—¡Panž chjichla tiiqui! ¡Antiz Barrabás cutsla!

¹⁹ Jalla nii Barrabasqui carsilquiz chawc-tatača, nii wajtquin jilirž quintra žoñinaca aptjaptkalča, y nižaza žoñiž contkalča. Jalla nižtiquiztan carsilquiz chawjctatača.

²⁰ Pilatuqui Jesusa cuts peccan žoñinacžquiz wilta paljaychiča.

²¹ Nii žoñinacazti juc'anti altu joržtan kjawchiča, tuž cjican:

—¡Cruzquiz ch'awczna! ¡Cruzquiz ch'awczna!

²² Chjep wiltiquiz Pilatuqui paljaychiča tuž cji-can.

—Tii žoñi, ¿chjul anawali paachejo? ¡Wejrqui tii žoñž uj ana wachula! ¡Anaž ticž waquiziča tiiqui! ¡Jaziqui cunkal casticača, nekztanac cutsnača!

²³ Pero nii žoñinacazti juc'anti kjawchiča, “Cruzquiz ch'awczna” cjican. Timplu jilirinacami žoñinacami ancha kjawchiča, Pilatuž kuz atipscama.

²⁴ Jalla nuž kjawtiquiztan Pilatuqui ninacž kuz-cama paachiča. Jesusa cruzquiz ch'awczcajo mantichiča.

²⁵ Nižaza Pilatuqui Barrabás cjita žoñi cutziča žoñinacž kuzcama. Nii Barrabasqui carsilquiztača, jilirž quintra žoñinaca aptjaptiquiztan, nižaza žoñi contiquiztan. Pilatuqui Jesusa intirjichiča nii žoñinacž kuzcama wali cjejajo.

JESUSA CRUZQUIZ CH'AWCTA

²⁶ Jalla nekztanaqui zultatunacaqui Jesusa chjitchiča, cruzquiz ch'awczjapa. Jalla nuž chjichan tsjii žoñi tanziča cruza tjuzjapa. Nii žoñiqui Cirene wajtchiztača, Simona cjitatača.

Jochquiztan tjonat'cha. Jalla nuž Simona tanžcu zultatunacaqui Jesusiž cruza tjuzzi'cha. Nekztan Jesusiž wirquiz ojkkatchi'cha.

²⁷ Walja žoñinacaqui apznat'cha. Walja maatakanaca kaacan kjawcan ancha llaquita apzicha.

²⁸ Pero Jesusaqui maatakanacžquiz cheržcu paljaychi'cha, tuž cjican:

—Jerusalén wajtchiz maatakanaca, wejtquiztan ana kaa. Ančhuca persunjapa nižaza ančhuca maatinacžquiztan kaa.

²⁹ Tsji ora tjonauči'cha. Nii oraqui žoñinacaqui sufris cjen chiyaqui'cha, “Ana majtñi maatakanacaqui cuntintuž cjequi'cha. Nižaza anaž icchi maatakanacaqui cuntintuž cjequi'cha. Nižaza anaž piz t'ichiñi maatakanacaqui cuntintuž cjequi'cha”.

³⁰ Nii ora zakaz žoñinacaqui walja sufris cjen curunacžquiz paljayaqui'cha, tuž cjican: “Wejtnac juntuñ tjojtžca”. Nižaza lumanacžquiz cjequi'cha, “Wejrnacž chjojsna, tsji tjatta cunta”.

³¹ Tsji ch'ojñi muntiquiz tižta paaquiž niiqui, kjoñ muntiquiz juc'ant ana wali paaqui'cha. — Jalla nuž paljaychi'cha Jesusaqui.

³² Zultatunacaqui pucultan tjañinaca cruzquiz ch'awczjapa chjitchi'cha Jesusižtan chica.

³³ Calavera cjita yoka irantižcu, Jesusa cruzquiz ch'awcchi'cha. Nižaza nii pucultan tjañinaca cruzquiz ch'awctazakazta'cha, tsji tjañizti žew latuquiztan, tsji tjañizti zkar latuquiztan.

³⁴ Cruzquiz ch'awctan, Jesusaqui cjichi'cha:

—Yooz Tatay, tii žoñinaca pertuna, čhjulut paačhaja, anaž intintiča ninacaqui.

Nii ora zultatunacaqui Jesusiž zquiti tanzjapa, zurtiyassiča.

³⁵ Jalla nekzi žoñinacaqui walja chekznatča. Jilirinacami ancha burla paachiča, tuž cjican:

—Tiiqui yekjanaca liwriičiča. Ultim werar Cristumčhalaj niiqui, Yooziž illztamčhalaj niiqui, persunpacha liwriyalla.

³⁶ Nižaza zultatunacaqui burla paachiča. Mac-jatžcu jar vinu tirinčiča.

³⁷ Nižaza cjichiča:

—Amqui judionacž chawc jilirimčhalaj, niiqui, persunpacha liwriyalla.

³⁸ Nižaza cruzquiz Jesusiž ach juntuč litranaca cijrtatača. Čhjep tawkquiztan cijrtatača, griego taku, latín taku, hebreo taku. Jalla tuž cijrtatača: “Tiiča judionacž chawc jiliričui”.

³⁹ Tsjii ch'awcta tjañi žoñiqui Jesusižquiz ana wal taku čiičiča, tuž cjican:

—Amqui Cristumčhalaj niiqui, persunpacha liwriyalla. Nižaza wejrnacmiž liwriya.

⁴⁰ Tsjii ch'awcta tjañizti nii tjañ mazquiz ujziča, tuž cjican:

—Amqui cruzquiz ch'awctazakazza. ¿Am anam Yooz eks, kjažtatajo?

⁴¹ Učhumqui ujquiztan sufristanča. Cruzquiz ch'awcta cjispanz waquiziča. Tii žoñizti ana čhjul ujchizza.

⁴² Nekztan nii tsjii tjañ žoñiqui Jesusižquiz pal-jayčiča, tuž cjican:

—Jesusa, čhjulatorat amqui mantiz kallantačhaja, jalla nii ora wejr cjuñznalla.

⁴³ Nekztanaqui Jesusaqui kjaazičha, tuž cjican:
 —Weraral amquiz cjiwčha, tonjtanpacha amqui wejttan chica cjequičha, Paraíso cjita zuma yokquinaqui.

JESUSAQUI TICZICHA

⁴⁴ Nii oraqui taypuruž cjisnatčha. Tjapa nii yokaqui zumchi cjissičha, majñakak oracama.

⁴⁵ Tjuñiqui zumchi cjissizakazza. Nižaza pajk timplu cortina chicata wjajrzičha.

⁴⁶ Jalla nekztanaqui Jesusaqui altu joržtan kjawchičha, tuž cjican:

—Yooz Tatay, am kjarquiz wejt animu cumpjiyučha.

Jalla nuž chiižcu, ticzičha.

⁴⁷ Jalla nuž watchi cheržcu tsjii romanž zultat jiliriqui Yooz honora paljaychičha, tuž cjican:

—¡Ultim weraratakalčha, tiiqui lijitum žoñitakalčha! Ana ujchiztakalčha.

⁴⁸ Nižaza nuž watchi cheržcu tjapa nii cherñi žoñinacaqui ancha llaquita ojkchičha.

⁴⁹ Jesusiž mazinacami nižaza nii Jesusa Galilea wajtquiztan apzi maatakanacami ažkquiztan chekzcan quirchičha. Tsijtsucakaz cheksičha nii watñiqui.

JESUSIZ CURPU SIPULTURQUIZ TJATZTA

⁵⁰ Tsjii zuma žoñi želatčha José cjita. Yooz mantitacama kamñitačha. Judea yokquin Arimatea wajtchiz žoñitačha. Judiuž jilirinacž partitačha.

⁵¹ Nii zuma Josequi Yooz mantiz tjuñiž tjewsñipantačha. Nižaza niiqui anatačha Jesusa konz kuzzizqui parti jilirinacžtanaqui.

52 Nekztan Pilatužquin ojkchiča Jesusiž curpu mayi.

53 Nekztanaqui Josequi Jesusiž curpu cruzquiztan apakžcu tsjii wali pajk pañužtan capziča. Nekztanaqui sipulturquiz tjazziča. Nii sipulturuqui wali pajk mazquiz pjettatakalča. Anatakalča yekja almami tjatta niiqui.

54 Jeejz tjuñi žcatžintiquiztan, žoñinacaqui tjacz-natča jeejz tjuñquiz žejlžjapa.

55 Nii Galilea yokquiztan Jesusižtan chica tjonchi maatakaqui Juzquiz apziča, Jesusiž sipulturu cheri, jaknužt tjaztazlaja, nii cheri.

56 Jalla nekztanaqui persun kjuya quejpžcu, zuma ulurchiz aceitenaca nižaza tjajlinz cre-manaca jalla nii tjazziča. Nekztanaqui jeejz tjuñquiziqui jeejziča, judiuž lii jaru.

24

JESUSAQUI JACATATCHICHA

1 Tumincuqui simana kalltiznan maatakanacaqui Jesusiž sipultura ojkchiča walja wentan. Tjazta ulurchiz aceitenaca chjitchiča, Jesusiž curpu tjajlinzjapa. Jalla nuž okan yekja maatakanacaqui cumpant'ichizakazza.

2 Jalla nicju irantižcu nii sipulturu pjuczta mazqui cjetžta cherziča.

3 Nekztanaqui sipulturquiz luzziča. Pero Jesusiž curpuqui ana wajtchiča.

4 Jalla nižtiquiztan ninacž kuz turwayskatatča. Ana jaknužquin zizi atchiča, čhjulu paachuca, jalla nii. Nuž želan pucultan luctak žoñižtakaz

tsijtsi cherziča. Ninacz zquti walja llijatča. Maatakanacztan chica cjissiča.

⁵ Jalla nuž cheržcu walja tsucchiča maatakanacaqui. Tuzi t'okziča. Jalla nuž cjen pucultan luctakažtakaz anjilaqui chiižinchiča maatakžquiz, tuž cjican:

—¿Kjažtiquiztam ančhucqui ticzinacporquiz žejtñi žoñi kjurjo?

⁶ Anaž tekz žejlča niiqui. Jacatatchiča ni-iqui. Ančhucz cjuñzna, Galilea yokquiz ojklayan Jesusaqui nižta mazinchipanla, jalla nii.

⁷ Nicju Jesusaqui mazinchiča, “Yooz Epiž cuchanžquita Zoñtča wejrqui. Ujchiz žoñinacz kjarquiz intirjital cjeeča. Nižaza cruzquiz ch'awczcu contal cjeeča. Pero čhjep majquiztanaqui jacatatača”. Jalla nuž Jesusaqui mazinchitača.

⁸ Jalla nuž chiyān maatakanacaqui cjuñziča Jesusiž mazintanaca.

⁹ Jalla nekztanaqui sipulturquiztan quejpžcu, tjappacha quint'ichiča niž tuncamani illzta žoñinaczquiz, nižaza tjapa nekz žejlñi žoñinaczquiz.

¹⁰ Jalla nii quint'iñi maatakanacaqui tižta tju-uchiztača: María Magdalenatača, Juanatača, Jacobuž maatača Mariiqui, nižaza tsjii kjaž yekja maatakanacatača. Jalla ninacaqui Jesusiž illzta žoñinaczquiz quint'ichiča, jaknužt watchi, jalla nii.

¹¹ Jalla nii maatakanacz quint'ita anapan cri-ichiča Jesusiž illzta žoñinacaqui.

—¿Čhjulukat lucuratažtakaz chiičhani nii maatakanacaqui? —jalla nuž cjichiča Jesusiž

illzta žoñinacaqui.

¹² Jalla nuž ana criižcumi Pedruqui ulanžcu sipulturu cherzñi zajtchiča. Colžcu sipulturu kjuylchuc cherziča. Nii capžta pañunaca tsjii latu chjojčžta želatča. Jalla nii cheržcu, walja kuzquiz pinsican ojkchiča, čhjulut watchaja, jalla nii.

EMAUS CJITA WAJTQUIN OJKTA

¹³ Nii noojpacha pucultan Jesusiž tjaajinta žoñinacaqui Emaús cjita watjaž okatča. Emaús watjaqui tsjii tuncaman kilometrotača Jerusalén wajtquiztan.

¹⁴ Jiczquiz ojkcan, ninacpora parlassatča, tjapa Jesusiž puntu watchinaca, jalla nii.

¹⁵ Nuž parlasan, Jesusapachača žcatžinžquichi. Nekztan ninacžtan chica ojkchiča.

¹⁶ Jesusižtan chica ojkcanami, nii pucultanaqui anapan pajñi cjissiča.

¹⁷ Jalla nekztanaqui Jesusaqui ninacžquiz pewcziča, tuž cjican:

—Jiczquiz ojkcan, ¿čhjul puntu ančhucqui parlasjo? ¿Kjažtiquiztan llaquita ančhuc ojkjo?

¹⁸ Tsjiizuñqui Cleofás cjitatača. Jalla niiqui kjaaziča, tuž cjican:

—Tjapa žoñinacaqui Jerusalén wajtquiz wajtchi quintu zizza. Am nekz žejlcan, ¿nii watchinaca anam ziz, jaa?

¹⁹ Nekztanaqui Jesusaqui kjaaziča, tuž cjican:

—¿Čhjulu watchitaya?

Nekztanaqui nii pucultanaqui cjichiča:

—Tii quintu žejlča. Tsjii Jesusa cjita žoñi želatča, Nazaret wajtchiz žoñi. Yooz taku paljayñi profetatača niiqui. Yooz Ejpž yujcquizimi žoñinacž yujcquizimi walja Yooz aztan milajrunaca paachiča. Nižaza Yooz taku zumapan parličiča.

²⁰ Jalla nekztanaqui učhum timplu jilirinacami učhum wajt jilirinacami nii Jesusa intirjichiča cruzquiz ch'awczjapa, conzjapa.

²¹ Wejrnacqui cjetuča, “Niiqui Israel wajtchiz žoñinaca liwriyaa” cjichintača. Nižaza tonjtanpacha čhjep majča, tižta watchiqui.

²²⁻²³ Wejtnacquiztan tsjii kjaž maatakanacqui wentan Jesusiž sipulturu cherzñi ojkchiča. Jalla nekztanac “Jesusiž curpu ana žejlča” cjican tjonchiča. Tjonžcu quint'ichiča, tižta. Sipulturnquin anjilanaca chertkalča. Anjilanacqui cjitkalča “Jesusaqui vivo žejtchiča” cjican. Jalla nuž quint'itikalča maatakanacqui. Jalla nuž quint'itiquiztan tsucchinča wejrnacqui.

²⁴ Jalla nii quintu nonžcu tsjii kjažt wejtnaca mazinacqui sipulturu cherzñi ojkchiča. Nii maatakaž quint'ita, jalla nižtapacha cherziča. Pero Jesusa ana cherchiča.

²⁵ Jalla nekztanaqui Jesusaqui cjichiča:

—Ancha ana intintiñi ančhucqui. ¿Kjažtatajo? ¡Ancha ch'aman criichinčhucča tjapa Yooz taku paljayñi profetanacž cijjrtaqui!

²⁶ Ima honorchiz mantican, Cristuqui nuž sufrispantaž niic, ¿ana jaa?

²⁷ Jalla nekztanaqui Jesusaqui ninacžquiz tjajajñi kallantichiča, tjapa cijjrta Yooz takunaca

niiž puntuquiztan, jalla nii. Tjaajincan, Moisés cjiyrta libruquiztan kallantichiča. Nižaza tjappacha Yooz taku paljayñi profetanacz libruquiztan tjaajinchiča niiž persun puntuquiztan.

²⁸ Jalla nekztanaqui jakziquin ojektčhaja, jalla nicju irantitan, Jesusaqui tira wajtz cjichitača.

²⁹ Nii pucultan žoñinacaqui Jesusižquiz rocatča, tuž cjican:

—Wejtnacatan žela. Tjuñi zezillaž cjissa, joz zumča.

Nekztanaqui Jesusaqui ninacztan chica tsjii kjuyquiz želi luzziča.

³⁰ Nekztanaqui tjapa ninacaqui misquiz julziča. Nuž julžcu Jesusaqui t'anta tanzicha niiž kjaržtan. Nekztanaqui Yooz Ejpžquin sparaquiž cjichiča. Nekztan ninaczquiz tojziča.

³¹ Nuž paan nii pucultan žoñinacaqui Jesusa pajñiž cjissiča, čhujqui cjetžintažtakaz. Pero nii orapacha Jesusaqui liwj katchiča.

³² Nii pucultanaqui ninacpora parlassiča, tuž cjican:

—Učhumnacatan jiczquiz okan nižaza Yooz taku tjaajnan, učhumnaca kuzqui ancha zint'atča. Jalla nižtataž, žana jaa?

³³ Jalla nekztanaqui ana tjewžcu Jerusalén watja quejpciča. Jalla nicju Jesusiž tuncaman illzta žoñinacztan zalchiča, yekja mazinacztan juntazzi.

³⁴ Ninacaqui cjichiča:

—Ultim werara jacatatchipanča Jesusa Jiliriqui. Simonaqui zakaz cherchiča.

35 Nekztanaqui nii pucultanaqui zakaz quint'ichiča, jaknužt jicquiz okan, ninacžquiz watčhaja, jalla nii. Nižaza jaknužt Jesusižquiz pajtčhaja t'anta tojznan, nii quint'ichizakazza.

JESUSAQUI TIRIPINTIT PARIZICHICHA

36 Jalla nuž parlan, Jesusapachača ninacž taypiquiz tsijsiqi. Jesusaqui ninacžquiz tsaanchiča, tuž cjican:

—¡Zuma kuzziz cjee!

37 Ninacaqui ancha ispantichi cjissiča, ancha tsucchiča. Pinsichiča, “Almaž caa” cjican.

38 Pero Jesusaqui cjichiča:

—¿Kjažtiquiztan ančhucqui tsucchinčhucta? ¿Kjažtiquiztam wejt puntuquiztan ančuca kuzquiz turwaysita?

39 Wejt kjaraz cherna. Wejt kjojchaž cherna. Wejrpachača. Lanzna. Chera. Tsjii alma animuqui ana janchichizza, nižaza ana tsjijchizza. Ančhucqui cherča, wejrtča janchichizmi tsjijchizmi.

40 Jalla nuž chiican, Jesusaqui kjaranaca kjo-jchanaca tjeeziča.

41 Jalla nekztanaqui nii žejlñi žoñinacaqui kuzquiz pinsichiča, “Jesusaqui žejlča werara, ana werara”, nii. Nižtami cuntintutača. Ispantichi želan, Jesusaqui ninacžquiz cjichiča:

—Ančhucalta ¿čhjulut lujljapa žejl?

42 Nekztanaqui Jesusižquiz tjaachiča ch'iz canca, nižaza mazk'a.

43 Jesusaqui nii čhjeri tanžcu lujlchiča ninacaž cheran.

44 Nekztanac cjichiča:

—Tuquiqui ančhucaltan žejlcan ančhucaquiz mazinčintača, jaknužt wejtquiz watstanažlaja, jalla nii. Jaziqui cumplispantača tjapa wejt puntuquiztan cjiirta Yooz takunaca. Moisesqui wejt puntuquiztan cjiirchiča, nižaza tuquta Yooz taku paljayñi profetanacaqui cjiirchizakazza wejt puntuquiztan. Nižaza salmos cjita liwruquiz cjiirta zakaztača wejt puntuquiztan. Jalla nii tjapa cumplispantača.

⁴⁵ Jalla nekztanaqui Yooz taku tjaajincan zumpacha intintiskatchiča.

⁴⁶ Nižaza cjichiča:

—Jalla tuž cjiirtatača. Cristuqui ticspantača. Nižaza čhjep majquiztan jacatatspantača.

⁴⁷ Nekztan Cristuž mantita kamañquiz kamcan žoñinacaqui tjapa kjutñi nacionanacaran liwriiñi taku paljaystanča. Jerusalén wajtquiztan liwriiñi taku paljayi kallantistanča. Jalla tuž cjiican, paljayaquiča, “Yoozquin kuzziz cjee, nižaza kuznaca campiya, ujnaca pertunta cjisjapa”.

⁴⁸ Ančhucqui jalla nižtapacha paljayaquiča. Tisticunacača ančhucqui.

⁴⁹ Yooz Ejpqui ančhucaquiz taku compromitchiča ančhuca kuzquiz Espíritu Santu cuchanzjapa. Wejrqui ančhucaquiz wajilla cuchanžcača nii wejt Yooz Epiž compromitta Espíritu Santo, jalla nii. Nižaza tii Jerusalén wajtquizpachaž kamla, tsewctan cuchanžquita Espíritu Santuž azi tanzcama.

JESUSA ARAJPACHQUIN CHJICHTA

⁵⁰ Jalla nekztanaqui Jesusaqui ninaca chjitchičha wajtž tjiya, Betania cjita watjacama. Jalla nicju kjara waytižcu, ninacžquiz cjichiča:

—Yooz Ejpqui ančhucaquiz zuma yanapla.

⁵¹ Jalla nuž chiižcuqui, Jesusaqui ninacžquiztan zarakchiča. Tsewcchucpacha waytiscu chjich-tatača.

⁵² Nii ecta žoñinacaqui Jesucristuž honora pal-jayžcu Jerusalén cjita watja ancha cuntintuž cut-tižquichiča.

⁵³ Jalla nicju ninacaqui timpluquiz pan žejlchiča, Yooztajapa honora waytican. Jalla nužoj cjila. Amén.

Ew Testamento: Chipay Tawkquiztan New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

baeaa6d6-fcc1-578f-afbd-04a9c5c14184